
U d'/of OTTAHA 39003002165024





Digitized by the Internet Archive in 2010 with funding from University of Ottawa

· fun 6/66

C. MAROT

### Il a été tiré de cette édition :

50	exemplaires sur papier de Chine	+	fr.	))
001	exemplaires sur papier vergé à la			
	forme	3	fr.	50
25	exemplaires sur papier vergé teinté.	3	fr.	50
25	exemplaires sur papier rosé (cuisse			
	de nymphe émue'	3	fr.	))

## **OEUVRES**

DΕ

# C. MAROT

### DE CAHORS

VALET DE CHAMBRE DU ROY

ÉDITION REVUE SUR CELLE DE 1544


NOTICE PAR BENJAMIN PIFTEAU

TOME PREMIER



### PARIS

DELARUE, LIBRAIRE-EDITEUR
3, RUE DES GRANDS-AUGUSTINS, 3



PQ 1635 .A1 1884 N.1



# CLÉMENT MAROT

ET SES OEUVRES

PAR

#### BENJAMIN PIFTEAU

LÉMENT MAROT naquit à Cahors, en

Son père, Jean Marot, de Caen, poète de cour, dont il fut la plus belle œuvre, s'était marié en poète, c'est-à-

dire « en passant » à une Cahortaise, et le jeune Clément resta, avec sa mère, à Cahors.

Dès 1505, cependant, alors que Clément n'avait encore que dix ans, son père le fit venir à Paris. C'était dans l'intention d'en faire un avocat, et bientôt même le jeune homme commença ses études de droit en travaillant chez un procureur au Châtelet; mais, se dégoûtant bien vite de la procédure, il accepta un emploi de page dans la maison du marquis le Villeroy.

En même temps il commençait à rimer, malgré les conseils de son père, qui avait des raisons pour croire que le métier de poète n'enrichissait guère, et, certaines pièces de lui étant parvenues à Marguerite, sœur de François Ier, elle devina son talent naissant et s'attacha Clément en qualité de valet de chambre.

Ce fut dans cette condition, qui lui faisait des loisirs, que le poète produisit des vers qui commencèrent réellement sa réputation.

Son père, qui était valet de chambre de François I<sup>ex</sup>, étant venu à mourir (1523), la protection de Marguerite lui valut d'être nommé à la place du défunt. Cela, pourtant, tira en longueur, à ce qu'il paraît; car nous avons une pièce de lui où il insiste pour être conché sur les états, à la place de son père.

Quoi qu'il en soit, il arriva à être valet de chambre de François I<sup>et</sup>, à qui il avait offert un de ses premiers poèmes, le Temple de Cupido, et il accompagna le roi à l'armée.

Il assista notamment au camp du Drap d'or (1520), simple parade, et en Italie, où, avec son maitre, il fut fait prisonnier à Pavie, après avoir été blessé au bras, commençant ainsi dignement la partie agitée de sa vie (1525).

Délivré bien avant François Iet, il fut presque aussitôt arrêté et mis au Châtelet, pour s'être montré sympathique aux idées de la religion nouvelle. D'après son poème l'Enfer, où il décrit sa prison, il aurait simplement été dénoncé, par une de ses maitresses, pour avoir mangé du lard en carême.

Déféré, heureusement, à l'évêque de Chartres, qui était son ami, il put avoir une prison assez douce. Ce fut même là que, dans ses loisirs forcés, il pré-

para une édition retouchée du Roman de la Rose (1527).

Il ne tarda pas à être rendu à la liberté; mais il n'en devint pas plus prudent, et il se fit bientôt mettre en prison de nouveau : c'était pour avoir arraché des mains de la prévôté un homme qu'on venait d'arrêter (1530). Il est vrai qu'ayant envoyé une « épitre » à François Ier, il fut assez vite délivré.

Cependant, il se sentait suspect et entouré d'ennemis: prudemment, il alla demander asile à Marguerite, devenue reine de Navarre, qui s'était constituée la protectrice des esprits indépendants et surtout la sienne. On accuse même Marguerite, disons-le ici, d'avoir eu pour lui des tendresses particulières; mais rien ne le prouve. En effet, si l'on en veut juger d'après certaines pièces de Marot et de la reine ellemême, on pourrait se tromper; car c'était alors une chose reçue, pour un poète, d'employer des expressions des plus passionnées et même des plus libres à l'égard de ses bienfaitrices.

Au reste, Marot, ne se croyant pas en sureté, quitta bientôt la reine de Navarre et alla se réfugier à la cour de Renée de France, duchesse de Ferrare, qui accueillait tous les esprits persécutés (1536), et chez qui il fit connaissance avec Calvin et se lia avec lui.

Malheureusement, le pape Paul III forçant le duc de Ferrare à abandonner les protégés de sa femme, Marot, qui n'était pourtant qu'un libre-penseur, qu'un sceptique, et non un sectaire comme Calvin, dut s'éloigner avec lui de la cour de Ferrare : il se réfugia à Venise.

Marot reparut enfin à la cour de François I<sup>eq</sup> (1538); mais, bientôt, s'étant lié avec le célèbre Vatable, pro-

fesseur à la chaire d'hébreu, il se mit à traduire quelques-uns des Psaumes de David; ce qui le fit de nouveau persécuter. François Ier proscrivit même cette traduction; ce qui ne l'empêcha pas d'avoir un grand succès parmi les réformés, qui chantèrent à l'envi ces Psaumes, mis en musique par Goudinel.

Encore une fois Marot dut s'enfuir. Il alla retrouver Calvin à Genève; seulement, l'austérité des religionnaires ne pouvait pas plus lui convenir que l'hypocrisie des moines. Aussi, ne tarda-t-il pas à être chassé. On l'accusait d'avoir joué au tric-trac; cequi était, paraît-il, du dérèglement pour les brûleurs de Dubourg.

Il choisit Turin pour son nouveau refuge, et c'est de là qu'il chanta la bataille de Cérisoles, gagnée par François I<sup>ev</sup> (septembre 1544).

Ce fut son chant du cygne. Loin de ses anciens protecteurs, négligé par ses nouveaux (les gouverneurs du Piémont, enlevé par François I à Charles III, duc de Savoie, surnommé le Bon), il tomba malade, s'alita et mourut bientôt dans la pauvreté.

Clément Marot s'était marié — comme son père, en poete — et il laissa plusieurs enfants, parmi lesquels un fils, Michel Marot, né vers 1520, qui fit quelques poésies; mais, différent en cela de son père. Jean Marot, en ce fils Clément ne fit pas sa plus belle œuvre, et s'il a survécu, ce n'est que par ses vers,

C'est pourquoi nous allons maintenant en donner une appréciation.

Il faut le dire tout de suite, s'il fut un homme d'esprit et un poète habile et charmant, qui éclipsa tous les poetes de l'époque, Clément Marot ne fut pas un créateur. Il ne fit que continuer les anciens poètes en les limant, depuis Guillaume de Lorris et Jean de Meung, les auteurs du Roman de la Rose (xiiiº siècle), jusqu'à Charles d'Orléans, dont il prit la manière et qu'il effaça complètement, et même jusqu'à Villon, qui est resté plus vivant que lui. Il y a plus : ce n'est qu'assez tard, et sur les conseils (il le dit lui-même) de Jean Lemaire, un Belge, son ami, qu'il mit en pratique l'alternative des rimes masculines et féminines, et il conserva toujours l'usage et même l'abus des hiatus.

Son mérite ou plutôt son succès tient simplement à ceci : c'est qu'il fut le premier en France à faire des vers dans une langue claire et compréhensible. Aussi, le lit-on encore avec plaisir et le lira-t-on encore longtemps.

Ce n'est pas à dire qu'il soit également bon et intéressant partant : il y a, au contraire, un certain nombre de pièces assez faibles. Nous voulons parler surtout de ses opuscules (parmi lesquels le Temple de Cupido), où l'on trouve des allégories puériles et ennuyeuses.

En quoi il a excellé particulièrement, c'est dans l'épigramme, l'épitre et l'élégie, et sa manière est tellement prisée qu'on l'a imitée souvent, sous le nom de style marotique. Nous citerons, entre autres, l'épigramme de Semblançay, qui est un petit chefd'œuvre, et sa fameuse épitre à François Ier, dans laquelle il raconte qu'il a été dévalisé de tout, même de ses vêtements, par un sien valet, « au demeurant le meilleur fils du monde. »

Faisons remarquer que cette épitre est une imitation de celle de Villon au duc de Bourbon. Au reste, Villon fut le poète qu'il étudia le plus, et il s'en trouva bien. Il publia même, comme il avait fait pour Guillaume de Lorris et Jean de Meung, une édition des œuvres de ce devancier (1532), sur l'invitation de François I<sup>ex</sup>, qui l'appréciait comme lui.

Quant aux ballades, encore une imitation de Villon, il en a de fort jolies, par exemple celle de Frère Lubin.

Nous ne parlerons qu'en passant des traductions qu'il a faites des Bucoliques de Virgile, des Métamorphoses d'Ovide et de quelques sonnets de Pétrarque, non plus que de ses Psaumes: ce n'est pas là qu'il faut chercher le poète spirituel et aimable qui a survécu.

Ses chants, simples poésies officielles, ne valent pas davantage la peine qu'on s'y arrête: on n'est pas poète sur commande.

En somme, nous l'avons dit, Marot est resté et restera dans notre littérature, par son esprit, sa grâce et sa naïveté.

Il nous reste à donner quelques indications bibliographiques.

Ses premières poésies furent publiées en 1532, à Paris, sous le titre de : L'Adolescence Clémentine, autrement les (Euvres de Clément Marot. Vinrent ensuite : les Cantiques de la paix (1539); l'Enfer de Clément Marot (1542); les Psaumes de David, mis en rimes françaises (1543); Épigrammes (1547).

Quant aux Œuvres complètes, il y eut plusieurs éditions publiées du vivant de Marot.


Deux sont dues à Étienne Dolet, imprimeur à Lyon: celle de 1538 et celle de 1542.

La derniere, celle de 1544 (à l'Enseigne du Rocher), est la plus complete, et donne pour la première

fois les pièces dans l'ordre où on les donne depuis. C'est aussi celle que nous donnons, et le public nous en saura gré.

BENJAMIN PIFTEAU.





## OEUVRES DE MAROT

#### L'AUTHEUR A SON LIVRE.


O Ster je veux (approche toy mon Livre)
Un tas d'escrits, qui par d'autres sont faids:
Or va, c'est faid: cour leger & delivre:
Deschargé t'ai d'un lourd, & pesant faix.
S'ils font escrits (d'avanture) imparfaids,
Te veux-tu faire en leurs faultes reprendre?
S'ils les font bien, ou mieux, que je ne fais,
Pourquoy veux-tu sur leur gloire entreprendre?
Sans eux (mon Livre) en mes Vers pourras prendre
Vie apres moy pour jamais, ou long-tems:
Mes Œuvres donc content te doivent rendre.
Peuples, & Roys, s'en tiennent bien contens.

#### A SA DAME

Tu as, pour te rendre amufée, Ma jeunesse en papier icy: Quant à ma jeunesse abusée, Une autre que toy l'a usée. Contente toy de ceste cy.

La Mort n'y mord.

Ι.





# **OPUSCULES**

### LE TEMPLE DE CUPIDO



UR le printemps, que la belle Flora
Les champs couverts de diverse fleur a.
Et son amy Zephyrus les Esvente,
Quand doucement en l'air souspire &

[vente : 7]

e jeune enfant Cupido, Dieu d'aymer, s yeux bandez commanda deffermer, ur contempler de fon throsne celeste us les Amans, qu'il atteint, & moleste. Adonc il veid au tour de ses charroys un seul regard maintz victorieux Roys, utz Empereurs, Princesses magnisiques, ides & laidz, visages dessiques, lles & filz en la fleur de jeunesse, les plus forts subjectz à sa hautesse.

Brief, il congnut, que toute nation Ployoit fous luy, comme au vent le fion. Et qui plus est, les plus fouverains Dieux Veid tresbucher fouz ses dards furieux.

Mais ainsi est, que ce cruel enfant Me voyant lors en aage triomphant, Et m'esjoüir entre tous ses souldars, Sans point sentir la force de ses dards, Voyant aussi, qu'en mes œuvres, & dicts, J'allois blasmant d'Amours tous les edicts Delibera d'un assault amoureux Rendre mon cœur (pour une) langoureux

Pas n'y faillit: Car par trop ardente ire Hors de fa trousse une sagette tire De bois mortel, empenné de vengeance, Portant un ser forgé par desplaisance Au seu ardent de rigoureux resus: Laquelle lors (pour me rendre confus); Il descocha sur mon cueur rudement.

Qui lors congneust mon extreme torment, Bien est le cueur remply d'inimitié, Si ma douleur ne l'eust meu à pitié: Car d'aucun bien je ne su secouru De celle là pour qui j'estoy feru: Mais tout ainsi que le doux vent Zephyre Ne pourroit pas sendre Marbre, ou Porphyre; Semblablement mes souspirs, & mes cris, Mon doux parler, & mes humbles escrits N'eurent pouvoir d'amollir le sien cueur, Qui contre moy lors demoura vainqueur.

Dont congnoissant ma cruelle maistresse Estre trop forte & estre forteresse Pour Chevalier si foible, que j'estoye:

'oyant aussi, que l'amour, ou jettoye e mien regard, portoit douleur mortelle, eliberay si fort m'eslongner d'elle ue sa beauté je mettrois en oubly : ar qui d'Amours ne veult prendre le ply, t a desir de fuir le danger, e fon ardeur, pour tel mal estranger, esoing luy est d'essongner la personne, qui fon cueur enamouré se donne. Si fey des lors (pour plus estre certain e l'oublier) un vovage lointain : ar j'entreprin fouz espoir de liesse, 'aller chercher une haulte Déesse, ue Juppiter de ses divines places idis transmit en ces regions basses, our gouverner les esperits loyaux, t resider es dommaines Royaux. C'est ferme amour, la Dame pure, & munde, ui long temps a ne fut veuë en ce monde : a grand' bonté me feit aller grand erre our la chercher en haulte Mer et Terre, insi que fait un Chevalier errant : t tant allay celle Dame querant, ue peu de temps apres ma departie, ay circuy du monde grand' partie, ù je trouvay gens de divers regard, qui je dy : Seigneurs, si Dieu vous gard, n ceste terre avez vous point congnu ne, pour qui je fuis icy venu? a fleur des fleurs, la chaste colombelle, 'ille de paix, du monde la plus belle, lui ferme Amour s'appelle : Helas, seigneurs, i.la fçavez, foyez m'en enfeigneurs.

Lors l'un se taist, qui me fantasia:
L'autre me dit, mille ans ou plus y a,
Que d'amour serme en ce lieu ne souvint:
L'autre me dit, jamais icy ne vint.
Dont tout subdain me prins à despiter:
Car je pensois que le hault Juppiter,
L'eust de la terre en son throsne ravie.

Ce neantmoins ma penfée affouvie De ce ne fut : tousjours me preparay De pourfuivir : & si deliberay, Pour recontrer celle dame pudique, De m'en aller au temple Cupidique En m'esbatant : car j'eu en esperance, Que là dedans faisoit sa demourance.

Ainsi je pars, pour aller me prepare Par un matin, lors qu'Aurora separe D'avec le jour la tenebreuse nuict, Qui aux devotz Pelerins tousjours nuit.

Le droit chemin assez bien je trouvoye : Car çà & là, pour adresser la voye Du lieu devot, les Passans Pelerins Alloient semant roses, & romarins, Faisant de sleurs mainte belle montjoye, Qui me donna aucun espoir de joye.

Et d'autre part, rencontray sur les rangs Du grand chemin, maintz Pelerins errans, En souspirant, disans leur advanture Touchant le fruict d'amourouse pasture : Ce qui garda de tant me soucier : Car de leur gré vindrent m'associer Jusques à tant que d'entrer je su prest Dedans ce Temple, ou le Dieu d'Amour est, Feinct à plusieurs, et aux autres loyal. Or est ainsi, que son Temple Royal
Suscita lors més ennuyez espritz:
Car environ de ce divin pourpris
Y souspiroit le doux vent Zephyrus,
Et y chantoit le gaillard Tityrus:
Le grand Dieu Pan, avec ses Pastoureaux,
Gardant Brebis, Bœusz, Vaches, & Taureaux,
Faisoit sonner Chalumeaux, Cornemuses,
Et Flageoletz, pour esveiller les Muses,
Nymphes des Bois, & Déesses hautaines,
Suyvans, Jardins, Bois, Fleuves & Fontaines,
Les Oyseletz par grand joye, & deduit,
De leurs gosiers respondent à tel bruit.

Tous arbres font en ce lieu verdoyans:
Petis ruisseaux y furent ondoyans,
Tousjours faisans, au tour des Prez herbus
Un doux murmure: & quand le cler Phebus
Avoit droit là ses beaux rayons espars,
Telle splendeur rendoit de toutes pars
Ce lieu divin, qu'aux humains bien sembloit.
Que Terre au Ciel de beauté ressembloit:
Si que le cueur me dit par previdence,
Celuy manoir estre la residence
De ferme Amour, que je queroye alors.

Parquoy voyant de ce lieu le dehors Estre si beau, Espoir m'admonnesta De poursuivir, & mon corps transporta (Pour rencontrer ce que mon cueur poursuit) Pres de ce lieu, basti comme il s'ensuit.

Ce Temple estoit, un clos sleury verger, Passant en tout le val delicieux Auquel jadis Paris, jeune berger, Pria d'amours Pegasis aux beaux yeux : Car bien fembloit que du plus haut des Cieux Juppiter fust venu au mortel estre, Pour le construire & le faire tel estre, Tant reluisoit en exquise beauté: Brief, on l'eust pris pour Paradis terrestre, S'Eve, & Adam dedans eussent esté.

Pour ses armes, Amour cuifant Porte de gueules à deux traits : Dont l'un ferré d'or tresluisant Caufe les amoureux attraitz : L'autre, dangereux plus que tres, Porte un fer de plomb mal couché, Par la pointe tout rebouché. Et rend l'amour des cueurs esteinte : De l'un fut Apollo touché : De l'autre Daphné fut atteinte. Si tost que j'eu l'escusson limité, Levay les yeux & proprement je veis Du grand portail fur la fublimité Le corps tout nud, & le gracieux vis De Cupido: lequel pour son devis Au poing tenoit un arc riche tendu. Le pied marché, & le bras estendu, Prest de lascher une fleche aguisée Sur le premier, fust fol, ou entendu, Droit sur le cueur, & fans prendre visée

La beauté partant du dehors De celle maifon amoureuse, D'entrer dedans m'incita lors, Pour voir chose plus somptueuse: Si veins de pensée joyeuse Vers Bel acueil le bien apris, Qui de sa main dextre m'a pris, Et par un fort estroit sentier Me feit entrer au beau pourpris Dont il estoit premier portier.

Le premier huis de toutes fleurs vermeilles Estoit construict, & de boutons yssans, Signifiant que joyes nompareilles Sont à jamais en ce lieu fleurissans: Celuy chemin tindrent plusieurs passans. Car Bel acueil en gardoit la barrière: Mais Faux danger gardoit sur le derrière Un portail fait d'espines, & chardons, Et dechassoit les Pelerins arrière, Quand ilz venoient pour gaingner les pardons.

Bel acueil ayant robe verte
Portier du Jardin precieux,
Jour & nuict laisse porte ouverte
Aux vrays Amans & gracieux:
Et d'un vouloir folacieux
Les retire sous sa baniere,
En chastant (sans grace planiere,
Ainsi comme il est de raison)
Tous ceux qui sont de la maniere
Du faux & desloyal Jason.

Le grand Autel est une haulte Roche,
De tell' vertu que si aucun Amant
La veult suïr, de plus pres s'en approche,
Comme l'Acier de la pierre d'Aymant:
Le Ciel, ou Poisle, est un Cedre embasmant
Les cueurs humains, duquel la largeur grande
Couvre l'Autel: Et là (pour toute ossrande)
Corps, cueur, & biens, à Venus fault livrer:
Le corps la sert: le cueur grace demande,
Et les biens sont grace au cueur delivrer.

De Cupido le Diademe Est de roses un chapelet, ()ue Venus cueillit elle mesme Dedans fon jardin verdelet: Et fur le printemps nouvelet Le transmit à son cher enfant, Qui de bon cueur le va coiffant : Puis donna, pour ces rofes belles, A fa mere un Char triomphant, Conduit par douze Colombelles. Devant l'Autel, deux Cypres finguliers Je vey fleurir fous odeur embasmée : Et me dit-on, que c'estoient les pilliers Du grand Autel de haulte renommée. Lors mille Oifeaux d'une longue ramée, Vindrent voler fur ces vertes courtines, Prestz de chanter chansonnettes divines. Si demanday pourquoy là font venus: Mais on me dit, Amy, ce font matines, Qu'ilz viennent dire en l'honneur de Venus.

Devant l'image Cupido
Brusloit le Brandon de destresse,
Dont su enslammée Dido,
Biblis, & Heleine de Grece.
Jan de Meun plein de grand sagesse,
L'appelle, en termes savoureux,
Brandon de Venus rigoureux,
Qui son ardeur jamais n'attrempe:
Toutessois au Temple amoureux
Pour lors il servoit d'une Lampe.
Sainctes & Saincts, qu'on y va reclamer,
C'est beau parler, Bien celer, Bon rapport,
Grace, Marcy, Bien servir, Bien aymer,

Qui les Amans font venir à bon port:
D'autres aussi, ou (pour avoir support
Touchant le faict d'amoureuses conquestes)
Tous Pelerins doivent faire requestes,
Offrendes, vœuz, prieres, & clamours:
Car fans ceux là, l'on ne prend point les bestes,
Qu'on va chassant en la forest d'Amours.

Chandelles flambans, ou esteintes, Que tous Amoureux Pelerins Portent devant telz Saincts et Sainctes, Ce sont bouquets de Romarins.

Les Chantres, Linotz, & Serins, Et Rossignols au gay courage, Qui sur buissons de verd bocage, Ou branches, en lieu de pulpitres, Chantent le joly chant ramage, Pour Versetz, Respons, & Epistres.

Les Vitres font de clair & fin Crystal, Ou peintes font les gestes authentiques De ceux qui ont jadis de cueur loyal Bien observé d'Amours les loix antiques.

En apres ont les trefainctes Reliques, Carcans, Anneauz, aux fecretz Tabernacles: Efcuz, ducatz, dedans les cloz obstacles, Grands Chaines d'or, dont maint beau corps est ceinct, Qui en Amours font trop plus de miracles, Que Beau parler, ce tres-glorieux Sainct.

Les Voultes furent à merveilles Ouvrées fouverainement : Car Priapus les feit de treilles, De fueilles de Vigne & Serment : Là dependent tant feulement Bourgeons et Raisins, à plaisance : Et pour en planter abondance, Bien fouvent y entre Bacchus, A qui Amour donne puissance, De mettre guerre entre bas culs.

Les Cloches font Tabourins, & Doucines, Harpes, & Luz, instrumens gracieux, Haultbois, Flageolz, Trompettes, & Buccines, Rendans un fon si tressolacieux. Qui n'est Souldat, tant soit audacieux, Qui ne quittast Lances & Braquemars, Et ne sallist hors du Temple de Mars, Pour estre Moyne au Temple d'Amourettes, Quand il orroit sonner de toutes pars Le Carrillon des Cloches tant doucettes.

Les Dames donnent aux malades Qui font recommandez au Profnes, Ris, baifers, regards, & œillades: Car ce font d'Amours les aulmoines.

Les Prescheurs sont vieilles Matrones, Qui aux jeunes donnent courage D'employer la fleur de leur aage A servir Amour le grand Roy, Tant que souvent par beau langage Le convertissent à leur Loy.

Les Fons du Temple, estoit une fontaine, Ou decouroit un ruisseau argentin: Là se baignoit mainte Dame hautaine Le corps tout nud, monstrant un dur tetin: Lors on eust veu marcher sur le patin Povres Amans à la teste ensumée, L'un apportoit à sa tresbien aymée, Esponge, peigne, & chacun appareil, L'autre à sa Dame estendoit la ramée, Pour la garder de l'ardeur du Soleil.

Le Cimetiere est un verd Bois, Et les murs, Hayes, & Buissons: -Arbres plantez, ce sont les Croix: De prosondis, gayes chansons.

Les Amans surprins de frissons D'amours, & attrapez és lacs, Devant quelque huys, tristes & las, Pres la tombe d'un trespassé, Chantent souvent le grand helas, Pour requiescant in pace.

Ovidius, maistre Alain Charretier, Petrarque aussi, le Romant de la Rose, Sont les Messelz, Breviaire, et Psautier, Qu'en ce fainct Temple on lit, en rime & prose, Et les leçons, que chanter on y ofe, Ce font Rondeaux, Ballades, Virelaiz Motz à plaisir, rimes, & trioletz, Lesquelz Venus apprend à retenir, A un grand tas d'Amoureux nouveletz Pour mieux favoir Dames entretenir. Autres manieres de Chanfons, Leans on chante à voix contraintes, Ayans casses, & meschans sons, Car ce font cris, pleurs, & complaintes. Les petites chapelles fainctes, Sont chambrettes, & cabinetz Ramées, bois, & jardinetz, Ou l'on se perd, quand le verd dure : Leurs huys font faits de buissonnetz, Et le pavé tout de verdure. Le benoistier fut faict en un grand plain,

Le benoistier fut faict en un grand plain, D'un lac fort loing d'herbes, plantes, & fleurs: Pour eau beniste, estoit de larmes plein, Dont sut nommé le piteux lac de pleurs : Car les amans dessous tristes couleurs Y sont en vain mainte larme espandans. Les fruictz d'Amours là ne surent pendans, Tout y sechoit tout au long de l'année : Mais bien est vray, qu'il y avoit dedans, Pour asperges une rose sennée.

Marguerites, lys, & œilletz,
Passeveloux, roses flairantes,
Romarins, boutons vermeilletz,
Lavandes odoriferantes:
Toutes autres fleurs apparantes
Jettans odeur tresadoucie,
Qui jamais un cueur ne soucie,
C'estoit de ce Temple l'encens.
Mais il y eut de la soucie:
Voila qui me trouble le sens.

Et si aucun (pour le monde laisser)
Veult là dedans se rendre Moyne, ou Prestre,
Tout autre estat luy convient delaisser:
Puis va devant Genius l'Archiprestre,
Et devant tous en Jevant la main dextre.
D'estre loyal fait grand veuz et serments
Sur les autelz couverts de parements,
Qui sont beaux litz à la mode ordinaire:
Là où se font d'Amours les sacrements
De jour, & nuict sans aucun luminaire.

Depuis qu'un homme est là rendu, Soit sage, ou sot, ou peu idoine, Sans estre ne raiz, ne tondu, Incontinent on le fait Moyne. Mais quoy? il n'a pas grand essoine A comprendre les facrifices: Car d'Amourettes les fervices Sont faicts en termes fi trefclers, Que les apprentis & novices En favent plus que les grans clercs.

De requiem les messes, sont aubades : Cierges, Rameaus, & Sieges, la verdure, Ou les Amans font Rondeaux, & Ballades : L'un y est gay, l'autre mal y endure : L'une maudit par angoisse tresdure Le jour auquel elle se maria,

L'autre se plaint, que jaloux mary a : Et les sainéts motz, que l'on dit pour les ames, Comme Pater; ou Ave Maria : C'est le babil, & le caquet des Dames.

Processions, ce sont morisques
Que sont amoureux Champions,
Les hayes d'Allemaigne frisques,
Passepiedz, bransles, tourdions.
Là par grans consolations
Un avec une devisoit,
Ou pour Evangiles lisoit
L'art d'aymer faict d'art Poëtique:
Et l'autre sa Dame baisoit
En lieu d'une saincte relique.

En tous endroits je visite & contemple Presque estant de merveille esgaré:

Car en mes ans ne pense point voir temple Tant cler, tant net, ne tant bien preparé: De chacun cas sut à peu pres paré: Mais toutessois y eut faulte d'un point, Car sus l'autel de paix n'y avoit point: Raison pour quoy? tousjours Venus la belle, Et Cupido de sa darde, qui poinct, A tous humains sait la guerre mortelle.

Joye y est, & Dueil remply d'ire:
Pour un repos, de travaux dix:
Et brief, je ne saurois bien dire,
Si c'est Enfer, ou Paradis.
Mais, par comparaison, je dis,
Que celuy Temple est une Rose,
D'espines & ronces enclose:
Petis plaisirs, longues clamours.
Or taschons à trouver la chose,
Que je cherche au Temple d'Amours.

Dedans la nef du triomphant dommaine Songeant, refvant, longuement me pourmeine, Voyant Refuz, qui par dures alarmes Va incitant l'œil des Amans à larmes : Oyant par tout des cloches les doux fons, Chanter versets d'amoureuses leçons : Voyant chasser de Cupido les ferfz, L'un à Connilz, l'autre à Lievres, & Cerfs: Lascher Faucons, Levriers courir au bois, Corner, fouffler en Trompes et Haultbois: On crie, on prend: l'un chasse, & l'autre happe: L'un a ja pris : la beste luy eschappe, Il court apres : l'autre rien n'y pourchasse : On ne veid onc un tel deduit de chasse, Comme cestuy. Or tien-je tout pour veu, Fors celle-là, dont veux estre pourveu, Qui plongé m'ha au gouffre de destresse : C'est de mon cueur la treschere maistresse, De peu de gens au monde renommée, Qui ferme Amour est en terre nommée.

Long temps y a que la cherche & pourfuis, Et (qui pis est) en la terre, ou je suis Je ne voy rien, qui me donne asseurance, Que son gent corps y fasse demeurance : Et croy, qu'en vain je la vois reclamant, Car là dedans je voy un fol Amant, Qui va choisir une Dame assez pleine De grand'beauté. Mais tant y a qu'à peine Euz contemplé fon maintien gracieux, Que Cupido, l'enfant audacieux, Tendit fon arc, encocha fa fagette, Les yeux bandez dessus son cueur la jette Si rudement, voire de façon telle, Q'il y crea une playe mortelle. Et lors Amour le jucha sur sa perche : Je ne dy pas celle que tant je cherche, Mais une Amour Venerique, et ardente, Le bon renom des humains retardante, Et dont par tout le mal estimé fruich Plus que de l'autre en cestuy Monde bruit. Un' autre Amour fut de moy apperceuë, Et croy, que fut au temps jadis conceuë Par Boreas courant, & variable. Car onques chose on ne veid si muable, Ne tant legere en courts, & autres parts: Le sien pouvoir par la terre est espars, Chacun la veult, l'entretient, & fouhaitte : A la fuivir tout homme se dehaitte. Que diray plus? Certes un tel aymer, C'est Dedalus, voletant sur la mer : Mais tant a bruit, qu'elle va ternissant De fermeté le nom resplendissant.

Affez & trop ces deux amours trouvoye: Mais l'une fut lubricque, & estrangere Trop à mon vueil : & l'autre si legere, Qu'au grand besoing on la trouve ennemie. Lors bien penfay, que ma loyalle amie Ne cheminoit jamais par les fentiers, Là ou ces deux cheminoient volontiers: Parquoy conclu, en autre part tirer, Et de la nef foudain me retirer, Pour rencontrer la Dame tant illustre, Celle de qui jadis le trescher lustre Souloit chasser toute obscure fouffrance, Faifant regner Paix divine fous France: Celle pour vray (fans le blafme d'aucun) Qui de deux cueurs maintes fois ne fait qu'un : Celle par qui, Christ (qui souffrit moleste) Laissa jadis le hault throsne celeste, Et habita ceste basse vallée, Pour retirer Nature maculée De la prison infernale, & obscure.

A poursuivir souz espoir je prin cure Jusques au chœur du Temple me transporte: Mon œil s'espart au travers de la porte Faicte de Fleurs, & d'arbrisseaux tous verds: Mais à grand peine eu-je veu à travers, Que hors de moy cheurent plaintes, & pleurs, Comme en yver seiches sueilles, & sleurs.

Tristesse, & dueil de moy furent absens,
Mon cueur garny de liesse je sens,
Car en ce lieu un grand Prince je veis,
Et une Dame excellente de vis:
Lesquels portans escuz de sleurs Royales,
Qu'on nomme Lys, & d'Hermines ducales,

Vivoient en paix desfouz celle ramée, Et au milieu ferme Amour d'eux aymée, D'habits ornée à si grand avantage, Qu'onques Dido la Royne de Carthage, Lors qu'Æneas receut dedans fon port, N'eut tel' richesse, honneur, maintien, & port, Combien que lors ferme Amour avec elle De vrais subjects eust petite sequelle. Lors bel acueil m'ha le buiffon ouvert Du chœur du Temple, estant un pré tout verd : Si merciay Cupido par merites, Et faluay Venus, & fes Charites: Puis ferme Amour, apres le mien falut, Tel me trouva, que de fon gré voulut Me retirer desfous ses estandars : Dont je me tins de tous povres fouldars Le plus heureux, puis luy comptay, comment Pour fon Amour, continuellement J'ay circuy mainte contrée estrange : Et que souvent je l'ay pensée estre Ange, Ou resider en la court Celestine, Dont elle print tressacrée origine. Puis l'adverty, comme en la nef du Temple De Cupido (combien qu'elle soit ample) N'ay seu trouver sa tresnoble facture : Mais qu'à la fin fuis venu d'adventure Dedans le chœur, ou est sa mansion. Parquoy conclu en mon invention, Que ferme Amour est au cueur esprouvée

D'ire le puis, car je l'y ai trouvée.

### DIALOGUE

#### DE DEUX AMOUREUX

Le premier commence en chantant.

Mon cueur est tout endormy, Resveille moy belle, Mon cueur est tout endormy, Resveille le my.

LE SECOND

He, compaignon.

PREMIER

He mon amy:
Comment te va?

SECOND

Par le corps bieu (beau fire)
Je ne te le daignerois dire
Sans t'accoller. Ca ceste eschine:
De l'autre bras, que je t'eschine
De fine force d'accollades.

PREMIER

Et puis?

SECOND

Et puis?

PREMIER

Rondeaux, ballades, Chanfons, dizains, propos menus, Compte moy, qu'ilz font devenus: Se fait il plus rien de nouveau: SECOND

Si fait : mais j'en ay le cerveau Si rompu, & si alteré, Qu'en effect j'ay deliberé De ne m'y rompre plus la teste.

PREMIER

Pourquoy cela?

SECOND

Que tu es beste! Ne sais-tu pas bien, qu'il y a Plus d'un an, qu'amour me lia Dedans les prisons de m'amie:

PREMIER

Est-ce encor de Barthelemie La blondette?

SECOND

Et de qui donc? Ne fais-tu pas, que je n'eu onc D'elle plaisir, ny un seul bien?

PREMIER

Nenny vrayement, je n'en fay rien : Mais si tu m'en eusses parlé,
Ton affaire en fust mieux allé.
Croy moy, que de tenir les choses
D'amours si couvertes, & closes,
Il n'en vient que peine, & régret.
Vray est, qu'il fault estre secret :
Et feroit l'homme bien coquart,
Qui voudroit appeller un quart :
Mais en essect il fault un tiers.

Demande à tous ces vieux routiers, Qui ont esté vrays Amoureux,

# SECOND

Si est un tiers bien dangereux : S'il n'est Amy, Dieu sait combien.

# PREMIER'

He mon amy, chois le bien:
Et quand tu l'auras bien chois,
Si ton cueur se trouve sais
De quelque ennuyeuse tristesse,
Ou bien d'une grande liesse,
A l'amy te deschargeras,
Sais-tu comment t'allegeras?
Tout ainsi, par le sang saint George,
Comme si tu rendois ta gorge
Le jour d'un Caresme prenant.

# SECOND

Il vault donc mieux definaintenant, Que je t'en compte tout du long : N'est ce pas bien dict?

#### PREMIER

Or là donc.

Mais pour ce, que je fuis des vieux, En cas d'Amours, il vauldra mieux, Que les demandes je te face, Combien, de qui, en quelle place, Des refuz, des parolles franches, Des circonstances, & des branches, Et des rameaux : car je les ay tous Aprins de mes compaignons doux, Allant avec eux à la messe. Or vien ça, compte moy, quand est ce, Que premierement tu l'aymois?

SECOND

Il y a plus de feize mois, Voire vingt, fans avoir jouy.

PREMIER

L'aymes tu encores?

SECOND

Ouy.

PREMIER

Tu es un fol. Or de par Dieu, Comment dois je dire? en quel lieu Fut premier ta pensée esprise De fon amour?

SECOND

En une Eglife Là commençay mes passions.

PREMIER

Voila de mes devotions! Et quel jour fut ce?

SECOND

Par fainct Jaques Ce fut le propre jour de Pafques : (A bon jour bonne œuvre)

PREMIER

Et comment? Tu venois lors tout freschement De confesse, et de recevoir.

SECOND

Il est vrai mais tu dois savoir, Que tousjours à ces grans journées

Les femmes font mieux attournées, Qu'aux autres jours : & cela tente. O mon Dieu, qu'elle estoit contente De sa personne, ce jour là! Avegues la grace qu'elle a Elle vous avoit un corfet D'un fin bleu, lassé d'un lasset Jaune, qu'elle avoit faict expres. Elle vous avoit puis apres, Mancherons d'escarlate verte. Robbe de pers large, & ouverte, (J'enten à l'endroit des tetins) Chausses noires, petis patins, Linge blanc, ceinture houppée, Le chapperon faict en poupée, Les cheveux en passesillon, Et l'œil gay en esmerillon, Soupple, & droite comme une gaule, En effect faint François de Paule, Et le plus faint Italien Eust esté prins en son lien, S'à la voir se sust amusé.

PREMIER

Je te tien donc pour excusé Pour ce jour là : que fus tu?

SECOND

Pris.

PREMIER

Quel vifage as tu d'elle?

SECOND

Gris.

PREMIER

Ne te rid elle jamais?

SECOND

Point.

PREMIER

Que veux tu estre à elle?

SECOND

Joinét.

PREMIER

Par mariage, ou autrement : Lequel veux tu?

SECOND

Par mon ferment Tous deux sont bons, & si ne say: Je l'aymerois mieulx à l'essay, Avant qu'entrer en mariage,

PREMIER

Touche là, tu as bon courage, Et si n'es point trop degousté: Tu l'auras: & d'autre costé On m'a dit, qu'elle est amiable, Comme un Mouton.

SECOND

Elle est le Diable. C'est par sa teste que j'endure : Elle est par le corps bien plus dure, Que n'est le pommeau d'une dague.

PREMIER

C'est signe, qu'elle est bonne bague Compagnon.

#### SECOND

Voicy un mocqueur:

J'enten dure parmy le cueur:

Car quand au corps n'y touche mie,

Des que je l'appelle mamie:

Vostre amie n'est pas si noire,

Fait elle. Vous ne fauriez croire,

Comme elle est prompte à me desdire

Du tout.

PREMIER

Ainfi.

SECOND

Laisse moi dire:
Si tost que je la veux toucher,
Ou seulement m'en approcher,
C'est peine, je n'ay nul credit:
Et sais tu bien qu'elle me dit?
Un sascheux, & vous, c'est tout un:
Vous estes le plus importun,
Que jamais je vy. En essect,
Je vouldrois estre ja dessaict,
Et m'en croy.

PREMIER

Que tu es belistre! Et n'as tu pas ton franc arbitre, Pour sortir d'ou tu es entré!

SECOND

Arbitre? c'est bien arbitré: Je le veux bien, mais je ne puis: Bien un an l'ay laissée, & puis J'ay parlé aux Ægyptiennes, Et aux forcieres anciennes, D'y chercher jusqu'au dernier poinct Le moyen de ne l'aymer point : Mais je ne m'en puis descoiffer. Je pense que c'est un Enser, Dont jamais je ne sortirai.

PREMIER

Par mon ame je te diray:
Puis qu'il n'est pas en ta puissance
De la laisser, sa jouyssance
Te seroit une grand' recepte.

SECOND

Sa jouyssance? Je l'accepte : Amenez la moy.

PREMIER

Non: attens.

Mais affin que ne perdons temps, Conte moy cy par les menus Les moyens que tu as tenus, Pour parvenir à ton affaire.

SECOND

J'ay fait tout ce, qu'on fauroit faire. J'ay fouspiré, j'ay fait des cris, J'ay envoyé de beaux escrits, J'ay dansé, & ay fait gambades, Je luy ay tant donné d'œillades, Que mes yeux en sont tout lassez.

PREMIER

Encores n'est ce pas assez.

SECOND

J'ay chanté, le Diable m'emporte, Des nuicts cent fois devant sa porte, Dont n'en veux prendre qu'à tesmoins Trois pots à pisser, pour le moins, Que sur ma teste on ha cassez.

PREMIER

Encores n'est ce pas assez.

SECOND

Quand elle venoit au monstier, Je l'attendois au benoistier, Pour luy donner de l'eau bénite : Mais elle s'enfuyoit plus viste. Que Lievres, quand ilz font chassez.

PREMIER

Encores n'est ce pas affez.

SECOND

Je luy ay dit, qu'elle estoit belle, J'ay baisé la paix apres elle, Je luy ay donné fruits nouveaux Achetez en la place aux veaux, Disant, que c'estoit de mon creu, Je ne say, si elle l'ha creu: Et puis tant de bouquets, & roses. Bres, elle ha mis toutes ces choses Au rang des pechez essacez.

PREMIER

Encore n'est ce pas assez. Il falloit estre diligent De luy donner.

SECOND

Quoy?

PREMIER

De l'argent. Quelque chaine d'or bien pefante, Quelque Esmeraude bien luisante, Quelques Patenostres de pris, Tout soudain cela seroit pris, Et en le prenant ell' s'oblige.

# SECOND

Ell' n'en prendroit jamais, te dis je : Car c'est une semme d'honneur.

#### PREMIER

Mais tu es un mauvais donneur, Je le voy tresbien.

### SECOND

Non fuis point: Mais croy qu'elle n'en prendroit point, En y eust il plein trois barils.

#### PREMIER

Mon amy elle est de Paris : Ne t'y fie, car c'est un lieu Le plus gluant.

#### SECOND

Par le corps bieu, Tu me contes de grans matieres.

#### PREMIER

Quand les petites vilotieres
Trouvent quelque hardi Amant,
Qui vueille mettre un Diamant
Devant leurs yeux rians, & vers,
Coac, elles tombent à l'envers.
Tu ris, maudit foit il, qui erre:
C'est la grand' vertu de la pierre
Qui esblouit ainsi les yeux.

Telz dons, telz presens servent mieux, Que beauté, savoir ne prieres: Ilz endorment les chambrieres, Ils ouvrent les portes sermées, Comme s'elles estoient charmées, Ilz sont aveugles ceux qui voyent, Et taire les Chiens, qui aboyent: Ne me croy tu pas?

SECOND

Si fais, si.

Mais de la tienne, Dieu mercy, Compagnon tu ne m'en dis rien.

PREMIER

Et que veux tu? ell' m'ayme bien, Je n'ay que faire de m'en plaindre.

SECOND

Il est vray: mais si peult on feindre Aucunes sois une amitié. Qui n'est pas si grand' la moytié, Comme on la demonstre par signes.

PREMIER

Ouy bien quant aux femmes fines: Mais la mienne en si grand' jeunesse Ne sauroit avoir grand' finesse: Ce n'est qu'un enfant.

SECOND

De quel aage?

PREMIER

De quatorze ans.

SECOND

Ho, voila rage : Elle commence de bonne heure.

#### PREMIER

Tant mieux : elle en fera plus feure, Car avec le temps on sa'ffine.

SECOND

Ouy, elle en fera plus fine. N'est ce pas cela?

PREMIER

Que d'esmoy! Entens, que son amour en moy Croistra tousjours avec les ans.

SECOND

Ne faifons pas tant des plaifans : Par tout il y ha decevance. De quoy la congnois tu?

PREMIER

D'enfance.

D'enfance tout premierement,
La voyois ordinairement:
Car nous estions prochains voisins.
L'Esté luy donnois des raisins.
Des pommes, des prunes, des poires,
Des pois verds, des cerises noires,
Du pain benit, du pain d'espice,
Des eschaudez, de la reglisse,
De bon sucre, & de la dragée.

Et quand elle fut plus aagée, Je luy donnois des beaux bouquets : Un tas de petis affiquets, Qui n'estoient pas de grand'valeur : Quelque ceinture de couleur, Au temps que le Landit venoit. Encor de moy rien ne prenoit, Que devant sa Mere, ou son Pere, Disant, que c'estoit vitupere De prendre rien sans congé d'eux: D'huy à un bon an, ou à deux, Luy donneray & corps, & biens Pour les messer avec les siens, Et à son gré en disposer.

SECOND

Tu l'aymes donc pour l'espouser?

PREMIER

Ouy, car je fay feurement,
Que ceux, qui ayment autrement,
Sont voluntiers tous marmiteux:
L'un est faché, l'autre est piteux:
L'un brule & ard, l'autre est transi:
Qu'ay je que faire d'estre ainsi?
Ainsi comme j'ayme mamie,
Cinq, six, sept heures, & demie
L'entretiendray, voire dix ans:
Sans avoir peur des mesdisans,
Et sans danger de ma personne.

SECOND

Corps bien ta raison est tresbonne:
Car d'une bonne intention
Ne vient doubte, ne passion:
Mais compagnon je te demande,
Quelle est la matiere plus grande,
Qu'elle t'ha offerte desja?

PREMIER

Ma foy je ne mentiray ja, Je n'ose toucher son teton: Mais je la prens par le menton, Et tout premierement la baise.

#### SECOND

Ventre fainct Gris, que tu es aise Compagnon d'amours!

### PREMIER

Par ce corps, Quand il faut, que j'aille dehors, Si tost qu'elle en est advertie, Et que c'est loing, ma departie La fait plurer comme un oignon.

#### SECOND

Je puisse mourir compagnon,
Je croy, que tu es plus heureux
Cent sois que tu n'es amoureux.
O le grand aise, en quoy tu vis!
Mais pourquoy est ce à ton advis.
Que la mienne m'est si estrange,
Et qu'elle prise moins, que fange,
Ma peine, & moy, & mon pourchas?

# PREMIER

C'est figne que tu ne couchas Encores jamais avec elle.

# SECOND

Corps bieu tu me la bailles belle: J'en devinerois bien autant.
Or si poursuivray-je pourtant
La chaste, que j'ay entreprinse:
Car tant plus on tarde à la prinse,
Tant plus doux en est le repos.

I.

#### PREMIER

Une chanson avec propos N'auroit point trop mauvaise grace : Disons la.

SECOND

La dirons nous graffe De mesme le jour?

PREMIER

Rien quelconques:
Honneur par tout.
Commençons donques.

SECOND

Languir me fais? Content desir?

PREMIER

A telles ne prens point plaifir, Elles fentent trop leurs clamours.

SECOND

Difons donques, Puis qu'en amours : Tu la dis affez volontiers.

PREMIER

Il est vray, mais il fault un tiers. Car elle est composée à trois.

UN QUIDAM

Messieurs, s'il vous plaist, que j'y sois, Je serviray d'enfant de chœur : Car je la say toute par cueur, Il ne s'en fault pas une note.

SECOND

Bien venu par fainte Penote, Sois mignon le bien arrivé. Luy siet-il bien d'estre privé! Chantez vous clair?

QUIDAM

Comme layton:
Baillez moy feulement le ton,
Et vous verrez, si je l'entens.
Puis qu'en amours, ha si beau passetemps.

# EGLOGUE AU ROY

Sous les noms de Pan, & Robin.

Un Pastoreau, qui Robin s'appelloit,
Tout à par soy n'ha gueres s'en alloit
Parmy fausteaux (arbres qui font ombrage)
Et là tout seul faisoit de grand courage
Haut retentir les boys, & l'ayr serain,
Chantant ainsi: ô Pan Dieu souverain,
Qui de garder ne sus onc paresseux
Parcs, & Brebis, & les maistres d'iceux,
Et remets sus tous gentils Pastoreaux,
Quand il n'ont Prez, ne loges, ne Toreaux,
Je te supply (si onc en ces bas estres
Daignas ouyr chansonnettes champestres)
Escoute un peu, de ton verd cabinet,
Le chant rural du petit Robinet.

Sur le printemps de ma jeunesse folle, Je ressemblois l'Arondelle, qui volle. Puis ça, puis là : l'aage me conduisoit Sans peur, ne soing, où le cueur me disoit. En la forest (sans la crainte des Loups)
Je m'en allois souvent cueillir le houx,
Pour faire gluz à prendre oyseaux ramages,
Tous differens de chants, & de plumages:
Ou me solois (pour les prendre) entremettre
A faire brics, ou cages pour les mettre
Ou transnouoys les rivieres prosondes,
Ou rensorçois sur le genoil les sondes,
Puis d'en tirer droit, & loing, j'apprenois
Pour chasser Loups, & abbatre des noix.

O quantes fois aux arbres grimpé j'ay, Pour desnicher ou la Pie, ou le Geay, Ou pour jetter des fruits ja meurs, & beaux A mes compaings, qui tendoyent leurs chapeaux

Aucunes fois aux montagnes alloye, Aucunes fois aux fosses devalloye, Pour trouver là les gistes des Fouines: Des Herissons, ou des blanches Hermines: Ou pas à pas le loing des buissonnets Allois cherchant les nids des Chardonnets, Ou des Serins, des Pinsons, ou Lynottes.

Desja pourtant je faisois quelques nottes De chant rustique, & dessous les Ormeaux Quasi enfant sonnois des chalumeaux. Si ne saurois bien dire, ne penser, Qui m'enseigna si tost d'y commencer : Ou la nature aux Muses inclinée, Ou ma fortune, en cela destinée A te servir : si ce ne sut l'un d'eux, Je suis certain, que ce surent tous deux.

Ce que voyant le beau Janot mon pere, Voulut gager à Jaquet son compere, Contre un veau gras, deux Aignelets bessons,

Que quelque jour je ferois des chansons A ta louange (ô Pan Dieu tressacré) Voire chansons qui te viendroient à gré, Et me souvient que bien souvent aux festes En regardant de loing paistre nos bestes, Il me fouloit une leçon donner, Pour doucement la Musette entonner : Ou à ditter quelque chanson ruralle Pour la chanter en mode pastouralle. Aussi le soir, que les troupeaux espars Estoient ferrez & remis en leurs parcs, Le bon vieillard aprés moy travailloit, Et à la lampe affez tard me veilloit, Ainsi que font leurs Sansonnets, ou Pies Auprés du feu bergeres accroupies. Bien est il vray, que ce, luy estoit peine. Mais de plaisir elle estoit si fort pleine, Qu'en ce faysant sembloit au bon berger, Qu'il arroufoit en fon petit verger Quelque jeune Ente, ou que teter faisoit L'aigneau qui plus en son parc luy plaisoit : Et le labeur qu'apres moy il meit tant, Certes c'estoit à fin qu'en l'imitant, A l'advenir je chantasse le loz De toy (ô Pan) qui augmentas fon cloz, Qui confervas de ses Prez la verdure, Et qui gardas son troupeau de froidure. Pan (disoit-il) c'est le Dieu triomphant

Sur les Pasteurs, c'est celuy, mon enfant) Qui le premier les Roseaux pertuisa, Et d'en former des flutes s'advisa. Il daigne bien luy mesme peine prendre D'user de l'art, que je te veux apprendre. Appren le donc : à fin que Monts, & Bois, Rocs, & Estangs, apprennent souz ta voix A rechanter le haut nom apres toy De ce grand Dieu que tant je ramentoy : Car c'est celuy, par qui soisonnera Ton champ, ta vigne, & qui te donnera Plaisante loge entre sacrez ruisseaux Encortinez de flairans arbrisseaux.

Là d'un costé auras la grand' cloture De saulx espaiz : ou pour prendre pasture Mouches à miel la sleur succer iront, Et d'un doux bruit souvent t'endormiront : Mesmes alors que ta slute champestre Par trop chanter lasse sentre.

Puis tost apres sur le prochain bosquet : T'esveillera la Pie en son caquet : T'esveillera aussi la Colombelle, Pour rechanter encores de plus belle. Ainsi soingneux de mon bien me parloit Le bon Janot, & il ne m'en chaloit : Car soucy lors n'avois en mon courage D'aucun bestail, ne d'aucun pasturage.

Quand printemps faut, & l'esté comparoist, Adonques l'herbe en forme, & force, croist. Aussi quand hors du printemps j'euz esté, Et que mes jours vindrent en leur esté, Me creut le sens, mais non pas le soucy : Si employay l'esprit, le corps aussi Aux choses plus à tel aage fortables, A charpenter loges de bois portables, A les rouler de l'un en l'autre lieu, A y semer la jonchée au mylieu, A radouber treilles, buyssons & hayes,

A proprement entrelasser les clayes, Pour les parquets des ovailles fermer, Ou à tissir (pour fromages former) Paniers d'osser, et siscelles de jonc, Dont je soulois, car je l'aymois adonc, Faire present à Heleine la blonde.

J'apprins les noms des quatre parts du monde, J'apprins les noms des vents, qui de là fortent. Leurs qualitez, & quel temps ils apportent: Dont les oyfeaux fages devins des champs M'advertiffoyent par leurs volz, & leurs chants.

J'apprins austi allant aux pasturages A éviter les dangereux herbages, Et à congnoistre & guerir plusieurs maux, Qui quelque fois gastoient les animaux De noz pastis: mais par sur toutes choses, D'autant que plus plaisent les blanches Roses, Que l'Aubespin, plus j'aymois à sonner De la Musette, & la feis resonner. En tous les tons, & chants de Bucoliques, En chants piteux, en chants melancholiques, Si qu'à mes pleints un jour les Oreades, Faunes, Sylvans, Satyres, & Dryades. En m'escoutant jetterent larmes d'veux : Si feirent bien les plus fouverains Dieux, Si feit Margot bergere, qui tant vaut : Mais d'un tel pleur esbahir ne se faut, Car je fayfois chanter à ma Musette La mort, helas, la mort de Loisette, Qui maintenant au Ciel prend ses esbats A voir encor fes troupeaux icy bas.

Une autre fois, pour l'Amour de l'Amie, A tous venans pendy la challemie, Et ce jour là, à grand peine on favoit, Lequel des deux gaigné le pris avoit, Ou de Merlin, ou de moy : dont à l'heure Thony s'en vint fur le pré grand' alleure Nous accorder, & orna deux Houlettes D'une longueur, de force violettes : Puis nous en feit present pour son plaisir : Mais à Merlin je baillay à choisir.

Et penses-tu, ô Pan Dieu debonnaire, Que l'exercice, & labeur ordinaire, Que pour sonner le Flajolet je pris, Fust seulement pour emporter le pris? Non: mais à sin que si bien j'en apprinsse, Que toy qui es des Pastoureaux le Prince, Prinsses plaisir à mon chant escouter, Comme à ouyr la marinne flotter Contre la rive, ou des Roches hautaines Ouyr tomber contre val les Fontaines.

Certainement c'estoit le plus grand soing, Que j'eusse allors, & en prens à tesmoing Le blond Phebus, qui me void, & regarde, Si l'espesseur de ce bois ne l'engarde: Et qui m'a veu traverser maint Rocher, Et maint Torrent pour de toy approcher.

Or m'ont les Dieux celestes et terrestres Tant sait heureux mesmement les sylvestres, Qu'en gré tu prins mes petis sons rustiques, Et exauls as mes Hymnes, & Cantiques, Me permettant les chanter en ton Temple, Là où encor l'image je contemple De ta hauteur, qui en l'une main porte De dur Cormier Houlette riche, & sorte: Et l'autre tient Chalemel le sournie De fept tuyaux, faits felon l'harmonie Des cieux, où font les fept Dieux clers, & hauts. Et denotant les fept Arts liberaux, Qui font escrits dedans ta teste fainte, Toute de Pin bien couronnée, & ceinte,

Ainsi, & donc, en l'esté de mes jours
Plus me plaisoit aux Champestres sejours
Avoir fait chose (ô Pan) qui t'aggreast,
Ou qui l'oreille un peu te recreast,
Qu'avoir autant de Moutons, que Tityre:
Et plus (cent sois) me plaisoit d'ouyr dire,
Pan fait bon œil à Robin le berger,
Que voir chez nous trois cens Bœuss heberger:
Car soucy lors n'avois en mon courage,
D'aucun bestail, ne d'aucun pasturage.

Mais maintenant, que je fuis en l'Autonne, Ne say quel Soing inusité m'estonne, De tell' façon, que de chanter la veine Devient en moy (non point lasse, ne vaine) Ains trifte, & lente, & certes bien fouvent Couche sur l'herbe, à la frescheur du vent, Voy ma Musette à un arbre pendue Se plaindre à moy, qu'oisive l'ai rendue : Dont tout à coup mon desir se resveille, Qui de chanter voulant faire merveille, Trouve ce Soing devant ses yeux planté, Lequel le rend morne, & espouventé : Car tant est Soing basanné, laid, & pasle, Qu'à fon regard la Muse pastorale, Voire la Muse heroïque, & hardie En un moment se trouve refroidie. Et devant luy vont fuyant toutes deux, Comme Brebis devant un Loup hydeux.

J'oy d'autre part le Pyvert jargonner, Siffler l'Escousse, & le Buttor tonner, Voy l'Estorneau, le Heron, & l'Aronde Estrangement voller tout à la ronde, M'advertissans de la froyde venue Du triste hyver, qui la terre desnue.

D'autre costé, j'oy la Bise arriver, Qui en soufflant me prononce l'hyver: Dont mes troupeaux cela craingnans, & pis, Tous en un tas se tiennent accroupis: Et diroit-on, à les ouyr beller, Qu'avecques moy te veulent appeller A leur secours, & qu'ilz ont congnoissance, Que tu les as nourris dés leur naissance.

Je ne quiers pas (ô bonté fouveraine)
Deux mille arpents de pastis en Touraine,
Ne mille bœufs errants par les berbis
Des monts d'Auvergne, ou autant de brebis:
Il me sussit, que mon troupeau preserves
Des Loups, des Ours, des Lyons, des Loucerves
Et moy du froid, car l'hyver, qui s'appreste,
A commencé à neiger sur ma teste.

Lors à chanter plus Soing ne me nuira, Ains devant moy plus vifte s'enfuyra, Que devant luy ne vont fuyant les Mufes, Quand il verra, que de faveur tu m'ufes. Lors ma Mufette à un chefne pendue, Par moy fera promptement descendue, Et chanteray l'hyver à seureté Plus haut & cler que ne seis onc l'esté.

Lors en science, en musique, & en son Un de mes Vers vaudra une Chanson, Une Chanson, une Eglogue rustique, Et une Eglogue, une œuvre Bucolique.

Que diray plus? vienne ce qui pourra. Plustost le Rosne encontremont courra, Plustost feront hautes Forestz sans branches, Les Cygnes noirs, & les Corneilles blanches, Que je t'oublie (ô Pan de grand renom) Ne que je cesse à louer ton haut nom.

Sus mes brebis, troupeau petit, & maigre Autour de moy fautez de cueur allaigre, Car desia Pan, de sa verte maison, M'ha sait ce bien d'ouyr mon oraison.

# L'ENFER

Comme douleurs de nouvel amassées
Font souvenir des liesses passées:
Ainsi plaisir de nouvel amassé
Fait souvenir du mal, qui est passé.

Je dy cecy, mes trefchers Freres, pource Que l'amitié, la chere non rebourse, Les passetemps & consolations, Que je reçoy par visitations En la prison claire, & nette de Chartres, Me font recors des tenebreuses chartres, Du grand chagrin, & recueil ord, & laid, Que je trouvay dedans le Chastelet.

Si ne croy pas, qu'il y ayt chose au monde, Qui mieux ressemble un Enser tressemmonde : Je dy, Enser, & Enser puis bien dire : Si l'allez voir, encor le verrez pire, Aller helas! ne vous y vueillez mettre:
J'ayme trop mieux le vous descrire en metre,
Que pour le voir aucun de vous soit mis
En telle peine. Escoutez donc Amis.

Bien avez leu, fans qu'il s'en faille un a, Comme je fus par l'instinct de Luna Mené au lieu plus mal sentant, que soulfre Par cinq ou six ministres de ce goussre: Dont le plus gros jusques là me transporte.

Si rencontray Cerberus à la porte :
Lequel dressa ses trois testes en haut,
A tout le moins une, qui trois en vaut.
Lors de travers me void ce Chien poussif,
Puis m'ha ouvert un huys gros & massif :
Duquel l'entrée est si estroite & basse,
Que pour entrer fallut que me courbasse,

Mais ains, que fusse entré au goussire noir, Je voy à part un autre vieil manoir Tout plein de gens, de bruit, & de tumulte : Parquoy avec ma Guide je consulte, En luy disant : Dy moy, s'il t'en souvient, D'ou, & de qui, & pourquoy ce bruit vient.

Si me respond: Sans croire le rebours, Scache qu'icy sont d'Enfer les faubourgs, Ou bien souvent s'esleve ceste feste. Laquelle sort plus rude que tempeste, De l'estomac de ces gens, que tu vois: Qui sans cesser se rompent teste, & voix Pour appointer saux & chetifz Humains, Qui ont debat, & debat ont eu maints.

Haut devant eux le grand Minos fe fied, Qui fur leurs dits fes fentences affied. C'est luy qui juge, ou condemne, ou deffend, Ou taire fait, quand la teste luy fend.

Là les plus grans les plus petis destruisent : Là les petits peu, ou point, aux grans nuisent : Là trouve lon façon de prolonger. Ce qui se doit, & se peult abreger : Là fans argent povreté n'ha raison : Là se destruit mainte bonne maison : Là biens sans causes se despendent : Là les causeurs les causes s'entrevendent : Là en public on manifeste, & dit La mauvaistié de ce monde maudit, Qui ne fauroit fouz bonne conscience Vivre deux jours en paix, & patience: Dont j'ay grand joye avecques ces mordans. Et tant plus font les hommes discordans, Plus à difcord efmouvons leurs courages Pour le proufit, que vient de leurs dommages : Car s'on vivoit en paix, comme est mestier, Rien ne vaudroit de ce lieu le mestier : Pource qu'il est de foy si anormal, Qu'il faut expres qu'il commence par mal, Et que quelcun à quelque autre mefface, Avant que nul jamais proufit en face.

Bref, en ce lieu ne gagnerions deux pommes Si ce n'estoit la mauvaistié des hommes. Mais par Pluton le Dieu, que dois nommer, Mourir de saim ne faurions, ne chommer : Car tant de gens, qui en ce parc s'assaillent, Assez, & trop de besongne nous taillent : Assez pour nous, quand les biens nous en viennent, Et trop pour eux, quand povres en deviennent. Ce nonobstant, ô nouveau prisonnier, Il est besoing de pres les manier : Il est besoing (croy moy) & par leur faute, Que dessus eux on tienne la main haute: Ou autrement les bons bonté fuiroyent, Et les mauvais en empirant iroyent.

Encor (pour vray) mettre on n'y peut tel ordre Que tousjours l'un l'autre ne vueille mordre: Dont raifon veult, qu'ainfi on les embarre. Et qu'entre deux, foit mis distance, & barre, Comme aux chevaux, en l'estable hargneux,

Minos le Juge est de cela soingneux, Qui devant luy, pour entendre le cas, Fait deschiffrer telz noysifs altercas Par ces crieurs: dont l'un soustient tout droit, Droit contre tort: l'autre tort contre droit: Et bien souvent par cautelle subtile Tort bien mené rend bon droit inutile.

Prens y efgard, & entens leurs propos: Tu ne vis onc si differens supposts. Approche toy pour de plus pres le voir, Regarde bien : je te fais affavoir. Que ce Mordant, que l'on oyt si fort bruire; De corps, & biens veult fon prochain destruire. Ce grand criart, qui tant la gueule tort, Pour le grand gain tient du riche le tort. Ce bon vieillard (sans prendre or, ou argent) Maintient le droit de mainte povre gent. Celuy qui parle illec fans s'esclatter, Le juge assis veult corrompre et slatter. Et cestuy là, qui sa teste descœuvre, En plaiderie ha fait un grand chef d'œuvre : Car il a tout destruit son parentage Dont il est craint, et prifé davantage : Et bienheureux celuy se peult tenir,

Duquel il veult la cause soustenir.

Amy, voila quelque peu des menées, Qui aux foubourgs d'Enfer font demenées, Par noz grans Loups ravissans, & famis, Qui ayment plus cent fols, que cent amis: Et dont pour vray le moindre & le plus neut, Trouveroit bien à tondre fur un œuf.

Mais puis que tant de curiofité Te meut à voir la fumptuosité De doz manoirs : ce que tu ne vis onques, Te feray voir. Or faches, Amy, donques Qu'en cestuy parc, où ton regard espands, Une maniere il y ha de Serpents Qui de petis viennent grans & felons, Non point volans: mais trainans, & bien longs: Et ne font pas pourtant Couleuvres froides, Ne verds Lezards, ne Dragons forts, & roides: Et ne font pas Cocodrilles infects, Ne Scorpions tortuz, & contrefaits: Ce ne font pas Vipereaux furieux, Ne Bafilics tuans les gens des yeux : Ce ne font pas mortiferes Aspics, Mais ce font bien Serpents, qui valent pis.

Ce font Serpents enflez, envenimez,
Mordants, maudits, ardans, & animez,
Jettans un feu, qu'à peine on peult esteindre,
Et en piquant dangereux à l'atteindre.
Car qui en est piqué, ou offensé,
En fin demeure chetif, ou insensé:
C'est la nature au Serpent plein d'exces,
Qui par son nom est appellé Proces.
Tel est son nom, qui est de mort une ombre:
Regarde un peu, en voyla un grand nombre

De gros, de grans, de moyens, et de gresles, Plus mal faisans, que tempeste, ne gresles.

Celuv, qui jette ainsi feu à planté, Veult enflammer quelque grand' parenté: Celuy qui tire ainsi hors sa languette, Destruira bref quelcun, s'il ne s'en guette : Celuv, qui siffle, & ha les dens si drues, Mordra quelcun, qui en courra les rues : Et ce froid la, qui lentement se traine, Par fon venin ha bien sceu mettre haine Entre la mere, & les mauvais enfans : Car Serpents froids font les plus eschaufans : Et de tous ceux qui en ce parc habitent, Les nouveaux nays, qui s'enflent, & despitent, Sont plus subjetz à engendrer icy, Que les plus vieux. Voire, & qu'il foit ainsi, Ce vieil serpent sera tantost crevé, Combien qu'il ayt maint lignage grevé. Et cestuy là plus antique, qu'un Roc, Pour reposer s'est perdu à un croc. Mais ce petit plus mordant, qu'une Louve, Dix grans Serpens dessous fa pance couve : Deflous sa pance il en couve dix grans, Qui quelque jour feront plus denigrans Honneurs, & biens, que cil, qui les couva: Et pour un feul, qui meurt, ou qui s'en va, En viennent sept. Donc ne faut s'estonner: Car pour du cas la preuve te donner, Tu dois favoir, qu'issues sont ces bestes Du grand Serpent Hydra, qui eut sept testes : Contre lequel Hercules combatoit, Et quand de luy une teste abbatoit, Pour une morte en revenoient fept vives.

Ainsi est-il de ces bestes noisives.
Ceste nature ilz tiennent de la race
Du grand Hydra, qui au prosond de Thrace,
Où il n'y ha, que guerres & contends
Les engendra dès l'aage, & des le temps
Du faux Cain. Et si tu quiers raison,
Pourquoy proces sont si fort en saison:
Sache, que c'est saute de charité
Entre Chrestiens. Et à la vérité,
Comment l'auront dedans leur cueur sichée,
Quand partout est si froidement preschée?

A escouter vos prescheurs bien souvent, Chapitre n'est, que donner au Couvent. Pas ne diront, combien Proces differe Au vray Chrestien, qui de tous se dit frere. Pas ne diront, qu'impossible leur semble, D'estre Chrestien & plaideur tout ensemble. Ainçois feront eux mesmes à plaider Le plus ardans. Et à bien regarder, Vous ne vallez de guere mieux au Monde, Qu'en nostre Enfer, où toute horreur abonde. Donques, Amy, ne t'esbahi, comment Sergens, Proces, vivent fi longuement : Car bien nourriz sont du laict de la Lisse, Qui nommée est du Monde la malice, Tousjours les ha la Louve entretenus, Et pres du cueur de son ventre tenus. Mais si ne veux-je à ses faits contredire : Car c'est ma vie. Or plus ne t'en veux dire : Passe cest huis barré de puissant fer.

A tant se teut le Ministre d'Enser, De qui les mots voluntiers escoutoye : Point ne me laisse, ains me tient & costoye, Tant qu'il m'eust mis (pour mieux estre à couvert Dedans le lieu par Cerberus ouvert, Où plusieurs cas me furent ramentus : Car lors allay devant Rhadamanthus Par un degré fort vieil, obscur, & sale.

Pour abreger, je trouve en une falle Rhadamanthus (Juge assis à son aise)
Plus enslammé, qu'une ardante sournaise,
Les yeux ouverts, les oreilles bien grandes,
Fier en parler, cauteleux en demandes,
Rebarbatis, quand son cueur il descharge:
Bres, digne d'estre aux Ensers en sa charge.
Là devant luy vient mainte Ame damnée:
Et quand il dit, telle me soit menée:
A ce seul mot un gros marteau carré
Frappe tel coup contre un portal barré,
Ou'il sait croler les tours du lieu insame.

Lors à ce bruit, là bas n'y ha povre Ame, Qui ne fremisse, & de frayeur ne tremble, Ainsi qu'au vent fueille de Chesne, ou Tremble: Car la plus seure ha bien crainte, & grand peur De se trouver devant tel attrapeur: Mais un Ministre appelle, & nomme celle, Que veult le Juge. Adonques s'avance elle, Et s'y en va tremblant, morne, & pallie.

Dès qu'il la void il mitigue & pallie
Son parler aigre : & en feinte douceur
Luy dit ainsi : Viença, fay moy tout feur,
Je te suppli, d'un tel crime & forfait,
Je croirois bien, que tu ne l'as point fait,
Car ton maintien n'est, que des plus gaillards :
Mais je veux bien congnoistre ces paillards,
Qui avec toy seirent si chaude esmorche.

Dy hardiment: as-tu peur qu'on t'escorche? Quand tu diras qui ha fait le peché, Plustost seras de noz mains depesché. De quoy te sert la bouche tant fermée. Fors de tenir ta personne enfermée? Si tu dis vray, je te jure, & promets Par le hault Ciel, où je n'iray jamais, Que des Enfers fortiras les brifées, Pour t'en aller aux beaux Champs Elysées, Où liberté fait vivre les esprits. Qui de conter verité ont appris, Vaut-il pas mieux donques, que tu la contes, Que d'endurer mille peines, & hontes? Certes si fait. Aussi je ne crov mie, Que fois menteur, car ta physionomie Ne le dit point : & de mauvais affaire Seroit celuy, qui te voudroit meffaire. Dy moy, n'ays peur. Tous ces mots allechans Font fouvenir de l'oyfeleur des champs, Qui doucement fait chanter fon sublet, Pour prendre au bric l'oyfeau nice, & foiblet, Lequel languit, ou meurt à la pippée : Ainsi en est la povre Ame grippée. Si tel' douceur luy fait rien confesser, Rhadamanthus la fait pendre, ou fesser : Mais si la langue elle refraind, & mord, Souventefois eschappe peine, & mort. Ce nonobstant, si tost qu'il vient à voir. Que par douceur il ne la peult avoir, Aucune fois encontre elle il s'irrite. Et de ce pas selon le demerite, Qu'il fent en elle, il vous la fait plonger

Au fons d'Enfer : où luy fait alonger

Veines, & nerfs: & par tourment s'efforce' A esprouver s'elle dira par force. Ce, que douceur n'ha sceu d'elle tirer.

O chers Amis, j'en ay veu martyrer, Tant que pitié m'en mettoit en esmoy. Parquoy vous pry de pleindre avecques moy Les innocens, qui en telz lieux damnables Tiennent souvent la place des coulpables

Et vous enfans suyvans mauvaise vie
Retirez vous: ayez au cueur envie
De vivre autant en saçon estimée,
Qu'avez vescu en saçon deprimée.
Quand le bon trein un peu esprouverez,
Plus doux, que l'autre en sin le trouverez,
Si que par bien le mal sera vaincu,
Et du regret d'avoir si mal vescu
Devant les yeux vous viendra honte honneste,
Et n'en haïrrez cil, qui vous admonneste:
Pource qu'alors ayans discretion
Vous vous verrez hors la subjection
Des infernaux, et de leurs entresaites:
Car pour les bons les Loix ne sont point saites.

Venons au poinct. Ce Juge tant divers Un fier regard me jetta de travers, Tenant un port trop plus cruel que brave. Et d'un accent imperatif, & grave Me demandant ma naiffance, & mon nom, Et mon estat : Juge de grand renom, Respons-je alors, à bon droit tu poursuis Que je te die orendroit, que je suis : Car incongnu suis des ombres iniques, Incongnu suis des Ames Plutoniques, Et de tous ceux de ceste obscure voye,

Ou pour certain jamais entré n'avoye :
Mais bien congnu fuis des ombres celiques,
Bien congnu fuis des ombres Angeliques.
Et de tous ceux de la trefclaire voye,
Ou Juppiter les defvoyés avoye :
Bien me congnut, & bien me guerdonna,
Lors qu'à fa fœur Pallas il me donna :
Je dy Pallas la fi fage & fi belle
Bien me congnoit la prudente Cybelle,
Mere du grand Juppiter amiable.
Quant à Luna diverse & variable,
Trop me congnoit son faux cueur odieux.

En la mer fuis congnu des plus hauts Dieux, Jusqu'aux Tritons, et jusque aux Nereïdes : En terre aussi des Faunes, & Hymnides Congnu je fuis. Congnu je fuis d'Orphée, De mainte Nymphe. & mainte noble Fée. Du gentil Pan, qui les flutes manie : D'Egle, qui danse au ton de l'harmonie, Quand elle void les Satyres fuyvans : De Galatée, & de tous les fervans, Jusqu'à Tityre, & ses Brebis camuses : Mais par fus tout fuis congnu des neuf Muses, Et d'Apollo, Mercure & tous leurs filz En vraye amour, & science confits. Ce font ceux là (Juge) qui en brefs jours Me mettront hors de tes obscurs sejours, Et qui pour vrav de mon ennuv se deulent. Mais puis qu'Envie, & ma fortune veulent, Que congnu sois, & saisi de tes laqs, Sache de vray, puis que demandé l'as, Que mon droit nom je ne te veux point taire : Si t'adverty, qu'il est à toy contraire,

Comme eau liquide au plus fec element:
Car tu es rude, & mon nom est Clement:
Et pour monstrer, qu'à grand tort on me triste,
Clement n'est point le nom de lutheriste;
Ains est le nom (à bien l'interpreter)
Du plus contraire ennemy de Luther:
C'est le fainct nom du Pape, qui accosse
Les chiens d'Enfer (s'il luy plaist) d'une estolle.
Le crains-tu point? C'est celuy, qui afferme,
Qu'il ouvre Enfer, quand il veult, & le serme:
Celuy, qui peult en seu chaud martyrer
Cent mille esprits, ou les en retirer.

Quand au furnom, aussi vray qu'Evangile, Il tire à cil du Poëte Virgile, Jadis chery de Mecenas à Romme:
Maro s'appelle & Marot je me nomme:
Marot je suis, & Maro ne suis pas,
Il n'en sut onc depuis le sien trespas:
Mais puis qu'avons un vray Mecenas ores,
Quelque Maro nous pourrons voir encores

Et d'autre part (dont noz jours font heureux)
Le beau verger des lettres plantureux
Nous reproduit ses fleurs & grans jonchées
Par cy devant flaitries, & sechées
Par le froid vent d'ignorance, & sa tourbe,
Qui haut savoir persecute, & destourbe:
Et qui de cueur est si dure, ou si tendre,
Que vérité ne veult, ou peult entendre.
O Roy heureux, sous lequel sont entrez
(Presque periz) les Lettres, & Lettrez!

Entens aprés (quant au poinét de mon estre) Que vers Mydi les hauts Dieux m'ont fait naistre, Ou le Soleil non trop excessif est : Parquoy la Terre avec honneurs s'y vest De mille fruits, de mainte sleur, & plante : Bacchus aussi sa bonne vigne y plante Par art subtil sur montagnes pierreuses Rendans liqueurs fortes, & savoureuses. Mainte fontaine y murmure & ondoye, Et en tout temps le Laurier y verdoye Pres de la vigne : ainsi comme dessus Le double mont des Muses Parnassus : Dont s'esbahit la mienne santasse, Que plus d'esprits de noble Poesse N'en sont yssuz. Au lieu que je déclaire, Le sleuve Lot coule son eau peu claire, Qui maints rochers traverse & environne, Pour s'aller joindre audroit fil de Garonne.

A bref parler, c'est Cahors en Quercy,
Que je laissay pour venir querre icy
Mille malheurs: ausquelz ma destinée
M'avoit submis. Car une matinée
N'ayant dix ans en France sus mené:
Là où depuis me suis tant pourmené,
Que j'oubliay ma langue maternelle,
Et grossement apprins la paternelle,
Langue Françoise es grands Cours estimée:
Laquelle en sin quelque peu s'est limée.
Suyvant le Roy François premier du nom,
Dont le savoir excede le renom.

C'est le seul bien, que j'ay acquis en France Depuis vingt ans en labeur, & soussrance. Fortune m'ha entre mille malheurs Donné ce bien de mondaines valeurs Que dis-je las? ô parole soudaine C'est don de Dieu, non point valeur mondaine: Rien n'ay acquis des valeurs de ce Monde, Qu'une Maistresse, en qui git, & abonde Plus de savoir, parlant, & escrivant, Qu'en autre semme en ce Monde vivant. C'est du franc Lys l'issue Marguerite, Grande sur terre, envers le Ciel petite : C'est la Princesse à l'esprit inspiré, Au cueur eslu, qui de Dieu est tiré Mieux (& m'en crois) que le festu de l'Ambre : Et d'elle suis l'humble Vallet de chambre. C'est mon estat. O Juge Plutonique : Le Roy des Francs, dont elle est sœur unique, M'ha fait ce bien : & quelque jour viendra, Que la sœur mesme au frere me rendra.

Or fuis-je loing de ma Dame, & Princesse, Et pres d'ennuv, d'infortune, & destresse. Or fuis-je loing de sa tresclere face. S'elle fust pres (ô cruel) ton audace Pas ne se fust mise en effort de prendre Son ferviteur, qu'on n'ha point veu mesprendre: Mais tu vois bien (dont je lamente, & pleure) Qu'elle s'en va (helas) & je demeure Avec Pluton, & Charon nautonnier: Elle va veoir un plus grand prisonnier. Sa noble mere ores elle accompagne Pour retirer nostre Roy hors d'Espagne, Que je souhaitte en ceste compagnie Avec ta laide, & obscure mefgnie: Car ta prison liberté luy seroit, Et, comme Christ, les Ames poulseroit Hors des Enfers, fans t'en laisser un ombre : A' ton advis ferois-je point du nombre : S'ainsi estoit, & la Mere, & la Fille

Retourneroient, fans qu'Espagne, & Castille D'elles receust les Filz au lieu du Pere.

Mais quand je pense à si grand impropere, Qu'est il besoing que soye en liberté, Puis qu'en prison mon Roy est arresté? Qu'est de besoing qu'ores je sois sans peine, Puis que d'ennuy ma maistresse est si pleine? Ainsi (peu pres) au Juge devisay, Et en parlant un Grisson j'advisay, Qui de sa croche, & ravissante pate Escrivoit là l'an, le jour, & la date De ma prison: & ce, qui pouvoit duire A leur propos, pour me facher, & nuire: Et ne sceut onc bien orthographier Ce qui servoit à me justifier.

Certes, amis, qui cherchez mon recours, La coustume est des infernales Cours, Si quelque esprit de gentile nature Vient là dedans tesmoingner d'adventure Aucuns propos, ou movens, ou manieres Justifians les Ames prisonnieres, Il ne fera des Juges escouté, Mais lourdement de fon dict rebouté : Et escouter on ne refusera L'esprit maling, qui les accusera : Si que celuy, qui plus fera d'encombres Par fes rapports, aux malheureuses Ombres. Plus recevra de recueil, & pecunes : Et si tant peult en accuser aucunes, Qu'elles en foient pendues, ou brûlées, Les infernaux feront fauts, & hullées, Cheines de fer, & crochets sonneront, Et de grand jove ensemble tonneront

En faifant feu de flamme sulphurée, Pour la nouvelle ouyr tant malheurée.

Le Griffon donc en fon Livre doubla De mes propos ce que bon luy fembla: Puis se leva Rhadamanthus du siege, Qui remener me seit au bas colliege Des malheureux par la voye, ou je vins. Si les trouvay à milliers, & à vingts: Et avec eux sey un temps demeurance, Faché d'ennuy, consolé d'esperance.





# ELEGIES

# ELEGIE I



uand j'entreprins t'escrire ceste lettre Avant qu'un mot à mon gré sçeusse metre En cent saçons elle sut commencée: Plustost escrite, & plustost essacée: Soudain sermée, & tout soudain desclose,

Craignant avoir oublié quelque chose,
Ou d'avoir mis aucun mot à refaire:
Et brevement, je ne savois que faire
De l'envoyer vers toy (mon reconfort)
Car (pour certain) Doubte advertissoit fort
Le mien esprit de ne la commencer,
Ne devers toy en chemin l'advancer.

Incessamment venoit Doubte me dire, Homme abusé, que veux-tu plus escrire? Tous tes escritz envoyez à fiance, Sont mis au sons du cossre d'Oubliance. N'as-tu point d'yeux? ne voy tu pas, que celle, Ou tu escris, ses nouvelles te celle? Si tes envoys luy sussent agreables, Elle t'eust fait responses amiables, Croy moy, Amy, que les choses peu plaisent, Quand on les void, si les voyans se taisent.

Ainsi disoit Doubte pleine d'esmoy:
Mais Ferme amour, qui estoit avec moy,
Me dit (Amant) il faut, que tu t'asseures:
Te convient il doubter en choses seures?
Sais tu pas bien, qu'en cueur de noble Dame
Loger ne peult Ingratitude infame?
S'elle ha de toy quelque escrit apperceu,
Croy, qu'à grand joye aura esté receu,
Leu, & releu, baisé, & rebaisé,
Puis mis à part, comme un thresor prisé.

Et si pour toy ne met lettres en voye,
Crainte ne veult, que vers toy les envoye:
Car bien souvent lettres, & messagers
Les Dames sont tomber en gros dangers.
Parquy, amy, ne laisse point à prendre
La plume en main, en luy faisant apprendre,
Que quand jamais elle ne t'escriroit,
Ja pour cela t'amour ne periroit,
Si par amour le faits (comme je pense)
Mal n'en viendra, mais plustost recompense:
Pource, que chose estant d'amour venue,
Voluntiers est par amour recongnue.
Recongnoy donc, que celle, ou tu t'addresses,
D'honnesteté congnoit bien les addresses.

Voila comment Amour ferme t'excuse De ce, de quoy Doubte si fort t'accuse : Et m'ont tenu longuement en ce poinct. L'un dit, escry: l'autre dit, n'escry point: Puis l'un m'atrait: puis l'autre me reboute: Mais à la fin Amour ha vaincu Doubte.

Doubte vouloit lier de fa cordelle Ma langue, & main : mais tout en despit d'elle Amour ha fait ma langue desployer, Et ma main dextre à t'escrire employer, Pour t'advertir, que depuis mon depart, Tant de malheurs, dont j'ay receu ma part, Tombez sur nous, n'ont point eu la puissance De te jetter hors de ma congnoissance: Voire & combien, qu'au Camp il n'y eust ame Parlant d'Amours, de Damovfelle, ou Dame, Mais feulement de courfes, & Chevaux, De fang, de feu, de guerre, & de travaux : Ce nonobstant avecques fon contraire, Amour venoit en mon cueur se retraire Par le record, qui de toy n'advenoit. D'autre (pour vray) tant peu me fouvenoit, Que si de toy cela ne fust venu, Certes jamais ne me fust souvenu D'amour, de Dame, ou Damoyfelle aucune : Car tu es tout (quant à mov) & n'es qu'une.

Que diray plus du combat rigoureux? Tu fais assez, que le fort malheureux Tomba du tout sur nostre nation:
Ne fay, si c'est par destination,
Mais tant y ha, que je croy, que fortune Desiroit fort de nous estre importune.

Là fut percé tout outre rudement Le bras de cil, qui t'ayme loyaument : Non pas le bras, dont il ha de coustume De manier ou la lance, ou la plume : Amour encor le te garde, & referve, Et par escrits veult que de loing te serve.

Finalement, avec le Roy mon maistre Delà les monts prisonnier se vid estre Mon trifte corps, navré en grand fouffrance. Quant est du cueur, long temps y ha, qu'en France Ton prisonnier il est sans mesprison. Or est le corps sorti hors de prison : Mais quant au cueur, puisque tu es la garde De sa prison, d'en sortir il n'ha garde : Car tell prison luv semble plus heureuse, Que celle au corps ne sembla rigoureuse : Et trop plus ayme estre serf en tes mains, Qu'en liberté parmy tous les humains. Aussi fut prins maint Rov, maint Duc, & Comte En ce conflict, dont je laisse le conte : Car que me vaut d'inventer, & de querre En cas d'Amours tant de propos de guerre? J'en laisseray du tout faire à Espagne, De qui la main en nostre sang se bagne. C'est à ses gens à coucher par histoires D'un style haut Triomphes, & Victoires: Et c'est à nous à coucher par escrits D'un piteux style Infortunes & Cris. Ainfi diront leurs Victoires apertes, Et nous dirons noz malheureuses pertes. Les dire (helas) il vaut trop mieux les taire : Il vaut trop mieux en un lieu folitaire, En champs, ou Bois, pleins d'Arbres, & de Fleurs, Aller ditter les plaifirs, ou les pleurs, Que l'on reçoit de sa Dame cherie. Puis, pour ofter hors du cueur fascherie : Voller en Plaine, & chasser en Forests,

Descoupler Chiens, tendre Toilles, & Rhets. Aucunes fois apres les longues courses Se venir feoir pres des Ruysseaux, & Sources, Et s'endormir au fon de l'eau, qui bruit : Ou escouter la Musique, & le bruit, Des Oyfelets, paints de couleurs estranges. Comme Mallars, Merles, Mauvis, Mefanges, Pinfons, Pivers, Paffes, & Pafferons, En ce plaisir le temps nous passerons : Et n'en fera (ce croy-je) offensé Dieu, Puis que la guerre à l'Amour donne lieu. Mais s'il advient, que la guerre s'esbranle, Lors conviendra danser d'un autre branle : Laisser faudra Bois, Sources, & Ruysseaux: Laisser faudra Chasse, Chiens, & Oyseaux: Laisser faudra d'Amour les petis dons, Pour fuyvre aux champs Estendars, & Guidons: Et lors chacun ses forces reprendra, Et pour l'Amour de s'Amie tendra A recouvrer gloire, honneur & butins, Faifant congnoistre aux Espagnols mutins, Que longuement Fortune variable En un lieu feul ne peult estre amiable, Tant plus les ha Fortune autorifez, Tant moins seront en fin favorisez: Car la Fortune est pour un verre prise, Qui tant plus luit, plus tost se casse, & brise.

Voyla, comment aveques Dieu j'espere, Que nous aurons la Fortune prospere. Si ne say plus, que t'escrire, ou mander, Fors seulement de te recommander Cil qui vers toy ceste lettre transmet: Et si pour luy ta main blanche ne met La plume en œuvre, au moins (quoy qu'il advienne) Fay, que de luy quelque fois te fouvienne.

S'il t'en fouvient, lors que tu trouveras De mes amis, si dure ne seras, A' mon advis, que de moy ne t'enquieres: Et, qui plus est, que tu ne les requieres De t'advertir en quel poinct je me porte: Lors ce seul mot, si on me le rapporte, Allegera la grand douleur des coups, Dont j'ay esté en deux sortes secoux.

Amour ha fait de mon cueur une bute, Et Guerre m'ha navré de haquebute : Le coup du bras le monstre à veuë d'œil : Le coup du cueur se monstre par son deuil : Ce nonobstant celuy du bras s'amende : Celuy du cueur je le te recommande.

#### ELEGIE II

Puis qu'il te faut desloger de ce lieu, Il m'est bien force (helas) de dire Adieu Par escripture au corps, qui s'en ira, Veu que la bouche à peine le dira.
O' quel depart plein de dueil, ou liesse!
Certes, croy moy (ma terrestre Déesse)
Que ton depart ha vertu & pouvoir
De me laisser ou vie, ou desespoir.
Quand ta promesse avant partir tiendras,
En tout plaisse ton amy maintiendras:
Mais si mon cueur ne vient à son entente
A' ce coup cy, je n'y ay plus d'attente:

Et si je pers icelle attente toute, User mes jours en desespoir je doubte.

Pour ton amour j'ay fouffert tant d'ennuis Par tant de jours, & tant de longues nuicts, Qu'il est advis à l'espoir qui me tient, Que desespoir le cours du Ciel retient : A celle fin, que le jour ne s'approche De l'attendue, & desirée approche.

Un an y ha, que par toy commencée
Fut l'amitié: & fachant ta penfée,
Esclave, & serf d'Amour sus arresté,
Ce que devant jamais n'avois esté.
Un an y ha (ou il s'en faut bien peu)
Que par toy suis d'esperance repeu.
O' moys de May pour moy trop sec & maigre!
O' doux accueil tu me seras trop aigre,
Si ma maistresse avant son departir,
En autre goust ne te veult convertir.

S'ainsi n'advient, à tel Moys de l'année, Bien me duira couleur Noire, ou Tannée : A' un tel Moys, qu'on doit danser, & rire, Raison voudra, que d'ennuy je souspire, Veu qu'en ce temps sut faite l'alliance, Dont je perdray la totale siance.

Mais si te plaist, à tel Moys de l'année Ne me duira couleur Noire & Tannée. A' un tel Moys, qu'on doit s'esbatre & rire, Raison voudra, que point je ne souspire, Veu qu'en ce temps sut faite l'alliance, Dont j'obtiendray la totalle siance.

Las s'il t'eust pleu, bien que je l'eusse obtenue Depuis le temps de la tienne venue : Mais je congnoy que ton amour de glace

I.

Pres de mon feu du tout se fond & passe:

Ne me dy point, que peur te fait refraindre,

Je say, que n'as occasion de craindre:

Puis crainte, & peur retarder ne font point

Le cueur d'aucun, quand vraye Amour le point.

Que diray plus? au tour, dont je t'accuse Ne trouveras bien suffisante excuse: Qu'il soit ainsi, plustost huy que demain (Si ton bon sens y veult mettre la main) Maugré Fortune, & tout en despit d'elle, Tu me rendras content, & toy sidelle. Brief, rien n'y faut, sinon que ton plaisir Soit accordant à mon ardant desir.

Or voy-je bien que tu n'as pas envie De me laiffer ton cueur toute ta vie : Car s'ainsi fust, ton Servant allié Par jouyssance eusses desja lié : Veu que souvent tu t'es dite asseurée, Que loyauté auroit en luy durée.

Ce nonobstant quand ton cueur voudras prendre,
Pour t'obeir, je suis prest à le rendre,
Quant est du mien, tu le tiens enserré
En tes prisons, & si n'ha point erré
Que pleust à Dieu, ne t'avoir jamais veue :
Ou, que ma vie encore fust pourveue
De sa franchise : ou que ton propre vueil
Fust resemblant à ton si bel accueil.
Ha, chere Amie, onc jour de mon vivant
Ne me trouvay de tell' sorte escrivant :
Mon sens se trouble, & lourdement rimoie,
Mon cueur se fend, & mon povre œil larmoie
Bien prevoyans qu'apres le tien depart,
Des biens d'Amour ilz n'auront jamais part.

Doncques, avant que partir, te supplie, Qu'envers moy soit ta promesse accomplie, Ne perds l'amy, qui ne t'ha point sorsait: Donne remede au mal que tu as fait. Si tu le fais, bienheureux me tiendray: Si ne le fais, patience prendray. M'esjouissant de voir ma soy promise Mener la tienne en Triomphe submise.

## ELEGIE III

Pus que le jour de mon depart arrive,
C'est bien raison que ma main vous escrive
Ce que ne puis vous dire sans tristesse,
C'est assavoir, or Adieu ma Maistresse.
Donques Adieu ma Maistresse honnorce,
Jusqu'au retour, dont trop la demeurée
Me tardera: toutessois ce pendant
Il vous plaira garder un cueur ardant,
Que je vous laisse au partir pour ostage,
Ne demandant pour luy autre avantage,
Fors, que vueillez contre ceux le dessendre,
Qui par desir voudront sa place prendre.
S'il ha mal fait qu'il en soit hors jetté:

S'il ha mal fait, qu'il en foit hors jetté:
S'il est loyal, qu'il y foit bien traité.
Que pleust à Dieu, qu'en ce cueur peussiez lire,
Vous y pourriez mille choses eslire:
Vous y verriez vostre face au vif painte:
Vous y verriez ma loyauté emprainte:
Vous y verriez vostre nom engravé,

Avec le dueil, qui me tient aggravé
Pour ce depart: & en voyant ma peine
Certes je croy (& ma foy n'est point vaine)
Qu'en souffririez pour le moins la moytié
Par le moyen de la nostre amitié,
Qui veult aussi que la moytié je sente
Du dueil, qu'aurez d'estre de moy absente.

N'ayez donc peur, deffiance, ne doubte Qu'autre jamais hors de mon cueur vous boute. Je suis à vous : & depuis ma naissance Du feu d'Amour n'ay eu tell congnoissance : Car aussi tost, que la Fortune bonne Eut à mes yeux monstré vostre personne, Nouveaux foucis, & nouvelles penfées En mon esprit je trouvay amassées. Tant que (pour vray) mon franc & plein desir, Qui en cent lieux alloit pour son plaisir, En un seul lieu s'arresta tout à l'heure, Et y sera jusques à ce qu'il meure. Oublirez vous donc apres ce depart Ce qui est vostre? helas, quant à ma part, Des que mon œil de loing vous ha perdue, Il me vient dire, ô perfonne esperdue Qu'est devenu ceste claire lumiere, Qui me donnoit liesse coustumiere?

Incontinent d'une voix basse, & sombre Je luy respons, œil, si tu es en l'ombre, Ne t'esbays : le Soleil est caché, Et pour toy est en plein mydi couché : C'est a savoir, ceste face si claire, Qui te souloit tant contenter, & plaire, Est loing de toy. Ainsi mamie, & Dame, Mon œil, & moy sans nul reconsort d'ame

Nous complaingnons, quand vient à vostre absence. En regrettant vostre belle presence.

Et puis j'ay peur, quand de vous je fuis loing. Que cependant Amour ne prenne foing De desbander fes deux aveuglez yeux, Pour contempler les vostres gracieux, Si qu'en voyant chose tant singuliere, Ne prenne en vous amitié familiere, Et qu'il ne m'oste à l'aise, & en un jour, Ce que j'ay eu en peine, & long sejour.

Certainement si bien ferme vous n'estes,
Amour vaincra voz responses honnestes.
Amour est sin, & sa parole farde,
Pour mieux tromper: donnez vous en donc garde.
Car en sa bouche il n'y ha rien, que miel:
Mais en son cueur il n'y ha rien que siel.
S'il vous promet, & s'il vous fait le doux,
Respondez luy, Amour, retirez vous:
J'en ay choysi un qui en mainte sorte

Quant est de moy, vienne Heleine, ou Venus. Viennent vers moy m'offrir leurs corps tous nuds, Je leur diray, retirez vous Déesses, En meilleur lieu j'av trouvé mes liesses.

Ainsi tous deux tant comme nous vivrons, De Fermeté le grand Guidon suivrons, Lequel (pour vray) Fermeté a fait peindre De noir obscur, qui ne se peult destaindre, Signifiant à tous ceux, qui conçoyvent Amour en eux, qu'esteindre ne la doyvent.

Merite bien, que dehors moy ne forte.

Cestuy Guidon, & triomphante enseigne Nous devons suyvre: Amour le nous enseigne. Et s'il advient, qu'Envieux, & Envie. Recovent dueil de nostre heureuse vie, Que nous en chaut? en douleur ilz mourront, Et noz plaisirs tousjours nous demourront.

## ELEGIE IV

S ALUT, & mieux, que ne fauriez eslire, Vous doint Amour : je vous supply de lire Ce mien escrit, auquel trouver pourrez Un nouveau cas, ainsi que vous orrez.

Mon cueur entier en voz mains detenu, N'ha pas long temps, vers moy est revenu, Tout corroucé sans nuls plaisirs quelzconques: Et toutessois aussi bon qui fut onques: Si me vient dire en plainte bien dolente,

Homme loyal, ton amour violente
M'ha mis es mains d'une, que fort je prife,
Et qui (pour vray) ne peult estre reprife,
Fors seulement d'un seul, & simple poinct,
Qui trop au vis (sans sin) me touche, & poinct,
C'est que sans cause est en oubly mettant
Moy ton las cueur, & toy, qui l'aymes tant.

N'est ce point sà trop ingrate oubliance? Certes j'avoy d'elle ceste fiance, Que l'on verroit Ciel & Terre finir Plustost, qu'en moy son ferme souvenir,

Or ne se peuit la chose plus nier: Regarde moy, je semble un prisonnier, Qui est sorty d'une prison obscure, Ou l'on n'ha eu de luy ne soing, ne cure. Eschappé suis d'elle secretement, Et suis venu vers toy apertement Te supplier, que mieux elle me traite. Ou que vers toy je sace ma retraite.

Je fuis ton cueur, qu'elle tient en esmoy
Je fuis ton cueur, aye pitié de moy:
Et si pitié n'as de mon dueil extreme,
A tout le moins pren pitié de toy mesme:
Car apres moy, vif tu ne demourroys,
Quand en ses mains mal traité je mourroys.
Reçoy moy donc, & ton estomac ouvre,
A' celle sin que dans toy je recouvre
Mon premier lieu, duquel tu m'as osté,
Pour estre (helas) en service bouté.

Ainsi parloit mon cueur plein de martyre : Et je luy dy, mon cueur, que veux tu dire? D'elle tu as voulu estre amoureux, Et puis te plains, que tu es douloureux. Sçais tu pas bien, qu'Amour ha de coustume D'entremesler ses plaisirs d'amertume, Ne plus ne moins, comme Espines poingnantes Sont par nature au beau Rosier joingnantes? Ne veuille aucun Damoyfelles aymer, S'il ne s'attend y avoir de l'amer, Refus, oubly, jalousie, & langueur Suvvent Amours: & pource donc mon cueur Retourne t'en, car je te fay favoir, Que je ne veux icy te recevoir : Et ayme mieux, qu'en peine là sejournes : Que pour repos devers moy tu retournes. Voyla comment mon cueur je vous renvoye Brief, puis le temps qu'il print sa droite voye Par devers vous, je n'ay eu le desir

De l'en tirer pour apres m'en faisir: Et toutessois à dire ne veux craindre, Qu'il n'ha point eu aucun tort de se plaindre, Car mis l'avez hors de vostre pensée, Sans vous avoir (que je sache) offensée.

Quand force fut d'aupres de vous partir, Plus d'une fois me vinstes advertir, Ou'au souvenir de vous je me fiasse, Me requerant, que ne vous oubliasse : Ce que je fey : mais vous qui m'advertistes, La fouvenance en oubly convertistes: Si qu'au retour j'ay en vous esprouvé Ce qu'avez craint en moy estre trouvé. Las tous Amans au departir languissent, Et retournans toufiours fe reflouyssent: Mais au contraire av eu plus de tourment A' mon retour, qu'à mon departement : Car vostre face excellente, & tant claire S'est faite obscure à moy, qui luy veux plaire : Vostre gent corps de moy se part, & emble : Vostre parler au premier ne resemble, Et voz beaux yeux, qui tant me confoloient Ne m'ont point rys ainsi, comme ilz souloient Las qu'ay je fait? Je vous pry, qu'on me mande La faute mienne, afin que je l'amande, Et que d'y cheoir desormais je me garde.

Si rien n'ay fait, au cueur qu'avez en garde Vueillez offrir traitemens plus humains: Car s'il mouroit loyal entre voz mains, Tort me feriez, & de ce cueur la perte Seroit à vous (trop plus qu'à moy) aperte D'autant qu'il est (& vous le favez bien) Beaucoup plus vostre (en esset) qu'il n'est mien.

## ELEGIE V

S i ta promesse amoureusement saite Estoit venue à sin vraye & parfaite, Croy (chere Sœur) qu'en serme loyauté Je servirois ta jeunesse, & beauté, Faisant pour toy de corps, d'esprit, & d'ame Ce que Servant peut saire pour sa Dame.

Je ne dy pas, que de ta bouche sorte Mot, qui ne soit de veritable sorte:
Mais quand à l'œil voy ta belle stature
Et la grandeur d'une telle adventure
Qui ne se peult meriter bonnement,
Je ne saurois croire, qu'aucunement
Je peusse attaindre à un si baut degré,
S'il ne me vient de ta grace, & bon gré.

Puis que ton cueur me veux donc presenter, Et qu'il te plaist du mien te contenter, Je loue Amour. Or evitons les peines, Dont les amours communement sont pleines: Trouvons moyen, trouvons lieu, & loysir De mettre à fin le tien, & mien desir.

Voicy les jours de l'An les plus plaisans, Chacun de nous est en ses jeunes ans : Faisons donc tant, que la fleur de notre aage Ne suive point de tristesse l'outrage : Car temps perdu, & jeunesse passée Estre ne peult par deux soys amassée.

Le tien office est, de me faire grace : Le mien sera, d'aviser que je face Tes bons plaisirs: & sur tout regarder Le droit chemin pour ton honneur garder.

Si te fupply, que ta Dextre m'annonce De cest escrit la finale response, A' celle fin que ton dernier vouloir Du tout me face essouyr, ou douloir.

## ELEGIE VI

Le plus grand bien qui foit en amitié,
Apres le don d'amoureuse pitié,
Est s'entr'escrire, ou se dire de bouche,
Soit bien, soit dueil, tout ce qui au cueur touche car si c'est dueil, on s'entreconsorte:
Et si c'est bien, sa part chacun emporte.
Pourtant je veux (Mamie, & mon desir)
Que vous ayez vostre part d'un plaisir,
Qui en dormant l'autre nuict me survint.

Advis me fut que vers moy tout feul vint Le Dieu d'Amours, aussi cler, qu'une Estoille, Le corps tout nud sans drap, linge, ne toille, Et si avoit (asin que l'entendez) Son Arc alors, & ses yeux desbendez. Et en sa main celuy traict bienheureux, Lequel nous seit l'un de l'autre amoureux.

En ordre tel s'approche, & me va dire: Loyal Amant, ce que ton cueur desire, Est asseuré: celle, qui est tant tienne, Ne t'ha rien dit (pour vray) qu'elle ne tienne: Et, qui plus est, tu es en tel credit, Qu'elle ha foy ferme en ce que luy as dit.

Ainsi Amour parloit: & en parlant
M'asseura fort. Adonc en esbranlant
Ses esles d'Or en l'air s'en est volé:
Et au resveil je sus tant consolé,
Qu'il me sembla que du plus haut des Cieux
Dieu m'envoya ce propos gracieux.

Lors prins la plume, & par escrit fut mis Ce songe mien que je vous ay transmis, Vous suppliant, pour me mettre en grand heur, Ne saire point le Dieu d'Amours menteur : Mais, tout ainsi qu'il m'en donne asseurance. En vostre dire ayez perseverance : Croyant aussi que les propos, & termes Que vous ay dits, sont asseurez, & fermes.

En ce faifant pourray bien foustenir, Que fonge peult fans menfonge advenir: Et si diray la Couche bienheureuse, Ou je songeai chose tant amoureuse.

O combien donc heureuse elle sera, Quand ce gent corps dedans reposera!

#### ELEGIE VII

Vostre Amour semble estre tout' endormie Je n'ay de vous plus lettres, ne langage: Je n'ay de vous un seul petit message: Plus ne vous voy aux lieux accoustumez. Sont ja estains voz desirs allumez,

Qui avec moy d'un mefme feu ardoient?

Ou font ces yeux lesquelz me regardoient
Souvent en ris, souvent aveques larmes?
Ou sont les mots, qui tant m'ont fait d'alarmes?
Ou est la bouche aufsi, qui m'appaisoit,
Quand tant de fois, & si bien me baisoit?
Ou est le cueur, qu'irrevocablement
M'avez donné? Ou est semblablement
La blanche main, qui bien fort m'arrestoit,
Quand departir de vous besoing m'estoit?

Helas (amans) helas fe peult il faire, Qu'Amour si grand se puisse ainsi deffaire? Je penseroys plustost, que les Ruisseaux Feroyent aller encontremont leurs eaux, Considerant, que de faict, ne pensée Ne l'ay encor (que je sache) offensée.

Donques Amour, qui couves fous tes esles
Journellement les cueurs des Damoyselles,
Ne laisse pas trop refroidir celuy
De celle-là, pour qui j'ay tant d'ennuy.
Ou trompe moy en me faisant entendre,
Qu'elle ha le cueur bien ferme, & fust il tendre.

# ELEGIE VIII

Dites, pourquoy vostre amytié s'efface O cueur ingrat sous Angélique face? Dites le moy, car savoir ne le puis, Tousiours loyal ay esté, & le suis: Il est bien vray, qu'ardant est mon service, Mais d'avoir sait en servant un seul vice, Il n'est vivant, lequel me sceust reprendre, Si trop aymer pour vice ne veult prendre.

Las pourquoy donc laissez vous le cueur pris D'Amour si grand? Avez vous entrepris De mettre sin à sa dolente vie? Mieux eust valu (puis qu'en avez envie) Que consumé l'eussiez à vous servir, Qu'en le laissant, sans point le desservir.

Mais qui ha meu du Monde la plus belle A' me laisser? est ce amitié nouvelle? Je croy, que non. Qui vous fait donc changer Si bon propos? Seroit-ce point Danger? C'est luy pour vray. Danger par jalousie Chasse l'Amour de vostre fantasie, Et en son lieu toute crainte y veult mettre, Ce que ne doit un gentil cueur permettre. Crainte est obscure : Amour est nette & blanche : Crainte est servile, Amour est toute franche: Amour fait vivre, & Crainte fait mourir, Si vous fouffrez en elle vous nourrir. Ceste beauté de Vertu accueillie Se passera comm' une fleur cueillie: Mais quand Amour de vous ne partira, Ceste beauté plus en plus florira.

Et d'autre part en est-il, qui srequentent Le train d'Amours, sans que l'assaut ilz sentent De ces jaloux? Ou pensez vous qu'ilz soient? Si pour cela toutes Dames laissoient Leurs serviteurs, ainsi comme vous saites, Toutes Amours par tout seroient dessaites.

Ce n'est pas tout, que d'aymer seulement, Il faut aymer perpetuellement : Et lors que plus Jalousse se fume, Lors que Danger plus sa cholere allume, Et que Rapport plus se met à blasmer, Lors se doit plus vraye Amour enslammer : Pour leur monstrer qu'amour est plus puissante, Que leur rigueur n'est amere & cuysante.

Ce néantmoins vostre plaisir soit fait : Il est en vous de me faire (en essect) Soussrir à tort, mais en vostre puissance N'est pas d'oster la grande obeyssance, Et l'amitié qu'ay en vous commencée : Plustost mourir que changer ma pensée.

### ELEGIE IX

L'a grand'amour que mon las cueur vous porte Incessamment me conseille, & enhorte Vous consoler en vostre ennuy extreme:

Mais (tout bien veu) je trouve que moy mesme Ay bon besoin de consolation

Du dueil que j'ay de vostre assistion.

J'en ay tel dueil, qu'à peine eusse seu mettre Sur le papier un tout seul petit metre,

Si le desir, qu'ay à vostre service,

N'eust esté grand, & plein d'Amour sans vice.

O Dieu du Ciel, qu'Amour est forte chose! Sept ans y ha, que ma main se repose Sans volonté d'escrire à nulle semme, M'eust-elle aymé sous tresardente slamme: Et maintenant (las) une Damoyselle, Qui n'ha sus moy affection, ne zelle, Me fait pour elle employer encre, & plume, Et, fans m'aymer, d'un feu nouveau m'allume Or me traictez ainti qu'il vous plaira:

En endurant mon cueur vous servira : Et ayme m'eux vous servir en tristesse, Qu'aymer ailleurs en joye, & en liesse.

D'où vient ce poinct? Certes il faut bien dire, Qu'en vous y ha quelque grace, qui tire Les cueurs à foy. Mais laquelle peult-ce estre : Seroit ce point vostre port tant adextre? Seroit ce point les traicts de voz beauz yeux, Ou ce parler tant doux, & gracieux? Seroit ce point vostre bonté tant sage, Ou la hauteur de ce tant beau corfage? Seroit ce point vostre entiere beauté, Ou ceste douce honneste privauté? C'est ceste là (ainsi comme il me semble) Ou, si je faux, ce sont toutes ensemble. Quoy que ce foit, de voître amour suis pris : Encor je louë Amours en mes esprits, De mon cueur mettre en un lieu tant heureux. Puis qu'il falloit que devinsse amoureux.

Donc puis qu'Amour m'a voulu arrester Pour vous servir, plaise vous me traicter Comme voudriez vous mesme estre traictse. Si vous estiez par Amour arrestée.

#### ELEGIE X

A Mour me feit escrire au Moys de May Nouveau refrain, par lequel vous nommay (Comme favez) la plus belle de France:
Mais je failly: car, veu la suffisance
De la beauté, qui dessus vous abonde,
Dire devois, la plus belle du Monde.
Ce qui en est, & qu'on en void m'accuse
De telle faute, & vostre amour m'excuse
Qui troubla tant mes douloureux esprits,
Que France alors pour le Monde je pris.

O donques vous du Monde la plus belle,
Ne cachez pas un cueur dur, & rebelle
Sous tell' beauté: ce feroit grand dommage.
Mais à mon cueur, qui vous vient faire hommage,
Faites recueil, je vous en fay present.
Voyez le bien, il est (certes) exempt
De faux penser, feintise ou trahison:
Il n'ha sur luy faute ne mesprison,
En luy ne sont aucunes amours vaines.
Tout ce qu'il ha de mauvais, ce sont peines,
Qui de par vous y ont été boutées,
Et qui sans vous n'en peuvent estre ostées.

Si vous fuppli, Mamie, & mon recours, Belle, en qui gist ma mort, ou mon secours, Prenez mon cueur, que je vous vien offrir, Et s'il est faux, faites le bien souffrir: Mais s'il est bon, & de loyale sorte, Arrachez luy tant de peines qu'il porte.

# ELEGIE XI

Pour à plaisir ensemble diviser, On ne sauroit meilleur temps adviser, Que de Noel la Mynuict, & la Veille:
En ceste nuict le Dieu d'Amour resveille
Ses serviteurs, & leur va commandant
De ne dormir, mais rire, cependant
Que faux Danger, & Maubz, & Jalousie
Sont endormis au lict de Fantasse.
O nuict heureuse, ô douce noire nuict!
Ta noireté aux Amans point ne nuit,
Plustost endort les langues serpentines:
Si que faingnant d'aller droit à Matines,
Plusieurs Amans peuvent bien (ce me semble)
En lieu secret se rencontrer ensemble.

Les Prestres lors bien haut chantent, & crient: Et les Amans tout bas leurs Dames prient, Et puis entre eux content de leurs fortunes, En maudissant les langues importunes, Ou en disant choses, qui mieux leur plaisent.

Puis les fervans par coups leurs Dames baisent, Et en baisant, à elles ilz se deulent Pour avoir mieux. Lors si les Dames veulent, Maugré Danger, & toute sa puissance, A leurs Amis donneront jouysfance: Car noire nuict, qui des Amans prend cure, Les couvrira de sa grand Robbe obscure : Et si rendra (ce pendent) endormis Ceux, qui d'Amour font mortelz ennemis. Qu'en dites-vous ma maistresse, & mamie? Si vous voulez n'estre point endormie Ceste nuict là, de veiller suis content Avec vous, car mon vouloir ne tend Qu'à vous complaire. Or pour nous resjouir, Si vous voulez les Matines ouir. Là où favez, il n'est chambre si bonne,

I

Ne si bon lict, que du tout n'abandonne Pour m'y trouver, car pour final propos, Dedans un lict ne gist point mon repos: Il gist en vous, & en vous je le quier: Donnez le moy donques, je vous requier.

## ELEGIE XII

Le juste dueil remply de facherie,
Qu'eustes arsoir par la grand resverie
De l'homme vieil, ennemy de plaisir,
M'ha mis au cueur un si grand desplaisir,
Que toute nuict repos je n'ay seu prendre:
Aussi serviteur, qui porter ne fauroit
Le mesme dueil que sa maistresse auroit.
Certainement, ma Nymphe, ma Déesse,
Quand joye avez, je suis plein de liesse:
Et quand douleur au cueur vous touche & poinct,
Je ne reçoy de plaisir uh seul poinct.

Toute la nuict je disois a part moy,
Helas faut-il qu'elle soit en esmoy
Par le parler, & par la langue amere
D'un qui la treuve & mere, & plus que mere?
Que pourra il faire à ses Ennemis,
Quand il veult nuire à ses meilleurs Amis?

Ainsi disois, ayant grand confiance, Que vostre cueur, bien armé de constance, Plus grans assaux sauroit bien soustenir, Et que le mal, qui en pourroit venir, Ne pourroit pas tumber que sur la teste Du mal parlant, qui trop se monstra beste.

Et quand j'eux bien viré, & reviré
Dedans mon liét, & beaucoup souspiré,
Je priay fort Amour, qui m'assailloit,
Laisser dormir mon esprit, qui veilloit:
Mais lors Amour de rigueur m'ha usé:
Car le dormir du tout m'ha resusé,
Me commandant de composer, & tistre
Toute la nuict ceste petite Epistre,
Pour au matin un peu vous consorter
Du dueil, qu'au soir il vous convint porter.

Oray-je fait le sien commandement, Si vous requier (ma maistresse) humblement, Que vostre cueur, tant noble, & gracieux, Chasse dehors tout ennuy soucieux: En le chassant, le mien vous chasserez: Priant Amour qu'en tous lieux, où serez, Vienne plaisir, & tristesse s'ensuye, Et que Vieillart jamais ne vous ennuye.

### ELEGIE XIII

L'esloignement, que de vous je veux faire, N'est pour vouloir m'exempter, & desfaire De vostre Amour, encor moins du service : C'est pour tirer mon loyal cueur sans vice Du seu, qui l'ard par trop grand' amitié : Et est besoing, qu'il treuve en moy pitié, Veu que de vous pour toute recompense N'ha que rigueur, & mieux trouver n'y pense : Car de vous n'ay encor ouy responce, Qui un seul brin de Bon espoir m'annonce.

Si faut-il bien, que vostre cueur entende Qu'il n'y ha chose au Monde, qui ne tende A quelque sin. Homme ne suyt la Guerre, Que pour honneur, ou prousit y acquerre: Qui ces deux poincts de la Guerre osteroit, A y servir nul ne se bouteroit. Homme ne suyt le train d'Amours aussi, Que sous espoir d'avoir don de mercy: Et qui ce poinct en osteroit, en somme, D'Amour servir ne se messeroit homme.

Ce nonobstant, vostre je demourray:
Mais ce sera le plus loing, que pourray:
Car que me vaut voir de pres & congnoistre
Tant de beauté, sinon de faire croistre
Mon nouveau seu? J'ay tousjours ouy dire.
Qui plus est prés, plus ardamment desire:
Parquoy pour moins ardamment desirer,
Raison me dit, qu'il me faut retirer,
En m'asseurant (si je croy son propos)
Que mon esprit par temps aura repos:
Et si promet rendre à ma triste vie
La liberté, que luy avez ravie:
Et vostre amour (helas) ne me promet
Fors desepoir, qui au tombeau me met.

Ay-je donc tort, si Raison je veux croire
Plustost, qu'Amour, qui en mes maux prend gloire.
Las, s'en ouvrant ceste bouche vermeille,
Vous eustiez mis en mon cueur par l'oreille
Un mot d'espoir, travaux, ennuis & peines
M'eussent (pour vous) semblé liesses pleines:
Car doux espoir consorte la pensée,

Qui bien s'attend d'estre recompensée. Et moy, qui n'ay espoir, ne seule attente, Comment feray ma pensée contente, Fors en suyant la cause de son dueil?

Là & au temps gist l'espoir de mon vueil.

Le temps (pour vray) esface toutes choses:
Au long aller mes tristesses encloses

Esfacera: toutessois attendant

Remede tel, j'endure cependant:
Dont maintesois vostre face tant belle

Maudjs tout seul d'avoir cueur si rebelle:
Que pleust à Dieu ne l'avoir onc peu voir,
Ou souvenir jamais d'elle n'avoir.

Croyez, de vray, que ma presente plainte N'est composée en courroux, ny en fainte : Faindre n'est point le naturel de moy : Parquoy vous pry n'en prendre aucun efmoy, Ne me hayr, si je fuys mon contraire, A qui je veux, plus que jamais, complaire : Mais c'est de loing : & pour en faire espreuve, Commandez moy, Pour vous, certes, je treuve Facile chose à faire, un impossible : Et fort aifé à dire, un indicible. Commandez donc, car je l'accompliray, Et fur ce point un Adieu vous diray, Partant du cueur de vostre Amour attaint, Et qui s'attend d'en voir le feu estaint Par s'esloingner, puis qu'on ne veult l'estaindre Par eau de grace, ou bien voudroit attaindre.

#### ELEGIE XIV

CI ma complainte en vengeance estoit telle. Ocomme tu es en abus, & cautelle, Croy que ma plume amoureuse, & qui t'ha Tant fait d'honneur, dont tresmal s'acquita, Croy, qu'elle auroit desja jetté fumée Du style ardant, dont elle est allumée, Pour du tout rendre aussi noir que charbon Le tien bon bruit, si tu en as de bon : Mais pas ne fuis affez vindicatif Pour un tel cueur si faux, & deceptif: Et neantmoins si me faut-il changer Mon naturel, pour de toy me venger, A celle fin que mon cueur fe descharge Du pesant faix, dont ta ruse le charge : Aussi afin de te faire savoir, Qu'à trop grand tort m'as voulu decevoir, Veu qu'en mon cueur ta basse qualité N'a veu qu'Amour & Liberalité.

Sus donc ma Plume, ores foys ententive
D'entrer en feu d'aigreur vindicative:
Mon juste dueil t'en requiert, pour tout seur,
Ne cherche pas termes pleins de douceur:
Ne trouve Azur, ny Or, en ton chemin,
Ne fin papier, ne vierge parchemin:
Pour mon propos escrire rien ne valent:
Cherche des mots, qui tout honneur ravalent:
Trouve de l'encre espesse & fort obscure,
Avec papier si gros qu'on n'en ayt cure:
Et là dessus escry termes mordans

D'un trait lisable à tous les regardans, Pour (à bon droit) rendre celle blasmée Qu'à bien grand tort tu as tant estimée.

Incontinent, defloyale femelle, Que j'auray fait, & escrit ton libelle, Entre les mains le mettray d'une semme, Qui appellée est Rénommée, ou Fame, Et qui ne sert qu'à dire par le Monde Le bien, ou mal de ceux, où il abonde.

Lors Renommée, avec ses esses paintes,
Ira vollant en Bourgs, & Villes maintes:
Et sonnera sa Trompette d'argent,
Pour auteur d'elle assembler toute gent:
Puis haut, & cler de cent langues, qu'elle ha,
Dira ta vie: & puis deça, & là
Ira chantant les sins tours, dont tu uses,
Tes laschetez, tes meschances, & ruses.
Ainsi sera publié ton renom,
Sans oublier ton nom, & ton surnom:
Pour, & asin, que toute sille bonne
Ne hante plus ta mauvaise personne.

Filles de bien n'en vueillez approcher,
Fuyez, d'autant comme honneur vous est cher,
Fuyez du tout, suyez la Garse sine,
Qui sous beaux dits un vray Amant assine:
Et si au jour de ses nopces elle ha
Cheveux au vent, ne soussrez pas cela:
Ou si au chef luy trouvez attaché
Chappeau de sleurs, qu'il luy soit arraché:
Car il n'afsiert à Garses dissamées
User des droits de Vierges bien samées:
Vray est, qu'elle est un jeune personnage,
Mais sa malice outrepasse son aage.

Donc que fera ce au temps de ta vieillesse? Tiendras-tu pas escoles de finesse? Certes ouy. Car Medée, & Circé, Si bien que toy, n'en ont l'art exercé. Vray est, qu'avant que tu soys definée, Par affiner te verras affinée: Si que desja commence à me venger, Voyant dé loing venir ton grand danger.

Qui te mouvoit lasche cueur dangereux, A m'envoyer tant d'escrits amoureux? Par tes escrits feu d'amour attisois : Par tes escrits mourir pour moy disois, Par tes escrits tu me donnois ton cueur: O don confit en maulvaise liqueur! M'as-tu pas fait par l'escriture entendre, Que tout venoit apoint, qui peult attendre? Veux-tu nier, que par là n'accordaffes A mon vouloir, & que ne t'obligeasses, Lors qu'à mes dons ta main prompte estendois Tu savois bien la fin, où je tendois: Mais ton faux cueur trouva l'invention De varier à mon intention : Car mariage en propos vins dresser, Pour qui à moy ne te faut adresser : Ce n'est pas toy, que chercher je voudroye, En cest endroit de beaucoup me tourdrove : Et en la sorte encor que je t'ay quise, Je m'en repens, congnoissant ta faintise.

Mon cueur loyal, que je t'avois donné, Par devers moy tout trifte est retourné: Et m'ha bien sceu reprocher, que j'ay tort De l'avoir mis en un logis tant ord: Si qu'à present ne prend autre allegeance, Qu'au passetemps de sa juste vengeance, Que je seray, tant que jeune seras : Mais quand verray, que tu te passeras, Je cesseray cette vengeance extreme : Car lors de toy me vengeras toy-messne, Par le regret que ton cueur esperdu Aura d'avoir un tel Amy perdu.

## ELEGIE XV

Ton fens discret à merveille rassis.

Ton noble port, ton maintien asseuré,

Ton chant si doux, ton parler mesuré,

Ton propre habit, qui tant bien se conforme

Au naturel de ta tres belle forme:

Brief, tous les dons, & graces, & vertus,

Dont tes esprits sont ornez, & vestus,

Ne m'ont induit à t'ossrir le service

De mon las cueur plein d'Amour sans malice.

Ce sut (pour vray) le doux trait de tes yeux,

Et de ta bouche aucuns mots gracieux,

Qui de bien loing me vindrent saire entendre

Secretement, qu'à m'aymer voulois tendre.

Lors tout ravy (pource que je penfay Que tu m'aymois) à t'aymer commençay : Et pour certain aymer je n'eusse sceu, Si de l'Amour ne me fusse apperceu : Car tout ainsi que flamme engendre flamme, Faut que m'amour par autre amour s'enflamme.

Et qui diroit, que tu as fait la feinte Pour me donner d'amour aucune estrainte : Je dy que non, croyant que mocquerie En si bon lieu ne peult estre cherie. Ton cueur est droit, quoy qu'il soit rigoureux, Et du mien (las) feroit tout amoureux, Si ce n'estoit fascheuse deffiance Qui à grand tort me pourchasse oubliance. Tu crains (pour vray) que mon affection Soit composée aveques fiction : Esprouve moy: quand m'auras esprouvé, J'ay bon espoir qu'autre seray trouvé. Commande moy jusques à mon cueur fendre, Mais de t'aymer ne me vien point desfendre. Plustost fera Montagne sans Vallée, Plustost la Mer on verra dessalée, Et plustost Seine encontremont ira, Que mon amour de toy se partira.

Ha, cueur ingrat! Amour, qui vainc les Princes,
Tha dit cent fois, que pour Amy me prinfes.
Mais quand il vient à cela t'infpirer,
Tu prens alors peine à t'en retirer.
Ainsi Amour par toy est combatu:
Mais garde bien d'irriter sa vertu:
Et si m'en croys, say ce qu'il te commande:
Car si sur toy de cholere il desbende,
Il te sera par adventure aymer
Quelque homme sot, desloyal, & amer,
Qui te sera maudire la journée,
De ce qu'à moy n'auras t'amour donnée.

Pour fuir donc tous ces futurs ennuis, Ne me fuy point. A quell' raison me fuis? Certes tu es d'estre aymée bien digne: Mais d'estre aymé je ne suis pas indigne. J'ay en thresor jeunes ans, & santé, Loyalle amour, & franche voulonté, Obeissance, & d'autres bonnes choses, Qui ne sont pas en tous hommes encloses, Pour te servir, quand il te plaira prendre Le cueur, qui veult si haut cas entreprendre.

Et quand le bruyt courroit de l'entreprise, Cuiderois tu en estre en rien reprise? Certes plustost tu en aurois louenge, Et diroit lon, puis que cestuy se renge A ceste Dame, elle ha beaucoup de graces: Car long temps ha qu'il suit en toutes places Le train d'Amour: celle, qui l'ha donc pris, Faut qu'elle soit de grand' estime, & pris.

Ilz diront vray : que ne faisons nous donques De deux cueurs un? Brief, nous ne feismes onques Oeuvre si bon : noz constellations, Aussi l'accord de noz conditions Le veult, & dit : chacun de nous ensemble Et mainte chose (en effect) se resemble. Tous deux aymons gens pleins d'honnestété: Tous deux aymons honneur, & netteté: Tous deux aymons à d'aucun ne mesdire : Tous deux aymons un meilleur propos dire : Tous deux aymons à nous trouver en lieux, Ou ne font point gens melancolieux : Tous deux aymons la Musique chanter: Tous deux aymons les Livres frequenter: Que diray plus? Ce mot là dire j'ofe, Et le diray, que presqu'en toute chose Nous refemblons, fors que j'ay plus d'esmoy Et que tu as le cueur plus dur que moy.

Plus dur (helas) plaise toy l'amollir, Sans ton premier bon propos abolir : Et en voulant en toy mesme penser, Qu'Amour se doibt d'Amour recompenser, Las, vueille moy nommer doresnavant Non pas Amy, mais treshumble Servant, Et me permetz, allegeant ma detresse, Que je te nomme (entre nous) ma maistresse.

S'il ne te plaist, ne laisseray pourtant A bien t'aymer : & ma douleur portant, Je demourray ferme, & plein de bon zelle : Et toy par trop ingrate Damoyselle.

# ELEGIE XVI

Qui eust penfé, que l'on peust concevoir ?

Qui eust cuidé le desir d'un cueur franc Estre caché dessous un papier blanc?

Et comme peult un œil au cueur eslire Tant de consort par une lettre lire?

Certainement, Dame treshonnorée,
J'ay leu des faints la Legende dorée,
J'ay leu Alain le tresnoble Orateur,
Et Lancelot le tresplaisant menteur:
J'ay leu aussi le Romant de la rose,
Maistre en Amours, & Valere, & Orose,
Comptans les faits des antiques Romains:
Brief, en mon temps j'ay leu des livres maints,
Mais en nul d'eux n'ay trouvé le plaisir,

Que j'ay bien sçeu en voz lettres choisir.

J'y ay trouvé un langage benin,
Rien ne tenant du style semenin:
J'y ay trouvé suite de bon propos,
Avec un mot, qui ha mis en repos
Mon cueur estant travaillé de tristesse,
Quand me souffrez vous nommer ma maistresse.
Dieu vous doint donc, ma maistresse tresbelle
(Puis qu'il vous plaist, qu'ainsi je vous appelle)
Dieu vous doint donc amoureux apetit
De bien traiter vostre servant petit.

O moy heureux d'avoir maistresse au monde, En qui vertu sous grand'béauté abonde! Tel est le bien qui me sut apporté Par vostre lettre, ou me suis conforté, Dont je maintien la plume bienheurée Qui escrivit lettre tant desirée: Bien heureuse est la main qui la ploya. Et qui vers moy (de grace) l'envoya: Bienheureux est qui apporter la sceut, Et plus heureux celuy qui la receut

Tant plus avant ceste lettre lisoye,
En aise grand' tant plus me deduisoye:
Car mes ennuis sur le champ me laisserent,
Et mes plaisirs d'augmenter ne cesserent
Tant que j'eu leu un mot, qui ordonnoit
Que ceste lettre ardre me convenoit.

Lors mes plaifirs d'augmenter prindrent cesse : Pensez adonc en quelle doubte, & presse Mon cueur estoit : l'obeissance grande, Que je vous doy, brusser me la commande : Et le plaisir, que j'ai de la garder, Me le dessend, & m'en vient retarder. Aucune fois au feu je la boutoye
Pour la brusler: puis soudain l'en ostoye:
Puis l'y remis, & puis l'en reculay:
Mais à la fin (à regret) la bruslay
En disant, Lettre (apres l'avoir baisée)
Puis qu'il luy plaist, tu seras embrasée:
Car j'ayme mieux dueil en obeissant,
Que tout plaisir en desobeissant.
Voyla comment poudre, & cendre devint
L'ayse plus grand qu'à moy onques advint.

Mais si de vous j'ay encor quelque lettre.
Pour la brusser, ne la faudra que mettre
Pres de mon cueur : là elle trouvera
Du seu assez, & si esprouvera,
Combien ardente est l'amoureuse flamme,
Qui mon las cueur pour voz vertus enflamme,

Au moins en lieu des tourmens, & ennuis, Que vostre amour me donne jours, & nuicts, Je vous supply de prendre (pour tous mets) Un cristallin Miroir, que vous transmets. En le prenant, grand joye m'adviendra. Car (comme croy) de moy vous souviendra, Quand là dedans mirerez ceste face, Qui de beauté toutes autres essace.

Il est bien vray, & tien pour seureté, Qu'il n'est Miroir, ne sera, n'ha esté, Qui sceust au vis monstrer parfaitement Vostre beauté: mais croyez seurement, Si voz yeux clers plus que ce cristallin Veissent mon cueur seal, & non malin, Ilz trouveroient là dedans imprimée Au naturel vostre sace estimée.

Semblablement avec vostre beauté

Vous y verriez la mienne loyauté: Et la voyant, vostre gentil courage Pourroit m'aymer quelque poinct d'avantage: Pleust or à Dieu donques, que peussiez voir Dedans ce cueur, pour un tel heur avoir: C'est le seul bien, ou je tends, & aspire.

Et pour la fin rien je ne vous desire, Fors que cela, que vous vous desirez, Car mieux que moy voz desirs choysirez.

# ELEGIE XVII

Tous les humains, qui estes sur la terre,
D'aupres de moy retirez vous grand' erre,
N'oyez le dueil, que mon las cueur reçoit:
Je ne veux pas, que d'ame entendu soit,
Fors seulement de ma seule Maistresse,
A qui pourtant ma plainte ne s'addresse:
Car quand pour elle en langueur je mourroys,
D'elle (pour vray) plaindre ne me pourroys.

D'elle, & d'Amour ne me plains nullement, Mais Amour doy mercier doublement: Et doublement à luy je fuis tenu, Quand double bien par luy m'est advenu, De me submettre en lieu tant estimé, Et d'avoir fait, que là je suis aymé.

Pourquoy d'ennny suis-je donques tant plein? A' trop grand tort (ce semble) me complain, Veu que plaisir plus grand on ne peult dire, Que d'estre aymé de celle qu'on desire.

A' dire vray, ce m'est grande liesse, Mais à mon cueur trop plus grand ennuy est ce, De ce que n'ose user de privauté Vers une telle excellente beauté.

Amour veult bien me donner ce credit:
Mais pour certain Danger y contredit,
Nous menassant de nous faire reproche,
Si l'un de nous trop pres de l'autre approche.

O' Dieu puissant, quelle grande merveille! Est il douleur à la mienne pareille?

A' ma grand' foif la belle eau se presente,
Et si convient que d'en boyre m'exempte,
Brief, on me veult le plus grand bien du monde,
Et tout ce bien plus à mal me redonde,
Que si ma Dame estoit vers moy rebelle,
Veu que semblant n'ose faire à la belle,
De qui l'Amour (par sa grace) est à moy:
Ainsi je semble, en peine & en esmoy
A cil qui ha tout l'Or, qu'on peult comprendre,
Et n'oseroit un seul denier en prendre.

Ce neantmoins puis que s'amour me baille.

La ferviray, quelque ennuy qui m'affaille:

Et ayme mieux en s'amour avoir peine:

Que fans s'amour avoir lieffe pleine.

Helas, de nuict elle est mieux que gardée

Et sur le jour de cent yeux regardée,

Plus que jadis n'estoit Yo d'Argus,

Qui eut au chef cent yeux clers, & agus.

Si ne faut pas s'esbahir grandement,

Si on la garde ainsi soingneusement,

Car voulontiers la chose pretieuse

Est mise à part en garde soucieuse.

Or est ma Dame une Perle de pris

Inestimable à tous humains espris Pour sa valeur. Que diray d'avantage : C'est le thresor d'un riche parentage : Que pleust à Dieu que la fortune advint, Quand je vouldrois, que Bergere devint.

S'ainsi estoit, pour l'aller voir seulette,
Souvent feroys de ma Lance Houlette,
Et conduirois, en lieu de grans armées:
Brebis aux champs costoyez de ramees.
Lors la verrois seant sur la verdure:
Si luy dirois la peine que j'endure
Pour son amour, & elle orroit ma plainte
Tout à loysir, sans de nul avoir crainte:
Car loing seroient ceux qui de nuiet la gardent
Et les cent yeux, qui de jour la regardent,
Ne la verroient: le faux traistre Danger
Vers elle aux champs ne se viendroit renger
Tousiours se tient en ses maisons Royalles,
Pour faire guerre aux personnes loyalles

Ainsi estant en liberté champestre La requerroys d'un baiser : & peut estre Me donneroit, pour du tout m'appaiser, Quelque autre don par dessus un baiser : Si me vaudroit l'estat de Bergerie Plus qu'une grande, & noble Seigneurie.

O vous Amans, qui aymez en lieu bas, Vous avez bien en amours voz esbats, Si n'ay je pas envie à vostre bien: Mais en amours avoir je voudrais bien La liberté à la vostre semblable.

Qu'en dites vous ma Maistresse honnorable? Ces miens souhaits vous desplaisent ilz point? Je vous supply ne les prendre qu'à point,

I.

Recongnoissant que l'amour que vous porte, Fait que mon cueur en desirs fe transporte.

Et pour fermer ma complainte accomplie. Treshumblement vostre grace supplie, Perseverer en l'amour commencée, Et ne l'oster de si noble pensée. Quant est à moy, seule vous serviray Tout mon vivant, & pour vous soussiriray Jusques au jour que Fortune voudra, Que par mercy ma grand' peine faudra.

### ELEGIE XVIII

Filz de Venus voz deux yeux desbendez.
Et mes escrits lisez & entendez,
Pour voir comment,
D'un desloyal servie me rendez:
Las, punissez le, ou bien luy commandez
Vivre autrement.

Je l'ay receu de grace honnestement, De moy mesdit par tout injustement, Et me blasonne. Helas faut il, qu'apres bon traitement, Un serviteur blasme indiscretement

Sa dame bonne?

Que feront ceux qu'on chasse, & abandonne? Si ceux, à qui le bon recueil on donne, Vivent ainsi?

Il faut, Amour, que peine on leur ordonne : Car plus à vous, qu'à nulle autre perfonne : Touche cecy.

Si à telz gens faites grace & mercy,

Noir deviendra vostre Regne esclercy,

Et fans police:

Et n'y aura femme, ne fille aussi, Qui ofe aymer craignant d'avoir soucy, Par leur malice.

La mauvaise herbe il faut qu'elle perisse : Et la Brebis mal saine faut qu'elle ysse Hors des troupeaux.

Jettez donc hors de l'amoureux fervice Ce mesdisant, qu'il n'apprenne son vice A vos feaux.

Certes on voit aux champs les Pastoureaux Leur soy garder, mieux que leurs gras Toreaux : Sans nul mal dire.

Mais en Palais; grans Villes & Chasteaux Foy n'y est rien, langues y font cousteaux Par trop mesdire.

Las qu'ay je dit? Pardonnez à mon ire : Tous ne font telz : j'en ay bien feu eslire Un tresloyal,

A qui mon cueur se lamente & souspire Des maux que j'ay par l'autre; qui est pire, Que desloyal.

A l'un (pour vray) l'autre n'est pas esgal : L'un est bon fruict, & l'autre Reagal, Poison mortelle.

L'un est d'esprit, l'autre est gros animal : L'un parle en bien, l'autre tousjours dit mal : Sa langue est telle.

De l'un reçoy tourment dur, & rebelle : De l'autre j'ay confolation belle, Dieu sçait combien. Brief : Amitié n'ha point peine éternelle :



Apres le mal j'ay rencontré en elle Singulier bien.

O toy, mon cueur bienheureux je te tien, D'avoir trouvé un tel Serviteur tien, Qui te conforte.

Et à bon droit je me complains tresbien, Que je ne l'ay plus tost retenu mien, Congnu sa sorte.

Las, de mon cueur luy ay fermé la porte. Pour à celuy, qui mal de moy rapporte, Mon cueur unir.

Grand mal je fey, austi peine j'en porte : Et croy que Dieu me l'envoye ainsi forte. Pour m'en punir.

Par ses faux tours me suis veu advenir Un grand vouloir de ne me souvenir D'homme qui vive.

Mais pour les faux les bons ne faut bannir : Et puis d'aymer on ne se peut tenir, Quoy qu'on estrive.

Tel veult fuyr, qui plus pres en arrive, Si loue Amour, qui plus qu'à femme vive, M'ha fait cest heur De me montrer la malice excessive D'un faux Amant, & la bonté naisve D'un Serviteur.

### ELEGIE XIX

T ant est mon cueur au vostre uny, & joinct, Qu'impossible est que l'ennuy, qui vous poinct

Ne sente au vis : mais si vostre constance
Venoit à faire à l'ennuy resistance,
Lors fortiriez de desolation,
Et j'entrerois en consolation,
En vous voyant n'estre plus desolée.
Si n'ay-je empris vous rendre consolée
En cest escrit, pour seulement oster
Le mal, que j'ay de vous voir mal porter,
Plustost, voudrois, certes qu'il fust permis,
Que vostre dueil avec le mien sust mis,
Aymant plus cher avoir double destresse,
Que d'en voir une en ma Dame, & Maistresse duand par vertu tel ennuy cesseroit.

La vertu propre, en cestuy cas, c'est force, Qui dueil abbat, & les tourmens esforce: Je ne dy point force du corps, & bras: S'ainsi estoit les Toreaux gros, & gras, Lions puissans, Elephans monstrueux Seroient beaucoup (plus que nous) vertueux. Ce que j'entens, c'est force de courage Pour soustenir d'infortune l'orage, Et resister à survenans malheurs.

N'est elle point parmy voz grans valeurs
Ceste vertu? Si est abondamment:
Vueillez la donc monstrer evidemment
En cest ennuy. Les estoilles celestes
Jamais ne sont que de nuict manifestes:
Aussi constance en nous ne peult bien luyre,
Qu'au temps obscur, que douleur nous vient nuire.
Aux grans assauts acquiert on les honneurs,
Et tant plus sont aigres les Blasonneurs,
Plus le Constant ha de loz meritoire.

Si ne faut point fur eux chercher victoire: Ilz fe vaincront, tant font ilz malheureux, Faifant tomber tous les blafmes fur eux.

Mais, qui est cil, ne celle en cestuy Monde, En qui douleur par faux raport n'abonde? Avant que nul soit jamais ici né, A ceste peine il est predestiné: Et tant plus est la personne excellente. Plus est subjécte à l'aigreur violente De telz assauts. Vous donques accomplie De dons exquis, dites, je vous supplie, Cuidez vous bien suir les violences Des mesdisans avec voz excellences?

Si vous voulez, qu'on n'ayt fur vous envie. Ne foyez plus de vertueuse vie : Ostez du corps cette exquise beauté: Ostez du cueur ceste grand loyauté: Ne foyez plus fur toutes estimée, Ne des loyaux Serviteurs bien aymée : Ayez autant de choses vitieuses, Que vous avez de vertus precieuses: Lors fe tairont. Ha, chere, & feule amie, Voulez-vous estre envers Dieu endormie, De recevoir tant de graces de luy, Et ne vouloir porter un feul ennuy? Ennuy (pour vray) n'est pas la pire chose Qui soit au cueur des personnes enclose : Petit ennuy un grand ennuy appaise: Brief, fans ennuy trop fade feroit l'aise : Et tout ainsi que les fades viandes\_ Avec aigreur on trouve plus friandes: Ainsi plaisir trop doux & vigoureux Meslé d'ennuy, semble plus savoureux.

Et d'autre part, raison vous fait savoir, Qu'impossible est de non tristesse avoir, Veu que tous ceux, qui le plus fort s'appuyent Sur leurs plaisirs, de leurs plaisirs s'ennuyent : Et deviendroit fascheuse leur liesse, Si quelque fois n'entrevenoit tristesse : Laquelle en fin se perd avec le temps, Dont en apres sont plus gays, & contens,

Or si ce dueil n'abbatez pas vertu,
Si sera il par le temps abbatu:
Mais la vertu de vous croire me fait,
Que ja le temps n'aura l'honneur du fait.
Le temps est bon pour les douleurs desfaire
De ceux, qui n'ont constance pour ce faire:
Mais vous Amie, avez en corps de Dame
Un cueur viril pour vous oster de l'ame
Vostre douleur, mieux qu'autre creature,
Ne que le temps, ne que mon escriture.

# ELEGIE XX

En est-il une en ceste terre basse,
Qui en tourment de tristesse me passe,
Ou qui en soyt autant, comme moy, pleine?
Faire se peult: mais je croy qu'à grand' peine
Se trouvera semme en lieu, ne saison,
Qui de se plaindre ayt si grande raison.

Desfous la grand' lumiere du Soleil Ne trouve point le Phenix son pareil : Et aussi peu je trouve ma pareille En juste dueil, qui la mort m'appareille, Le Phenix fuis des Dames langoureuses A trop grand tort, voyre des malheureuses, Et cil qui m'ha tous ces maux avancez, Est le Phenix des hommes insensez.

Las je me plains non point comme Dido Frappée au cueur du dard de Cupido: Ja ne m'orrez alleguer en mes plaintes Le mien Amant, comme Sappho, & maintes, Mais mon mary, dont plus mon cueur fe deult: Car les Amants abandonner on peult, Et les maris c'est force qu'ilz demeurent (Bons, ou mauvais) jusques à ce qu'ilz meurent.

Non que par moy luy foit mort desirée, Plustost voudrois sa pensée inspirée. A me traiter ainsi qu'il est licite, Ou comme il doit, ou comme je merite: Veu que mon cueur l'ayme, l'honnore & sert, Comme il convient, & non comme il dessert.

Pas ne dessert avoir à sa commande C'est en bon poinct, & ceste beauté grande, Que m'ha donné Nature à plein desir : Pas ne merite au chaste lict gesir De celle là, qui tant luy est feable.

Il ne faut pas qu'un œil tant aggreable Luy foit riant, ne que bouche tant belle En le baifant, mary, n'amy l'appelle: Et neantmoins, fuyvant Dieu & fa Loy, De mon franc vueil tous ces poincts ha de moy.

Mais c'est ingrat tout mal pour bien me baille. Il ha de moy le bon grain pour la paille, Humble Douceur pour siere Cruauté, Loyalle Foy pour grand' Desloyauté, Et pour Chagrin toute amoureuse approche,

Sans amollir fon cueur plus dur que roche.

Le fier Lion dessus le Chien ne met Patte, ne dent, quand à luy se submet : Les forts Romains, quand ilz s'humilierent Sous Attila, son cueur selon plierent : Le noir Pluton, à flechir mal aysé, Fut (par douceur) d'Orpheus appaisé.

Tout s'amollit par douceur tres benigne: Et toutesfoys la douceur feminine, Qui les douceurs de ce Monde furpasse, Devant les yeux de mon dur Mary passe, Sans l'esmouvoir: & tant plus me submets Tant plus me sert d'estranges, & durs mets, Par ainsi passe en cruautez iniques Lions, Tirans, & Monstres Plutoniques.

Certes quand bien je pense à mon malheur, Il me fouvient du Champestre Oyseleur, Lequel apres que l'Oyfellet de champs Il ha fceu prendre avec faints & doux chants, Le tue, & plume : ou, si vif le retient, Le met en Cage, & en langueur le tient : Ainsi (pour vray) fus prinse & arrestée, Et tout ainsi (helas) je suis traitée. Or si l'Oyseau maudit en son langage (Comme dit Meun) cil qui le tient en Cage : Pourquoy icy donques ne me plaindray-je De ce cruel, qui chacun jour r'engrege Mes longs ennuis? Le dueil qui est celé. Griefve trop plus, que s'il est revelé. Parquoy le mien donc revelé sera : Ma bouche au cueur ce grand plaisir fera. Et à qui, las? Sera ce à mon Marv, Que descharger iray mon cueur marry ?

Non certes, non: rien je n'y gaigneroye,
Fors qu'en mes pleurs plaisir luy donneroye,
Et à qui donc? doy-je par amour faire
Un Serviteur, duquel en mon assaire
J'auray conseil, & qui par amitié
De mes douleurs portera la moytié?
L'occasion le conseille, & le dit:
Mais avec Dieu honneur y contredit.
Pourtant Plaideurs aux amoureuses questes
Allez ailleurs presenter voz requestes:
Je ne feray ne Serviteur n'Amy,
Mais tiendray foy, à mon grand ennemy.

Donques à qui feray ma plainte amere? A vous ma chere, & honnorée Mere, C'est à vous seule, à qui s'offre, & presente Par vray devoir la complainte presente. Et devers vous s'envollent mes pensées, De grand ennuy (à grand tort) offensées, Pour y chercher allegeance certaine. Comme le Cerf, qui court à la Fontaine Querant remede à la soif, qui le presse: Nature aussi ne veult qu'ailleurs m'adresse.

Et si m'ha dit, si pour moy en ce Monde Y ha confort, qu'en vous seule il abonde : S'il est en vous (las) si m'en secourez.

S'il n'est en vous, avecques moy pleurez En maudissant Fortune, & ses alarmes: Et en mes pleurs entremessez vos larmes, Pour arrouser la fleur qu'avez produite, Qui s'en va toute en seiche herbe reduite.

### ELEGIE XXI

#### DE LA MORT D'ANNE L'HULIER

Que Venus est la plus belle Déesse, Il faut aussi, que de rien tu ne doubtes, Qu'elle que soit la plus male de toutes: Car quelque don, qui d'elle soit donné, (Tant soit-il doux) il est environné De plus de maux, que la Rose d'Espines: Et (qui pis est) si ses fraudes vulpines On fait suyr, ou si un chaste cueur D'aventure est de sa slamme vainqueur, Elle (soudain) devient toute enragée? Et tout ainsi, que s'on l'eust outragée, En prend vengeance. Helas piteuse preuve Toute recente à ce propos se treuve D'Anne qui sut jadis Orleanique.

Le cas est tel : La Déesse impudique
De son brandon (qui maintes semmes damne)
Jamais ne seut eschausser le cueur d'Anne.
Dont par despit sur le corps se vengea,
Et pour ce faire à Vulcan se rengea :
Car le pouvoir de Vénus est petit
Pour se venger selon son appetit.
A Vulcain donc son dueil elle declaire :
Qui tout subit (pour à Venus complaire)
De son chaut seu (bien autre qu'amoureux)
Vint allumer par un soir malheureux
D'Anne le liét chasse, & immaculé :

Et en dormant son beau corps ha bruslé: Duquel adonc l'ame noble s'osta, Et toute gaye au Ciel luysant sauta, Sans se sentir du seu de Vulcanus, Encores moins de celuy de Venus.

Or vit fon Ame, & le Corps est pery Par feu ardent. Mais, qui de son Mary Eust eu alors les larmes qu'espandues, Il ha depuis, pas ne sussent perdues, Comme elles sont, car de ses yeux sortir En seit assez pour ce seu amortir.

### ELEGIE XXII

DU RICHE INFORTUNÉ JAQUES DE]BEAUNE SEIGNEUR DE SEMBLANÇAY

En son gyron jadis me nourrissoit

Douce Fortune, & tant me cherissoit,

Qu'à plein souhait me faisoit delivrance

Des hauts honneurs, & grans thresors de France:

Mais ce pendant sa main gauche tresorde,

Secretement me filoit une Corde,

Qu'un de mes Serfz pour sauver sa jeunesse,

A mise au col de ma blanche vieillesse

Et de ma mort tant laide su la voye,

Que mes Ensans, lesquelz (helas) j'avoye

Haut eslevez en honneur, & pouvoir,

Haut esleve au Gibet m'ont peu voir.

Ma gloyre donc, que j'avois tant cherie, Fut avant moy devant mes yeux perie: Mes grans threfors, en lieu de fecourir, Honteusement me menerent mourir:

Mes Serviteurs, mes Amis & Parens N'ont peu fervir, que de pleurs apparens.

J'eu (en effect) des plus grans la faveur,
Ou au besoing trouvay fade saveur :
Mesmes le Roi son Pere m'appella :
Mais tell' faveur Justice n'esbranla.
Car elle ayant le mien criminel vice
Mieux espluché, que mon passé service,
Pres de Rigueur, loing de Misericorde
Me pronunça honte, misere, & corde :
Si qu'à mon los n'est chose demourée,
Qu'une constance en face colorée,
Qui jusqu'au pas de mort m'accompagna,
Et qui les cueurs du peuple tant gaigna,
Qu'estant messée avecques mes ans vieux
Feit larmoyer mes propres Envieux.

Certainement ma triomphante vie
Jadis mettoit en grand tourment Envie:
Mais de ma mort or'doibt estre contente.
Je qui avoys ferme entente, & attente
D'estre en Sepulchre honorable estendu,
Suis tout debout à Montsaucon pendu:
Là où le vent, quand est fort & nuysible,
Mon corps agite: & quand il est paisible,
Barbe, & cheveux tous blancs me fait bransler,
Ne plus ne moins, que fueilles d'arbre en l'air.
Mes yeux, jadis vigilans de Nature,
Des vieux Corbeaux sont devenus pasture:
Mon col, qui eut l'accol de Chevalier,
Est accolé de trop mortel collier.
Mon corps jadis bien logé, bien vestu,

Est à présent de la Gresle battu, Lavé de Pluye, et du Soleil seché, A plus vil lieu, qui peult estre cherché.

Or pour finir les regrets doloreux Partans du cueur du Riche malheureux, Roys, & Subjets, en moy vueillez apprendre, Oue vaut grand'charge à bailler & à prendre.

En mon vivant ne fut merveille à voir (Veu mon credit) si j'acquis grand avoir : Mais à ma mort on peut bien voir adonques Un des grans tours que Fortune seit onques.

Long-temps me feit appeller Roy de Tours, Mais puis qu'elle ha ufé de fes destours Sur moy vieillard, chetif, & miserable, Priez à Dieu (O Peuple venerable) Que l'Ame soit traitée, sans esmoy Mieux que le corps : & congnoissez par moy. Qu'Or, & Argent, dont tous plaisirs procedent. Causent douleurs, qui tous plaisirs excedent.

#### ELEGIE XXIII

#### DE JAN CHAUVIN MENESTRIER

Chauvin, fonnant fur Seine les aubades, Donna tel aise aux gentilles Naiades, Que l'un pour tous des aquatiques Dieux Parla ainsi: Le son melodieux De ce Chauvin, Frères, nous pourroit nuire Par traiét, de temps, & noz semmes seduire, Jusqu'à les faire yssir de la clere onde, Pour habiter la Terre large, & ronde.

Ne feit au chant de son Psalterion Sortir des eaux les Dauphins, Arion? Ne tira pas Orpheus Eurydice Hors des Enfers? Cela nous est indice, Que cestuy cy, qui mieux, que ces deux sonne, Et qui tant est gracieuse personne, Nous pourroit bien noz Nymphes suborner.

Ces mots finis, fe prindrent à tourner Ces Dieux jaloux, au tour de la Nacelle Du Bon Chauvin, & renversans icelle, L'ont en leurs eaux plongé, & suffoqué: Puis chacun d'eux des Nymphes s'est moqué, En leur disant, venez, Dames, venez, Voicy Chauvin, que si cher vous tenez: Commandez luy, que danser il vous face.

Lors, le baifant ainsi mort en la face,
Toutes sur luy de leurs yeux espandirent
Nouvelles eaux: & après le rendirent
Dessus la Terre es mains de ses Amis,
Qui l'ont ensemble en sepulture mis,
Et d'instruments de Musique divers
Au Roy du ciel, & du Monde univers
Ont rendu gloire, & immortelles graces,
De l'avoir mis hors des terrestres places,
Pleines de maux, pour le loger en lieu
Ou plus n'endure, & plus n'ossence Dieu.

# ELEGIE XXIV

G ENTE Danes de Juppiter aymée, Dedans la Tour d'Arain bien enfermée, Puis que Fortune, adverfe de tout bien, Est maintenant envieuse du mien : Puis que de l'œil elle m'ha destourné Le beau present, qu'elle m'avoit donné: Puis que parler à vous ne puis, & n'ose, Que puis je faire orendroit autre chose, Fors par escrit nouvelles vous mander De mon ennuy, & vous recommander Le cueur de moy, dont avez jouyssance : Le cueur, sur qui nulle autre n'ha puissance? Le cueur, qui fut de franchise interdit, Quand prisonnier en voz mains se rendit : Et derechef prisonnier confermé Avegues vous en la Tour enfermé. Je vous fupply par celuy dur tourment, Que nous fouffrons pour aymer loyaument, Qu'entre voz mains il face sa demeure, Jusques à tant, que l'un, ou l'autre meure. Tandis Fortune, avec cours temporel Se changera, fuyvant fon naturel: Et ne nous est si dure, & mal prospere, Comme paisible, & bonne je l'espere.

Parquoy, Amie, or vous reconfortez En cest espoir, & constamment portez L'une moytié de l'infortune forte: L'autre moytié croyez que je la porte. Mais ou sont ceux, qui ont eu leur desir En amitié, fans quelque desplaisir?
Il n'en est point certes, & n'en fut onques,
Et n'en sera. Ne vous estonnez donques:
Car j'apperçoy de loing venir le temps,
Que nous serons plus, que jamais, contens:
Et que de moy serez encor servie,
Sans nul danger, & en despit d'Envie.

# ELEGIE XXV

#### POUR MONSIEUR DE BARROYS:

A MA DAMOYSELLE DE HUBAN

L Serviteur de vous, chere maistresse,
D'un triste cueur cest escrit vous addresse
Pour salut humble, & pour vous advertir,
Qu'il m'est besoing d'aupres de vous partir :
Mais je ne puis bien vous rendre advertie,
Combien de dueil j'ay de la departie :
Parquoy vault mieux à voz pensers remettre
Ce que n'en puis par escriture mettre :
Ce neantmoins, puis qu'à l'heure presente
Encre, & Papier devant moy se presente,
Compter vous vueil un debat, qui m'esveille.

Toutes les fois que je dors, ou fommeille, Dire me vient (d'une part) mon Devoir, Qu'il m'est besoing, pour long temps ne vous voir, Me remonstrant que j'ay certain affaire Que trop je laisse à poursuyvre, & à faire,

Ţ.

Et que pour tost chose pressée ouvrer, Laisser on doibt ce, qu'on peult recouvrer.

De l'autre part Desir vient contredire
A mon Devoir, & luy vient ainsi dire:
Facheux Devoir, veux-tu qu'un Serviteur,
Qui quant à l'œil jamais ne se veit heur
Tel qu'à present, ores il abandonne
Ce bien exquis, que vraye amour luy donne?
Laissera il celle, qui est pourveuë
De tant de dons? laissera il la veuë
De ce regard de douceur accomply,
Sous le hazard d'estre mis en oubly?
Ainsi Desir, et mon Devoir me preschent:
Vous advisant, que tous deux tant m'empeschent
Que je ne say, auquel j'obeiray:
Parquoy, Maistresse, ici vous suppliray,
De m'advertir, qu'il convient, que je face.

Mon devoir veult, qu'essongne vostre face :
Desir me veult pres de vous retenir :
Mais à nul d'eux je ne me veux tenir :
Et n'en feray fors cela seulement
Qu'ordonnera vostre commandement,
Qui-dessus moy autant ha de puissance,
Que serviteurs doyvent d'obeissance.

# ELEGIE XXVI

A UNE, QUI REFUSA UN PRESENT.

Quand je vous dy (fans penfer mal assaire) J'ay, chere Sœur, un present à vous faire, Le prendrez vous? dès que m'eustes ouy, Dit ne me fut le contraire d'ouy : Parquoy, ma Sœur, si en vous l'envoyant Y ha forfait, chacun fera croyant, Que non de moy, mais de vous vient l'offence. Et pour renfort de ma juste defense, (Sans me vanter) ce mot bien dire j'ofe, Qu'en maint bon lieu j'ay donné mainte chofe, Que lon prenoit, fans penser le donneur Pretendre rien du prenant, que l'honneur. Que n'avez vous de moy ainti pensé? Jamais me fuis je en termes advancé Aupres de vous, qu'honneur, & Dieu ensemble N'y fussent mis? quelque fois, ce me semble, Je vous ay dit (si bien vous en souvient) Treschere Sœur, si service vous vient De mon costé, je vous supply n'entendre, Que je vous vueille obliger le me rendre, Brief: mes propos tenuz d'affection, Seront tesmoings de mon intention : Vous asseurant, que l'estime immuable, Que j'ay de vous, est si grande, & louable, Que rien par vous n'y peult estre augmenté, En refusant un offre presenté.

Il n'est pas dit (certes) que tous donneurs
Voysent cherchant (par tout) les deshonneurs:
Et n'est pas dit, que les Dames, qui prenent,
Font toutes mal, & qu'en prenant mesprenent:
Ce nonobstant, prendre n'exauceray
En mon escrit, & si confesseray,
Que bien souvent, quand à semme lon donne,
Le resuser est chose honneste, & bonne:
Mais bien souvent (à dire verité)

Il peult tourner en incivilité. Je sçay assés que de rien n'avez faute : Je sçay combien de cueur vous estes haute : Ce neantmoins (pour nourrir amytié) N'est mal seant, s'abbaisser de moytié. Quand tout est dit, nette sens ma pensée D'avoir fait cas, ou sovez offensée : Plustost devrois me sentir offensé Du mal, qu'avez (peult estre) en moy pensé: Veu que l'offrir, dont j'ay voulu user, En cas d'honneur vaut bien le refuser : Et croy, de fait, que si ce n'eust esté La Foy, que j'ay de vostre honnesteté, J'eusse pensé proceder mon defaut De n'avoir fait mon present assez haut : Mais Dieu me gard d'estre si transgresseur De l'amitié d'une si bonne Sœur, Qui congnoitra que Frere ne se treuve

# ELEGIE XXVII

Plus vray, que moy, me mettant à l'espreuve.

A UNE MALCONTENTE, D'AVOIR ESTÉ SOBREMENT LOUÉE; ET SE PLAIGNANT NON SOBREMENT.

Pour tous les biens qui font deça la Mer, Je ne voudrois vous, ny autre blafmer Contre raison: en sorte qu'on peust dire, Que je me mets voulontiers à mesdire. Mais si faut-il que vous croyez ausii, Que je n'ay pas tant besoing, Dieu mercy, De voz faveurs, qu'on me sist consentir, En vous louant, de slatter, ou mentir.

Je laisse à ceux faire ceste corvée, Qui n'ont encor nulle amie trouvée : Et sont contens de prendre tout en gré, Pour en Amours avoir quelque degré.

Je laisse à faire à ces Italiens, Ou Espagnolz, tombez en voz liens, Qui disent plus qu'onques ilz ne penserent, Pour avoir mieux encores qu'ilz n'esperent.

Car le plus lourd de telles nations Entend assez voz inclinations: Et sçavent bien que des pass estranges, Il ne vient rien si peu cher que louanges.

Ceux là diront, que les raiz de voz yeux Font devenir le Soleil envieux : Et que ce font deux Astres reluysans, Tout leur bonheur & malheur produysans.

En vous voyant, ilz feront esbahys, Comme Dieu meit tel bien en ce païs : Et beniront l'An, le Ciel, & l'Idée, D'où telle grace en terre est procedée.

Ilz vous diront que d'un ris feulement, Vous eschauffez le plus froid Element : Et que les biens, dont Arabie est pleine, N'approchent point de vostre douce aleine.

Ils jureront que voz mains font d'yvoire, Et que la neige, au pris de vous est noire. Voz blanches dents, ou plustost Diamans, Sont la prison des espritz des Amantz.

Et le Coral où elles font encloses,

Pallit le taint des plus vermeilles Roses. De voz cheveux, c'est moins que la raison De faire d'eux à l'Or comparaison.

Ilz vous diront que vostre doux langage Les cueurs humains aliene & engage: Et que l'accueil de voz douces manieres, Peut appaiser Mars entre ses bannieres.

Si vous touchez Espinettes ou Luts, Vous appaisez les subjets d'Eolus. Et si l'aller par les champs vous delecte, A chacun pas croist une violette.

Brief, nostre Siecle, où vous avez vescu, A les passez par vous seule vaincu. Et qui sçauroit tant de fables redire, Sans se fascher, ou sans mourir de rire? Ilz dient tant, que je croy que le tiers, En escrivant, sait rougir les papiers.

Or quant à moy, je ne fçauroys avoir Sens, ne loisir, d'apprendre ce fçavoir, Ne mon esprit est d'assez bonne marque Pour suyvre ainsi Jean de Meun, ou Petrarque.

Je diray bien, & ne mentiray point, Que fous les draps vous estes en bon point : Et que peult estre, on void mainte qui brague, Qui beaucoup pres n'est point si bonne bague.

Mais de parler qu'estes chose divine, On me diroit, que je songe, & devine, Car en ce corps fait de sucre & de miel, Y ha des cas trop peu dignes du ciel.






# EPISTRES

# MAGUELONNE A SON AMY PIERRE DE PROVENCE.

SUBSCRIPTION EN VERS ALEXANDRINS.

Messager de Venus pren ta haute volée. Cherche le seul Amant de ceste desolée : En quelque part qu'il rie, ou gemisse à present, De ce piteux escrit say luy un doux present.



Et non pas toy à present m'infortune : Car si tristesse avecques dur regret M'ha sait jetter maint gros souspir aigret, Certes je sçay, que d'ennuy les alarmes, T'ont fait jetter maintesoys maintes larmes,

O noble cueur, que je voulu choysir Pour mon Amant, ce n'est pas le plaisir, Qu'eusmes alors, qu'en la maison Royalle Du Roy mon Pere à t'amye loyalle Parlemantas, d'elle tout vis à vis : Si te promets, que bien m'estoit advis, Que tout le bien du Monde, & le deduit N'estoit que dueil, prés du gracieux fruit D'un des baifers, que de toy je receuz : Mais noz esprits par trop furent deceus, Ouand tout foudain la fatale Déeffe En duéil mua nostre grande liesse, Qui dura moins que celle de Dido: Car tost apres que l'enfant Cupido M'eut fait laisser mon pere, puissant Roy, Vinfmes entrer feulets en defarroy En un grand bois, où tu me descendis, Et ton manteau dessus l'herbe estendis, Et me disant, mamie Maguelonne, Repofons nous fur l'herbe, qui fleuronne, Et escoutons du Rossignol le chant.

Ainsi fut fait. Adonc en arrachant Fleurs, & boutons de beauté tresinsigne, Pour te monstrer de vraye Amour le signe, Je les jettoys de toy à l'environ, Puis devisant m'assis sur ton giron: Mais en comptant ce qu'avions en pensée, Sommeil me print, car j'estois bien lassée. Finalement m'endormy pres de toy: Dont contemplant quelque beauté en moy, Et te sentant en ta liberté franche,

Tu descouvris ma poytrine assez blanche, Dont de mon sein les deux pommes pareilles Veis à ton gré, & tes levres vermeilles Baiserent lors les miennes à desir.

Sans vilenie, en moy prins ton plaisir Plus que ravy, voyant ta douce amie Entre tes bras doucement endormie. Là tes beaux yeux ne se pouvoient saouler: Et tu disois (pour plus te consoler) Semblables mots en gemissant' aleine:

O beau Paris, je ne croy pas qu'Heleine Que tu ravis, parvenu dedans Grece, Eust de beauté autant que ma maistresse : Si on le dit, certes ce sont abus.

Difant ces mots, tu vis bien, que Phebus Du hassé noir rendoit ma couleur tainte, Dont te levas, & coupas branche mainte, Que tout autour de moy tu vins estendre Pour preserver ma face jeune, & tendre. Helas Amy, tu ne savois que saire A me traiter, obéir, & complaire, Comme celuy, duquel j'avois le cueur.

Mais cependant, ô gentil Belliqueur,
Je dormois fort, & Fortune veilloit:
Pour nostre mal (las) elle travailloit.
Car quand je fus de mon repos lassée,
En te cuidant donner une embrassée,
Pour mon las cueur grandement consoler,
En lieu de toy (las) je veins accoler
De mes deux bras la flairante ramée,
Qu'autour de moy avois mise, & semée,
En te disant, mon gracieux Amy,
Ay-je point trop à vostre gré dormy?

N'est-il pas temps, que d'icy je me leve?

Ce proferant, un peu je me sousseve,
Je cherche, & cours : je revien, & puss vois,
Autour de moy je ne vey que les Bois :
Dont maintesois t'appellay Pierre, Pierre,
As-tu le cueur endurcy plus que pierre,
De me laisser en cestuy Bois absconse?

Quand de nully n'euz aucune response, Et que ta voix point ne me reconsorte, A terre cheu, comme transsie, ou morte: Et quand apres mes langoureux esprits Quelque vigueur eurent un peu repris, Semblables mots je dy de cueur & bouche:

Helas, Amy, de prouesse la souche, Où es allé? Es-tu hors de ton sens De me livrer la douleur que je sens En ce Bois plein de bestes inhumaines?

M'as-tu osté des plaisances mondaines, Que je prenois en la maison mon Pere, Pour me laisser en ce cruel repaire? Las, qu'as-tu fait, de t'en partir ainsi? Penses-tu bien, que puisse vivre icy? Que t'ay-je sait, ô cueur lasche, & immunde!

Si tu estois le plus noble du Monde, Ce vilain tour si rudement te blesse, Qu'oster te peult le tiltre de noblesse. O cueur remply de fallace, & faintise! O cueur plus dur que n'est la roche bise! O cueur plus faux qu'onques nasquit de mere!

Mais respons moy à ma complainte amere :
Me promis-tu en ma chambre parée,
Quand te promis suivre jour, & serée,
De me laisser en ce Bois en dormant?

Certes tu es le plus cruel Amant, Qui oncques fut, d'ainsi m'avoir fraudée : Ne fuis-je pas la seconde Medée? Certes ouy : & à bonne raison Dire te puis estre un second Jason.

Difant ces mots, d'un animé courage, Te vois querant, comme pleine de rage Parmy les Bois, fans doubter nuls travaux : Et fur ce poinct recontray noz chevaux Encor liez, paissans l'herbe nouvelle, Dont ma douleur renforce, & renouvelle : Car bien congneu, que de ta voulenté D'aveques moy ne t'estois absenté : Si commençay, comme de douleur teinte, Plus que devant faire telle complainte.

Or voy-je bien (Amy) & bien appert, Que maugré toy en cestuy Bois desert Suis demourée. O Fortune indecente: Ce n'est pas or ne de l'heure presente, Que tu te prens à ceux de haute touche, Et aux loyaux. Quell' rancune te touche? Es-tu d'envie entachée, & pollue, Dont nostre Amour n'ha esté dissolue?

O cher amy, ô cueur doux, & benin, Que n'ay-je prins d'Atropos le venin Aveques toy? voulois-tu, que ma vie Fust encor' plus cruellement ravie? Je te promets, qu'onques à creature Il ne survint si piteuse adventure. Et t'ay à tort nommé, & sans raison Le desloyal, qui conquit la toison: Pardonne moy, certes je m'en repens.

O fiers Lyons, & venimeux Serpens,

Crapaux enflez, & toutes autres bestes
Courez vers moy, & soyez toutes prestes
De devorer ma jeune & tendre chair,
Que mon amy n'ha pas voulu toucher
Qu'avec honneur. Ainsi morne demeure
Par trop crier: & plus noire que meure,
Sentant mon cueur plus froid, que glace, ou marbre:
Et de ce pas montay dessus un arbre
A grand labeur. Lors ma veuë s'espart
En la Forest: mais en chacune part
Je n'entendy, que les vois treshydeuses,
Et hurlemens des bestes dangereuses.

De tous costez regardois, pour favoir Si le tien corps pourroye appercevoir: Mais je ne vy, que celuy Bois fauvage, La Mer profonde, & perilleux rivage, Qui durement feit mon mal empirer.

Là demouray (non pas fans fouspirer) Toute la nuict: ô vierge treshautaine, Raison y eut, car je suis trescertaine, Qu'onques Thysbé, qui à la mort s'offrit Pour Piramus, tant de mal ne soussirie.

En évitant que les Loups d'adventure
De mon corps tien ne feissent leur pasture,
Toute la nuiet je passai sans dormir
Sur ce grand arbre, où ne sey que gemir:
Et au matin, que la clere Aurora
En ce bas Monde esclercy le jour ha,
Me descendy, triste, morne, & pallie,
Et noz Chevaux en plorant je deslie,
En leur disant: ainsi comme je pense,
Que vostre maistre au loing de ma presence
S'en va errant par le Monde en esmoy,

C'est bien raison, que (comme luy, & moy) Alliez, seulets par Bois, Plaine, & Campagne.

Adonc rencontre une haute montagne:
Et de ce lieu les Pelerins errans
Je pouvois voir, qui tiroient fur les rengs
Du grand chemin de Romme fainte, & digne.
Lors devant moy vey une Pelerine,
A qui donnay mon Royal vestement
Pour le sien povre: & dès lors promptement
La tienne amour si m'incita grand' erre
A te chercher en haute Mer, & Terre:
Où maintesois de ton nom m'enqueroie,
Et Dieu tout bon souvent je requeroie,
Que de par toy je susse rencontrée.

Tant cheminay que vins en la contrée,
De Lombardie, en foucy trefamer:
Et de ce lieu me jettay fur la Mer,
Où le bon vent si bien la Nef avance,
Qu'elle aborda au pass de Provence:
Où mainte gent, en allant, me racompte
De ton depart: & que ton pere (Conte
De ce pass) durement s'en contriste:
Ta noble mere en ha le cueur si triste,
Qu'en desespoir luy conviendra mourir.

Penses-tu point donques nous secourir?
Veux-tu laisser ceste povre loyalle
Née de sang, & semence Royalle,
En ceste simple & miserable vie?
Laquelle encor de ton amour ravie,
En attendant de toy aucun rapport,
Un Hospital ha basty sur un port
Dict de saint Pierre, en bonne souvenance
De ton haut nom: & là prend sa plaisance

A gouverner, à l'honneur du haut Dieu,
Povres errans malades en ce lieu:
Où j'ay basty ces miens tristes escrits
En amertume, en pleurs, larmes, & cris,
Comme peult voir, qu'ilz sont faitz, & tissus:
Et si bien voys la main dont sont issus,
Ingrat seras, si en cest Hospital,
Celle qui t'ha donné son cueur total,
Tu ne viens voir: car Virginité pure
Te gardera, sans aucune rompure:
Et de mon corps seras seul jouyssant.

Mais s'ainsi n'est, mon aage fleurissant Consumeray sans joye singuliere Et povreté, comme une Hospitaliere.

Donques (Amy) vien me voir de ta grace : Car tien toy feur qu'en ceste povre place Je me tiendray, attendant des nouvelles De toy, qui tant mes regrets renouvelles.

### LE DESPOURVEU, A MA DAME LA DUCHESSE D'ALENÇON, ET DE BERRY, SŒUR UNIQUE DU ROY.

St j'ay empris en ma simple jeunesse
De vous escrire, ô treshaute Princesse,
Je vous supply, que par douceur humaine
Me pardonnez: car Bon vouloir, qui meine
Le mien desir, me donna esperance,
Que vostre noble, & digne preference

Regarderoit, par un fens tresillustre, Que petit feu ne peult jetter grand lustre.

Autre raifon, qui m'induit & inspire De plus en plus le mien cas vous escrire, C'est qu'une nuict tenebreuse & obscure, Me fut advis, que le grand Dieu Mercure, Chef d'Eloquence, en partant des hauts cieux S'en vint en terre apparoistre à mes yeux, Tenant en main sa verge & Caducée De deux Serpens par ordre entrelassée : Et quand il eut sa face celestine (Qui des humains la memoire illumine) Tournée à moy, contenance, ne geste Ne peuz tenir, voyant ce corps celeste, Qui, d'un amour entremessée d'ire, Me commença femblables mots à dire.

#### MERCURE

Mille douleurs te feront fouspirer. Si en mon art tu ne veux inspirer Le tien esprit par cure diligente : Car bien peu sert la Poësie gente, Si bien, & los on n'en veult attirer.

Et s'autrement tu n'y veux aspirer, Certes, Amy, pour ton dueil empirer, Tu fouffriras des fois plus de cinquante Mille douleurs.

Donc si tu quiers au grand chemin tirer D'honneur, & bien, vueille toy retirer Vers d'Alançon la Duchesse excellente, Et de tes faits, télz qu'il sont luy presente : Car elle peult te garder d'endurer Mille douleurs.

#### L'AUTEUR

Apres ces mots, fes aifles esbranla, Et vers les cours celestes s'en alla L'eloquent Dieu: mais à peine fut-il Monté au Ciel par son voller subtil, Que dedans moy (ainsi qu'il me sembla) Tout le plaisir du Monde s'assembla.

Les bons propos, les raifons fingulieres Je vois cherchant, & les belles matieres, A celle fin de faire œuvre duifante • Pour Dame tant en vertus reluifante.

Que diray plus? Certes les miens esprits Furent dès lors comme de joye esprits Bien disposez d'une veine subtile, De vous escrire en un souverain style : Mais tout foudain, Dame tretvertueuse, Vers moy s'en vint une vieille hydeuse, Maigre de corps, & de face blesmie, Qui se disoit de Fortune ennemie': Le cueur avoit plus froid que glace ou marbre, Le corps tremblant, comme la fueille en l'arbre Les yeux baissez, comme de peur estrainte, Et s'appelloit par fon propre nom Crainte : Laquelle lors d'un vouloir inhumain Me fait faillir la plume hors la main: Que sur papier tost je voulois coucher, Pour au labeur mes esprits empescher: Et tous ces mots de me dire print cure, Mal confonans à ceux du Dieu Mercure

#### CRAINTE

Trop hardiment entreprens, & meffai O toy tant jeune, ofes-tu bien tes faits Si mal bastis presenter devant celle, Qui de savoir toutes autres precelle? Mal peult aller, qui charge trop grand faix.

Tous tes labeurs ne font que contrefaits, Auprés de ceux des Orateurs parfaits, Qui craignent bien de s'addresser à elle Trop hardiment.

Si ton sens foible advisoit les forfaits Aisez à faire en tes simples essets, Tu dirois bien que petite Nacelle Trop plus souvent, que la grande, chancelle : Et pour autant regarde que tu fais Trop hardiment.

#### L'AUTEUR

Ces mots finis, demeure mon femblant Trifte, transi, tout terny, tout tremblant, Sombre, fongeant, fans feure foustenance, Dur d'esperit, denué d'esperance, Melancolic, morne, marry, mufant, Palle, perplex, paoureux, pensif, pensant, Foible, failly, foulé, fafché, forclus, Confus, courcé. Croyre Crainte conclus Bien congnoissant que vérité disoit De celle là, que tant elle prisoit : Dont je perds cueur, & audace me laisse, Crainte me tient, Doubte me meine en laisse, Plus dur devient le mien esprit, qu'enclume : Si ruay jus encre, papier, & plume: Voire, & defait proposois de mon tistre Jamais pour vous Rondeau, Loy, ou Epistre, Si n'eust ésté, que sur ceste entreprise Vint arriver (à tout fa barbe grife)

Un bon Vieillard, portant chere joyeuse, Confortatif, de parolle amoureuse. Bien ressemblant homme de grand renom, Et s'appelloit Bon espoir par son nom: Lequel voyant ceste semme tremblante, Autre qu'humaine (à la voir) ressemblante Vouloir ainsi mon malheur pourchasser, Fort rudement s'essorça la chasser, En m'incitant d'avoir hardy courage De besongner, & saire à ce coup rage. Puis solle crainte amie de Soucy Irrita fort, en s'escriant ainsi.

#### BON ESPOIR

Va t'en ailleurs, faulse Vieille dolente, Grande ennemie à Fortune, & Bonheur, Sans forvoyer par ta parolle lente Ce povre humain hors la voye d'honneur: Et toy Amy croy moy, car guerdonneur Je te feray si craintif ne te sens: Croy donc Mercure, employe tes cinq sens, Cueur, & esprit, & fantasse toute A composer nouveaux mots, & recens, En dechassant, Crainte, Soucy, & Doubte.

Car celle là, vers qui tu as entente De t'addresser, est pleine de liqueur D'humilité, ceste vertu patente, De qui jamais vice ne fut vainqueur. Et (outre plus) c'est la Dame de cueur Mieux excusant les esperits, & sens Des Escrivains tant soient ilz innocens, Et qui plussoft leurs miseres deboute. Si te supply, à mon vueil condescens, En dechassant Crainte, Soucy, & Doubte.

Est-il possible, en vertu excellente,
Qu'un corps tout seul puisse estre possesseur
De trois beaux dons, de Juno l'opulente,
Pallas, Venus? ouy: car je suis seur,
Qu'elle ha prudence, Avoir, Beauté, Douceur,
Et de Vertus encor plus de cinq cens.
Parquoy, amy, si tes ditz sont decens,
Tu congnoistras (& de ce ne te doubte)
A quel honneur viennent Adolescens
En dechassant Crainte, Soucy, & Doubte.

# Envoy.

Homme craintif, tenant rentes, & cens Des Muses, croy, si jamais tu descends Au val de Peur, qui hors espoir te boute, Mal t'en ira: pource à moy te consens, En dechassant Crainte, Soucy, & Doubte.

#### LE DESPORVEU

En ce propos grandement travaillay.
Jusques à tant qu'en surfaut m'esveillay,
Un peu devant qu'Aurora (la fourrière
Du cler Phebus) commençast mettre arrière
L'obscurité nocturne sans sejour,
Pour esclarcir la belle Aube du jour.

Si me fouvint tout à coup de mon fonge, Dont la pluspart, n'est fable ne mensonge : A tout le moins pas ne fut mensonger Le bon Espoir, qui vint à mon songer : Car verité feit en luy apparoistre Par les vertus, qu'en vous il disoit estre. Or ay-je fait au vueil du Dieu Mercure : Or ay-je prins la hardiesse, & cure
De vous escrire à mon petit povoir,
Me confiant aux parolles d'Espoir
Le bon Vieillard, vray confort des craintifz,
A droit nommé repaisseur des chetifz:
Car repeu m'ha tousjours sous bonne entente
En la forest nommée Longue attente:
Voire, & encor de m'y tenir s'attend,
Si vostre grace envers moy ne s'estend:
Parquoy convient, qu'en esperant je vive,
Et qu'en vivant tristesse me poursuive.

Ainsi je suis poursuy, & poursuivant D'estre le moindre, & plus petit servant De vostre hostel (magnanime Princesse) Ayant espoir que la vostre noblesse Me recevra, non pour aucune chose, Qui soit en moy pour vous servir enclose: Non pour prier, requeste, ou rhetorique, Mais pour l'amour de vostre Frere unique, Roy des François qui à l'heure presente Vers vous m'envoye, & à vous me presente De par Pothon, gentilhomme honnorable.

En me prenant, Princesse venerable,
Dire pourray, que la Nes opportune
Aura tiré de la mer d'Infortune,
Maugré les vents, jusque en l'Isle d'honneur
Le Pelerin exempté de bon heur:
Et si auray par un ardant desir
Cueur, & raison de prendre tout plaisir
A esveiller mes esperits indignes
De vous servir, pour faire œuvres condignes
Telz qu'il plaira à vous treshaute Dame
Les commander: priant de cueur & d'ame

Dieu tout puissant, de tous humains le pere, Vous maintenir en fortune prospere : Et dans cent ans prendre l'ame à mercy Partant du corps sans douleur, ne soucy.

# DU CAMP D'ATTIGNY, A MADITE DAME D'ALENÇON

#### SUBSCRIPTION

Lettre mal faite, & mal escrite Volle de par cest escrivant Vers la plus noble Marguerite, Qui soit point au Monde vivant.

L'a main tremblant dessus la blanche carte Me voy souvent, la plume loing s'escarte, L'encre blanchit, & l'esperit prend cesse, Quand j'entrepren (tresillustre Princesse) Vous faire escrits: & n'eusse prins l'audace, Mais Bon vouloir, qui toute peur esface, M'ha dit: Crains tu à escrire soudain Vers celle là, qui onques en desdain Ne print tes faits? ainsi à l'estourdy Me suis monstré (peult estre) trop hardy: Bien congnoissant, neantmoins, que la saute Ne vient sinon d'entreprise trop haute: Mais je m'atten, que sous vostre recueil Sera congneu le zelle de mon vueil.

Or est ainsi, Princesse magnanime, Qu'en haut honneur, & triomphe sublime Est fleurissant en ce Camp, où nous sommes, Le conquerant des cueurs des Gentilshommes, C'est Monseigneur par sa vertu loyalle Esseu en chef de l'armée Royalle:
Où l'on ha veu de guerre maints esbats, Adventuriers esmouvoir gros combats
Pour leur plaisir sur petites querelles,
Glaives tirer, & briser allumelles,
S'entrenavrans de saçon fort estrange:
Car le cueur ont si tres haut, qu'en la sange
Plustost mourront que suir à la lice:
Mais Monseigneur, en y mettant police,
Ha dessendu de ne tirer espée,
Si on ne veut avoir la main couppée.

Ainsi Pietons n'osent plus desgainer,
Dont sont contrains au poil s'entretrainer,
Car sans combattre ilz languissent en vie:
Et cry (tout seur) qu'ilz ont trop plus d'envie
D'aller mourir en guerre honnestement,
Que demeurer chez eux oysivement.

Ne pensez pas, Dame où tout bien abonde, Qu'on puisse voir plus beaux hommes au Monde: Car (à vray dire) il semble que Nature Leur ayt donné corpulence, & facture Ainsi puissante, avec le cueur de mesmes, Pour conquerir Sceptres, & Diadesmes En Mer, à pied, sur Coursiers, ou Genets: Et ne deplaise à tous noz Lansquenets, Qui ont le bruit de tenir aucun ordre, Car à ceux cy n'ha point tant à remordre.

Et qui d'entre eux l'honnesteté demande, Voise orendroit voir de Mouy la bande D'adventuriers yssus de nobles gens : Nobles font ilz, pompeux, & diligens, Car chacun jour au Camp fous leur enseigne Font exercice, & l'un à l'autre enseigne A tenir ordre, & manier la Pique, Ou le Verdun, sans prendre noise, ou pique.

De l'autre part, fous ses siers Estandars Meine Boucal mille puissans souldars, Qui ayment plus debats, & grosses guerres, Qu'un Laboureur bonne paix en ses terres. Et qu'ainsi soit, quand rudement se battent, Advis leur est proprement, qu'ilz s'ebattent.

D'autre costé, voit-on le plus souvent Lorges jetter ses Enseignes au vent, Pour ses Pietons saire usiter aux armes, Lors que viendront les perilleux vacarmes : Grans hommes sont en ordre triomphans, Jeunes, hardis, roides, comme Elephans, Fort bien armez corps, testes, bras, & gorges : Aussi dit-on, les Hallecrets de Lorges.

Puis de Mouy, les nobles, & gentils,
Et de Boucal les hommes peu craintifs:
Brief, Hercules, Montmoreau, & Danieres
Ne font pas moins triompher leurs bannieres:
Si que deça on ne fauroit trouver
Homme, qui n'ayt desir de s'esprouver,
Pour acquerir par haut œuvre bellique
L'amour du Roy, le vostre Frere unique.
Et parainsi, en bataille, ou assaut
N'y aura cil, qui ne prenne cueur haut,
Car la pluspart si hardiment ira,
Que tout' le reste au choc s'enhardira.

De jour en jour une Campaigne verte Voit-on icy de gens toute couverte,

La Pique au poing, les trenchantes Efpées
Ceinctes adroit, chausseures decoupées,
Plumes au vent, & hauts sistres sonner
Sus gros tabours, qui font l'air resonner:
Au son desquelz, d'une siere façon,
Marchent en ordre, & font le limaçon,
Comme en bataille, asin de ne faillir,
Quand leur faudra dessendre, ou assaillir,
Tousjours crians, les Ennemis sont nostres:
Et en tel poinct sont les six mill' Apostres
Deliberez sous l'espée Saint Pol,
Sans qu'aucun d'eux se monstre lache, ou mol.

Souventesfois par devant la maifon De Monfeigneur, viennent à grand' foifon Donner l'aubade à coups de Hacquebutes, D'un autre accord qu'Espinettes, ou Flustes.

Apres oyt on fur icelle prerie Par grand terreur bruire l'Artillerie, Comme Canons doubles, & racoursis, Chargez de poudre, & gros boulets massifs, Faisans tel bruit, qu'il semble que la Terre Contre le Ciel vueille faire la guerre.

Voila comment (Dame tresrenommée) Triomphamment est conduite l'Armée, Trop mieux aymant combatre à dure outrance, Que retourner (sans coup ferir) en France.

De Monfeigneur, qui escrire en voudroit, Plus cler esprit, que le mien, y faudroit : Puis je sens bien ma Plume trop ruralle Pour exalter sa maison libéralle, Qui à chacun est ouverte, & patente.

Son cueur tant bon Gentils hommes contente : Son bon vouloir gens de guerre entretient :

Sa grand' vertu bonne justice tient : Et sa justice en guerre la paix fait : Tant que chacun va disant (en effect) Voicy celuy, tant liberal, & large, Qui bien merite avoir Royalle charge. C'est celuy là, qui tousjours en ses mains Tient, & tiendra l'Amour de tous humains : Car puis le temps de Cesar dict Auguste, On n'ha point veu Prince au monde plus juste. Tel est le bruit qui de luy court sans cesse Entre le peuple, & ceux de la Noblesse, Qui chacun jour honneur faire luy viennent Dedans sa chambre, où maints propos se tiennent, Non pas d'Ovfeaux, de Chiens, ne leurs abovs : Tous leurs devis ce font Haches, Gros bois, Lances, Harnois, Estendars, Goufanons, Salpestre, Feu, Bombardes, & Canons: Et femble advis à les ouyr parler, Qu'onques ne fut memoire de baller. J'escrirois bien encores autre chose, Mais mieux me vaut rendre ma lettre close En cest endroit, car les Muses entendent Mon rude style, & du tout me desfendent De plus rien dire, afin qu'en cuydant plaire, Trop long escrit ne cause le contraire. Et pour autant, Princesse cordialle, (Tige partant de la fleur Lilialle) Je vous supply ceste Epistre en gré prendre, Me pardonnant de mon trop entreprendre, Et m'estimer (si peu que le dessers) Tousjours du reng de vos treshumbles ferfs. Priant celuy, qui les ames heurées

Fait triompher aux maisons Syderées,

Que son vouloir, & souverain plaisir, Soit mettre à fin vostre plus haut desir.

# A LA DITE DAME TOUCHANT L'ARMÉE DU ROY EN HAYNAUT

Icy voit-on (tresillustre Princesse) du Roy la triom-I phante armée : qui un Mecredy (comme favez) s'attendant avoir la Bataille, par parolles persuadantes à le bien fervir, esleva le cueur de ses gens à si voluntaire force, qu'alors ilz eussent non seulement combatu, mais foudroyé le reste du Monde pour ce jour : auquel fut veuë la hautesse de cueur de maints Chevaliers, qui par ardant desir voulurent poulser en la flotte des Ennemis, lors qu'en diffamée fuite tournerent, laissant grand nombre des leurs ruynez en la Campaigne par impetueux orage d'Artillerie, dont fut attaint le Bastard d'Aimery, si au vif, que le lendemain fina ses jours à Vallenciennes. Apres peult on voir des anciens Capitaines la rufée conduite : de leurs gens d'armes la discipline militaire observée : l'ardeur des Adventuriers & l'ordre des Suysses avec le triomphe general de l'armée Gallicane : dont la veuë feulement ha meurtry l'honneur de Haynaut, comme le Bafilique premier voyant l'homme mortel. Autre chofe (ma fouveraine Dame) ne voyons nous, qui ne soit lamentable, comme povres femmes desolées errantes (leurs enfans au col) au travers du païs despouillé de Verdure par le froid yvernal, qui ja les commence à poindre : puis s'en vont chauffer en leurs Villes, Villages, & Chasteaux mis à feu,

combustion, & ruine totale, par vengeance reciproque: voire vengeance si confuse, & universelle, que noz Ennemis propres font assez pitié devant noz yeux. Et en telle miserable façon, ceste impitoyable ferpente, la Guerre, ha obscurcy l'air pur, & net, par poudre de terre feche, par falpestre, & poudre artificielle, & par fumée caufée du bois mortel ardant en feu (sans eaue de grace) inextinguible. Mais nostre espoir par deça est, que les prieres d'entre vous nobles Princesses monteront si avant es chambres celestes, qu'au moyen d'icelles, la tressacrée fille de Jesu-Christ, nominée Paix descendra trop plus luyfante, que le Soleil, pour illuminer les regions Galliques. Et lors fera vostre noble fang hors du danger d'estre espandu sur les mortelles plaines. D'autre part aux cueurs des jeunes Dames & Damoyfelles entrera certaine esperance du retour desiré de leurs Maris, & vivront povres Laboureurs feurement en leurs habitacles, comme Prelatz en chambres bien nattées. Ainsi, bienheurée Princesse, esperons nous la non assez soudaine venue de Paix : qui toutesfois peult finalement revenir en despit de Guerre cruelle : comme tesmoingne Minfant en sa Comedie de fatalle destinée, disant :

Paix engendre Prosperité:

De Prosperité, vient Richesse:

De Richesse, Orgueil, Volupté:

D'Orgueil, Contention sans cesse:

Contention la Guerre addresse:

La Guerre engendre povreté:

La Povreté, Humilité:

D'Humilité revient la Paix:

Ainsi retournent humains faits.

Voila comment (au pis aller, dont Dieu nous gard, peult revenir celle precieuse Dame souvent appellée par la nation Françoise, dedans les Temples divins, chantans: Seigneur, donne nous Paix. Laquelle nous vueille de brief envoyer iceluy Seigneur, & Redempteur Jesus, qui vous doint heureuse vie transitoire, & ensin eternelle.

# A LA DAMOYSELLE NEGLIGENTE DE VENIR VOIR SES AMIS

Ne pense pas, tresgente Damoyselle,
Ne pense pas que l'amour, & vray zelle
Que te portons; jamais finisse, & meure
Pour ta trop longue, & facheuse demeure,
Facheuse est elle, au moins en noz endroits:
Mais ores quand quarante ans te tiendrois
Loing de noz yeux, si auroit on (pour voir)
Recors de toy, & dueil de ne te voir:
Car le long temps, ne l'absence loingtaine
Vaincre ne peult l'amour vraye, & certaine.

Si t'advisons nostre Amie treschere, Que pardeça ne se fait bonne chere, Que de t'avoir on ne face un souhait : Si l'un s'en rid, si l'autre est à souhait, Si l'un s'esbat, si l'autre se recrée, Si tost qu'on tient propos, qui nous agrée, Tant que le cueur de plaisir nous sautelle, Pleust or à Dieu (ce dit on) qu'une telle Fust or icy. L'autre dit, pleust à Dieu, Qu'un ange l'eust transportée en ce lieu : Mais pleust à Dieu (dit l'autre) qu'Astarot L'apportast faine, aussi tost qu'un garrot.

Voila comment pour ta fort bonne grace, Il n'y ha cil qui fon fouhait ne face D'estre avec toy: & ne pouvons favoir, Parquoy ne viens tes Amis deça voir : Le chemin n'est ny facheux, ny crotté, En moins d'avoir dit un Obsecro te, En noz quartiers tu serois arrivée : Pourquoy donc es de nous ainsi privée? Possible n'est que bien t'escuser seusses. Brief nous voudrions, qu'aussi haut voler peusles, Que le haut mont d'Olympe, ou Parnasus Ou qu'eusses or le Cheval Pegasus, Qui te portast volant par les Provinces: Ou qu'à present à ton vouloir tu tinses Par le licol, par queuë, ou par colet Le bon Cheval du gentil Pacolet : Ou que ton pied fust aussi legier donques, Que Biche, ou Cerf, que le Roy chassa onques : Ou que de là jusqu'icy courust eau, Qui devers nous te menast en Bateau. Lors n'aurovs tu bonne excuse jamais, Mais fauroit on si en oubly tu mets Les tiens Amis. Car adonc ne tiendroit, Fors feulement au bon vouloir, & droit, Et à l'Amour qui aux gens donne foing, De venir voir les Amis au besoing : Quoy qu'envers toy n'avons peur qu'elle faille, Mais prions Dieu, qu'excuse te defaille : Afin qu'Amour, qui onc ne te laissa, A noz desirs t'amene pardeça.

#### DES JARTIERES BLANCHES

E mes couleurs, ma nouvelle Alliée, Estre ne peult vostre jambe liée, Car couleurs n'ay & n'en porteray mie Jusques a tant, que j'auray une Amie, Qui me taindra le feul blanc que je porte, En ses couleurs de quelque belle sorte. Pleust or' à Dieu, pour mes douleurs estaindre, Que vous eussiez vouloir de les me taindre : C'est qu'il vous pleust pour Amy me choisir, D'aussi bon cueur que j'en ay bon desir. Que dy-je, Amy? Mais pour humble fervant, Quoy que ne sove un tel bien desservant. Mais quoy? au fort, par loyaument fervir Je tacheroye à bien le desfervir. Brief, pour le moins, tout le temps de ma vie D'une autre aymer ne me prendroit envie. Et par ainsi quand ferme je seroys, Pour prendre noir, le blanc je laisserovs : Car fermeté c'est le noir par droiture, Pource que perdre il ne peult sa tainture.

Or porteray le blanc, ce temps pendant Bonne Fortune en Amour attendant, Si elle vient, elle sera receuë Par loyauté dedans mon cueur conceuë: S'elle ne vient, de ma voulonté franche, Je porteray tousiours livrée blanche: C'est celle là, que j'ayme le plus fort Pour le present: vous advisant au fort, Si j'ayme bien les blanches ceinturettes. J'ayme encor mieux Dames qui sont brunettes.

#### AU ROY

Ex m'esbatant je fay Rondeaux en Rime,
Et en rimant bien fouvent je m'enrime:
Brief, c'est pitié d'entre nous Rimailleurs,
Car vous trouvez assez de rime ailleurs,
Et quand vous plaist, mieux que moy, rimassez,
Des biens avez & de la rime assez:
Mais moy à tout ma rime, & ma rimaille.
Je ne soustien (dont je suis marry) maille.

Or ce me dit (un jour) quelque Rimart Viença, Marot, trouves tu en Rime art, Qui ferve aux gens, toy qui as rimassé? Ouy vrayement (dy je) Henry Macé. Car vois tu bien la personne rimante, Qui au Jardin de son sens la rime ente, Si elle n'ha des biens en rimoyant, Elle prendra plaisir en rime oyant: Et m'est advis que si je ne rimoys, Mon povre corps ne seroit nourry moys, Ne demy jour. Car la moindre rimette C'est le plaisir, ou faut que mon ris mette.

Si vous fupply, qu'à ce jeune rimeur Faciez avoir un jour par fa rime heur. Afin qu'on die, en profe, ou en rimant, Ce Rimailleur, qui s'alloit enrimant, Tant rimassa, rima, & rimonna, Qu'il ha congneu, quel bien par rime on ha.



#### POUR LE CAPITAINE BOURGEON

#### A MONSIEUR DE LA ROQUE

OMME à celuy en qui plus fort j'espere,
Et que je tien pour pere, & plus que pere,
A vous me plains par cest escrit leger,
Que je ne puis de Paris desloger,
Et si en ay vouloir tel comme il faut :
Mais quoy? c'est tout, la reste me dessaut,
J'entens cela qui m'est le plus duisant.

Mais que me vaut d'aller tant devifant?
Venons au poinct, vous favez fans reproche,
Que fuis boiteux, aux moins, comme je cloche:
Mais je ne fay si vous favez, comment
Je n'ay Cheval, ne Mule, ne Jument:
Parquoy Monsieur, je le vous fay favoir,
A celle sin que m'en faciez avoir:
Ou il faudra (la chose est toute seure)
Que voise à pied, ou bien que je demeure:
Car en siner je ne m'attends d'ailleurs:
Raison pourquoy? Il n'est plus de bailleurs,
Si non de ceux, lesquelz dormiroient bien:
Si vous supply, le trescher Seigneur mien,
Baillez assez, mais ne vueillez dormir.

Quand Desespoir me veult faire gemir, Voicy comment bien fort de luy me moque, O Desespoir, croy, que sous une Roque, Roque bien ferme, & pleine d'asseurance, Pour mon secours est cachée Esperance, Si elle en sort, te donnera carriere, Et pource donc reculle toy arriere. Lors Desespoir s'en va saignant du nez, Mais ce n'est rien, si vous ne l'eschinez : Car autrement jamais ne cessera De tourmenter le Bourgeon, qui sera Tousiours Bourgeon, fans Raisin devenir, S'il ne vous plaist de luy vous souvenir.

#### POUR LE CAPITAINE RAISIN

AUDIT SEIGNEUR DE LA ROQUE

Ex mon vivant je ne te fey savoir
Chose de moy, dont tu deusses avoir
Ennuy ou dueil: mais pour l'heure presente,
Trescher Seigneur, il faut que ton cueur sente
Par amitié, & par ceste escriture
Un peu d'ennuy de ma male adventure.
Et m'attens bien, qu'en maint lieu, où iras,
A mes amis ceste Epistre liras:
Je ne veux pas aussi, que tu leur celes,
Mais leur diras: Amis, j'ay des nouvelles
D'un malheureux, que Venus la Déesse
A forbanny de soulas, & liesse.

Tu diras vray, car maux me font venus Par le vouloir d'impudique Venus. Laquelle feit tant par Mer, que par Terre Sonner un jour contre femmes la guerre : Ou trop tost s'est maint Chevalier trouvé, Et maint grand homme à son dam esprouvé : Maint bon Courtaut y sut mis hors d'aleine : Et maint Mouton y laissa de sa laine Brief, nul ne peult (foit par feu, fang, ou mine) Gaigner prouffit en guerre feminine : Car leur ardeur est aspre le possible : Et leur harnois haut, & bas invincible.

Quant est de moy, jeunesse povre, & sotte Me seit aller en ceste dure slotte
Fort mal garny de lances, & escus:
Semblablement le gentil Dieu Bacchus
M'y amena accompaigné d'Andoilles,
De gros Jambons, de Verres, & Gargoilles,
Et de bon vin versé en maint Flascon:
Mais j'y receu si grand coup de Faucon,
Qu'il me sallut soudain faire la poulle,
Et m'ensuyr (de peur) hors de la soulle.

Ainsi navré je contemple, & remire, Ou je pourrois trouver fouverain Mire: Et prenant cueur autre que de malade Vins circuir les limites d'Archade, La Terre neufve, & la grand' Tartarie, Tant qu'à la fin me trouvay en Surie : Ou un grand Turc me vint au corps faisir, Et fans avoir à luy fait desplaisir, Par plufieurs jours m'ha si tresbien frotté De Dos, les Reins, les Bras, & le Costé, Qu'il me convint gesir en une couche Criant les Dents, le Cueur, aussi la Bouche, Difant (helas) ô Bacchus puissant Dieu, M'as tu mené expres en ce chaut lieu, Pour voir à l'œil moy le petit Raifin Perdre le gouft de mon proche Coufin? Si une fois puis avoir allegeance, Certainement j'en prendray bien vengeance, Car je feray une armée legere,

Tant seulement de lances de Fougere, Camp de Taverne, & pavoys de Jambons, Et Bœuf sallé, qu'on trouve en mangeant bons, Tant que du choc rendray tes Flascons vuides. Si tu n'y mets grand' ordre, & bonnes guides.

Ainsi j'esleve envers Bacchus mon cueur, Pource qu'il m'ha privé de sa liqueur, Me faisant boire en chambre bien serrée Fade Tisane, avecques eau serrée, Dont souvent say ma grand'sois estancher.

Voila comment (ô Monseigneur tant cher)
Sous l'Estandard de Fortune indignée,
Ma vie sut jadis predestinée.
En fin d'escrit, bien dire le te vueil,
Pour adoucir l'aigreur de mon grand dueil,
Car dueil caché en desplaisant courage,
Cause trop plus de douleur, & de rage,
Que quand il est par parolles hors mis,
Ou declairé par lettre à ses Amis:
Tu es des miens le meilleur esprouvé:
A Dieu celuy que tel j'ay bien trouvé.

# A MONSIEUR BOUCHART

DOCTEUR EN THEOLOGIE

Donne response à mon present affaire,
Docte Docteur. Qui t'ha induit à faire
Emprisonner depuis six jours en ça,
Un tien Amy, qui onc ne t'offensa?
Et vouloir mettre en luy crainte, & terreur
D'aigre justice, en disant, que l'erreur

Tient de Luther? Point ne suis Lutheriste, Ne Zuinglien, & moins Anabaptiste: Je suis de Dieu par son silz Jesu Christ.

Je suis celuy, qui ay fait maint escrit, Dont un seul vers on n'en sauroit extraire, Qui à la Loy divine soit contraire. Je suis celuy, qui prens plaisir, & peine A louer Christ & sa Mere tant pleine De grace insuse: & pour bien l'esprouver, On le pourra par mes escrits trouver.

Brief, celuy suis, qui croit, honore, & prise La sainte, vraye, & catholique Eglise. Autre doctrine en moy ne veux bouter:
Ma Loy est bonne, & si ne saut doubter,
Qu'à mon povoir ne la prise, & exausse,
Veu qu'un Payen prise la sienne sausse.
Que quiers tu donc, ô Docteur catholique?
Que quiers tu donc? as tu aucune pique
Encontre moy? ou si tu prens saveur
A me trister dessous autruy saveur.

Je croy que non, mais quelque faux entendre T'ha fait fur moy telle rigueur estendre.
Donques refrain de ton courage l'ire,
Que pleust à Dieu, qu'ores tu peusses lire
Dedans ce corps de franchise interdit:
Le cueur verrois, autre qu'on ne t'ha dit.

A tant me tais, cher Seigneur nostre maistre, Te suppliant à ce coup amy m'estre. Et si pour moy à raison tu n'es mis, Fay quelque chose au moins pour mes Amis, En me rendant par une horsboutée La liberté, laquelle m'as ostée.

### A SON AMY LYON

Je ne t'escry de l'amour vaine, & solle,
Tu vois assez, s'elle sert, ou affolle:
Je ne t'escry ne d'armes, ne de guerre,
Tu vois, qui peult bien ou mal y acquerre:
Je ne t'escry de Fortune puissante,
Tu vois assez, s'elle est ferme, ou glissante:
Je ne t'escry d'abus trop abusant,
Tu en sais prou, & si n'en vas usant:
Je ne t'escry de Dieu, ne sa puissance,
C'est à luy seul t'en donner congnoissance:
Je ne t'escry des Dames de Paris,
Tu en sais plus que leurs propres Maris:
Je ne t'escry, qui est rude, ou assable,
Mais je te veux dire une belle Fable:
C'est assavoir du Lyon, & du Rat.

Cestuy Lyon plus fort qu'un vieil Verrat, Veit une sois que le Rat ne savoit
Sortir d'un lieu, pourautant qu'il avoit
Mengé le lard, & la chair toute crue:
Mais ce Lyon (qui jamais ne sut Grue)
Trouva moyen, & maniere, & matiere
D'ongles, & dents, de rompre la ratiere:
Dont maistre Rat eschappa vistement:
Puis meit à terre un genouil gentement,
Et en ostant son bonnet de la teste,
A mercié mille sois la grand' Beste:
Jurant le Dieu des Souris, & des Ratz
Qu'il luy rendroit (Maintenant tu verras
Le bon du compte). Il advint d'adventure,

Que le Lyon pour chercher sa pasture, Saillit dehors sa caverne, & son siege: Dont (par malheur) se trouva pris au piege, Et su lié contre un ferme posteau.

Adonc le Rat, fans ferpe, ne cousteau, Y arriva joyeux, & esbaudy, Et du Lyon (pour vray) ne s'est gaudy: Mais despita Chatz, Chates, & Chatons, Et prisa fort Ratz, Rates, & Ratons, Dont il avoit trouvé temps favorable Pour secourir le Lyon secourable: Auquel ha dit, Tais toy Lyon lié, Par moy seras maintenant deslié: Tu le vaux bien, car le cueur joly as: Bien y parut, quand tu me deslias. Secouru m'as fort Lyonneusement, Or secouru seras Rateusement.

Lors le Lyon fes deux grans yeux vestit, Et vers le Rat les tourna un petit, En luy disant, ô povre verminiere, Tu n'as fur toy instrument, ne maniere, Tu n'as Cousteau, serpe, ne serpillon, Qui seust coupper corde, ne cordillon, Pour me jetter de ceste estroite voye. Va te cacher, que le Chat ne te voye.

Sire Lyon (dit le filz de Souris)

De ton propos (certes) je me fouz ris,

J'ay des Cousteaux assez, ne te soucie,

De bel os blanc plus trenchans qu'une Sie:

Leur gaine c'est ma gencive, & ma bouche:

Bien couperont la corde, qui te touche

De si trespres: car j'y mettray bon ordre.

Lors Sire Rat va commencer à mordre

Ce gros lien: vray est, qu'il y songea Assez long temps, mais il le vous rongea Souvent, & tant, qu'à la parsin tout rompt: Et le Lyon de s'en aller sut prompt, Disant en soy: Nul plaisir (en essect) Ne se perd point, quelque part ou soit faict. Voilà le compte en termes rimassez: Il est bien long, mais il est vieil assez, Tesmoing Esope, & plus d'un million.

Or vien me voir, pour faire le Lyon: Et je mettray peine, sens, & estude D'estre le Rat, exempt d'ingratitude: J'enten, si Dieu te donne autant d'affaire, Qu'au grand Lyon: ce qu'il ne vueille faire.

# DU COQ A L'ASNE

## A LYON JAMET

Je t'envoye un grand million
De faluts, mon amy Lyon:
S'ilz estoient d'Or, ilz vaudroient mieux:
Car les Françoys ont parmy eux
Tousiours des nations estranges.
Mais quoy? nous ne pouvons estre Anges,
C'est pour venir à l'equivoque:
Pource qu'une semme se moque,
Quand son Amy son cas luy compte.
Or pour mieux te faire le compte,
A Romme sont les grans pardons:
Il faut bien que nous nous gardons,

De dire, qu'on les apetisse : Excepté que gens de Justice Ont le temps apres les Chanoines.

Je ne vey jamais tant de Moines, Qui vivent, & si ne sont rien. L'Empereur est grand terrien, Plus grand, que Monsieur de Bourbon. On dit, qu'il fait à Chambourg bon, Mais il fait bien meilleur en France: Car si Paris avoit souffrance. Montmartre auroit grand desconfort : Aussi depuis qu'il gele fort, Croyez qu'en despit des jaioux, On porte fouliers de veloux, Ou de trippe, que je ne mente. Je suis bien fol, je me tormente Le Cueur, & le Corps d'un affaire, Dont toy & moy n'avons que faire Cela n'est qu'irriter les gens : Tellement que douze Sergens Bien armez jusque au colet, Battront bien un homme seulet : Pourveu que point ne se dessende. Jamais ne veulent qu'on les pende : Si difent les vieux quolibetz Qu'on ne void pas tant de gibets En ce Monde, que de larrons.

Porte bonnets carrez, ou ronds, Ou chapperons fourrez d'Ermines, Ne parle point, & fay des mines, Te voila fage, & bien discret. Lyon Lyon, c'est le secret, Appren tandis que tu es vieux: Et tu verras les envieux
Courir comme la Chananée,
En difant qu'il est grand'année,
D'amoureuses, & d'Amoureux,
De dolens, & de langoureux,
Qui meurent le jour quinze fois.
Samedy prochain toutesfois
On doibt lire la loy civile:
Et tant de Veaux, qui vont par ville,
Seront bruslez fans faute nulle,
Car ilz ont chevauché la Mule,
Et la chevauchent tous les jours.

Tel fait à Paris long fejours, Qui voudroit estre en autre lieu. Laquelle chose de par Dieu Amours finissent par Couteaux. Les trois dames des Blancs manteaux S'habillent toutes d'une forte Il n'est pas possible, qu'on sorte De ces cloistres aucunement, Sans y entrer premierement: C'est un argument de Sophiste, Et qu'ainsi soit un bon Papiste Ne dit jamais bien de Luther : Car s'ilz venoyent à disputer, L'un des deux seroit Heretique. Outre plus, une femme Ethique Ne fauroit estre bonne bague : D'avantage, qui ne se brague, N'est point prisé au temps present : Et qui plus est, un bon present Sert en amours plus que babils. Et puis la façon des habits,

Dedans un an fera trop vieille.

Il est bien vray, qu'un Amy veille, Pour garder l'autre de dissame.

Mais tant y ha, que mainte semme S'essorce à parler par escrit.

Or est arrivé l'Antechrist,

Et nous l'avons tant attendu.

Madame ne m'ha pas vendu,

C'est une Chanson gringottée,

La Musique en est bien notée,

Où l'assiete de la cles ment.

Par la mort bieu voyla Clement,

Prenez le, il a mengé le lard.

Il fait bon estre Papelard,

Et ne courroucer point les fées.

Toutes choses qui sont coiffées,
Ont moult de Lunes en la teste.
Escrivez moy s'on fait plus seste
De la Lingere du palais:
Car maistre Jean du Pont Alais
Ne sera pas si outrageux,
Quand viendra à jouer ses jeux,
Qu'il ne vous sasse trestous rire.
Un homme ne peult bien escrire,
S'il n'est quelque peu bon lisart.
La chanson de frere Grisart
Est trop sale pour ces Pucelles:
Et si fait mal aux cueurs de celles,
Qui tiennent soy à leurs Maris.

Si le grand rimeur de Paris Vient un coup à voir ceste lettre, Il en voudra oster, ou mettre, Car c'est le Roy des Corrigears. Et ma plume d'Oye, ou de Jars Est ja plus escroupionnée Qu'une vieille bas enconnée, D'escrire aujourdhuy ne cessa.

Des nouvelles de pardeça, Le Roy va fouvent à la chasse, Tant qu'il faut descendre la Chasse Saint Marceau pour faire plouvoir.

Or Lyon, puis qu'il t'ha pleu voir Mon Epistre jusques icy, Je te supply m'excuser, si Du Coq à l'Asne vois sautant, Et que ta plume en fasse autant: Asin de dire en petit metre Ce que j'ay oublié d'y metre.

Excuses d'avoir fait aucuns Adieux.

# SUBSCRIPTION

Clement Marot aux gentil; Veaux, Qui ont fait les Adieux nouveaux.

S ATTRIQUES trop envieux,
Efcrivans de Plume lezarde,
Vous avez fait de beaux Adieux.
Le feu Saint Antoine les arde:
Puis vostre langue se hazarde
De semer que je les ay faits:
Ainsi le Coulpable se garde,
Et l'innocent porte le faix.

Si mentez vous bien par la gorge, Sur Dames ne suis animé: Et ne fortit onc de ma Forge Un ouvrage si mal limé: Et ne sera mien estimé Par ceux qui congnoissent ma veine. Brief, il est un peu mal rimé, Mais la raison en est bien vaine.

Et en cela plus fots, que fins,
Vous vous monstrez apertement:
Car pour bien venir à voz fins,
Besongner falloit autrement.
Si parlé eussiez seulement
De six, qui hayne m'ont voué,
On vous eust creu facilement,
Et j'eusse le tout advoué.

Mais un chacun juger peult bien, Que parler ne voudrois de femmes, Qui ne m'ont offensé en rien, Et qui n'eurent jamais diffames, Et puis vous y meslez les Dames Qui sçavent que suis leur servant : C'est tresmal entendu voz games, Pour mettre voz chants en avant.

Bien ne mal n'ay voulu escrire De tant honnestes Damoyselles: Et quand d'elles voudrois rien dire, Je ne ferois point faux Libelles: Plustost leurs louanges tresbelles Dirois en mon petit sçavoir, Pour aquerir la grace d'elles, Que chacun met peine d'avoir.

Dames on n'y a que reprendre,

Et qui tenez l'honneur trescher, A moy ne vous en vueillez prendre, Onques ne pensay d'y toucher. Vueillez vous donques attacher Aux meschans, & sots Blasonneurs, Qui n'ont sceu comment me fascher, Sinon en touchant voz honneurs.

De tigne espesse de six doits, D'un Oeil hors du Chef arraché, De Membres aussi secs que bois, D'un Nez de sins Clous attaché, De tout cela soit entaché Qui telz beauz Adieux a fait naistre : Quand il sera ainsi merché, Il sera aisse à congnoistre.

# AUX DAMES DE PARIS,

QUI NE VOULOIENT PRENDRE LES PRECEDENTES
EXCUSES EN PAYEMENT

Por qu'au partir de Paris, ce grand lieu, On vous ha dit trop rudement Adieu, Dire vous veux, maugré chacun Langard, A l'arriver doucement Dieu vous gard.

Dieu vous gard donc mes Dames tant Poupines: Qui vous fait mal? trouvez-vous des espines En ces Adieux? Ces beaux Rhetoriqueurs Ont-ilz au vif touché vos petits cueurs? Croyez de vray que le grand Lucifer S'en chauffera un jour en son Enfer: Car ce n'est point jeux de petits enfans, D'ainsi toucher voz honneurs triomphans.

Or puis qu'advient que ce mal vous avez, Guerissez vous, si guerir vous favez : Quant est de moy, je ne sçay Medicine, Emplastre, unguent, ny herbe, ne Racine Qui sceust au vray l'aigreur diminuer De vostre mal, qui veult continuer : Mais je fçay bien comme il ne croistra point, Et ne poindra par moy non plus qu'il poinét. Tant seulement faut, que plus ne croyez, Qu'il vient de moy : car certaines foyez, Que si ma plume endroit vous se courrousse, Il n'y aura Blanche, Noire ny Rousse, Qui bien ne sente augmenter son angoisse : Et qui au doigt, & à l'œil ne congnoisse Combien mieux pique un Poëte de Roy, Que les rimeurs, qui ont fait le defroy. Non que ce soit de piquer ma coustume, Mais il n'est bois si verd qui ne s'allume. Tant plus me suis par escrit excusé, Tant plus m'avez de parole accufé, Usant vers moy de menasses follettes: Puis quand fentez voz puissances foyblettes, Alez querant aux hommes allegeance, En leur chantant, Faites m'en la vengeance, O foyble gent, qui ne se peult (en somme) D'homme venger finon par fecours d'homme! Bon est l'ouvrier, qui ne feit pas égale Vostre puissance à la volunté male, Puis qu'en tout cas, & en toute faison Vostre appetit surmonte la raison.

Ces mots ne vont jusques aux Vertueuses.

Mais dites moy vous autres bien Facheuses, Ouand des Adieux j'eusse advoué l'affaire Sans m'excufer, qu'eussiez vous sceu pis faire? Vous me tenez termes plus rigoureux, Oue le Drappier au Berger douloreux. S'il n'est-il Loup, Louve, ne Louveton, Tigre, ne Aspic, ne Serpent, ne Luthon, Oui jamais eust sur moy la dent boutée, Si mon excuse il eust bien escoutée. Avez-vous donc les cueurs moins damoyfeaux, Qu'Aspicz, ne Loups, & telz gentils oyseaux? Je croy que non : par tout avez louanges D'humble parler, & de vifage d'Anges : Et de ma part me semblent voz façons Succre en douceur, & en froideur glaçons. Si trompé fuis, je dy que la Couleuvre En voz Jardins fous douces fleurs fe cœuvre.

Certes je croy que vous cuidez (fans fainte)
Que j'ay basty mes excuses par crainte:
Bien peu s'en faut, que ne die en mes vers
Propos de vous, qui monstre le revers.
Ma Muse ardante autre chose ne quiert,
L'encre le veult, la plume m'en requiert:
Et je leur dy que rien de vous ne sçay:
Mais Dieu vous gard que j'en sasse l'essay.

N'ay-je passé ma jeunesse abusée
Autour de vous? laquelle j'eusse usée
En meilleur lieu (peult estre en pire aussi)
Rien ne diray, n'ayez aucun soucy:
Et si en sçay, bien je l'ose asseurer,
Pour faire rire, & pour faire pleurer.
Mais que vaudroit d'en travailler mes doits
Sur le papier? Mores, Turcz, & Medois

Sçavent vos cas: la Terre n'est semée,
Sinon du grain de vostre renommée.
Brief, pour escrire y a bien d'autres choses
Dedans Paris trop longuement encloses.
Tant de Broillis, qu'en Justice on tolere,
Je l'escrirois, mais je crains la Colere:
L'oysiveté de Prestres, & Cagots
Je la dirois, mais garde les Fagots:
Et des abuz, dont l'Église est sourrée,
J'en parlerois, mais garde la Bourrée.
De tout cela, & de vous me tairoye,
Et en chemin plus beau me retrairoye,
Quand me viendroit d'escrire le desir.

Je blafmerois Guerre, qui fait gesir Journellement par terre en grand' outrance Les vieux Soudars, & les jeunes de France.

Ou emplirois la mienne blanche carte, Du bien de paix, la priant qu'elle parte Du haut du Ciel pour venir visiter Princes Chrestiens, & entr'eux habiter.

Ou dirois loz meritoire de ceux, Qui bien fervans n'ont l'esprit paresseux A la chercher tachans (comme loyaux) Tirer deça les deux Enfans Royaux.

Ou parlerois (usant de plus haut style)
De maint conflict cruel, dur & hostile,
Où l'on a veu charges, & presses fendre
Nostre bon Roy pour vous autres dessendre,
Ce temps pendant que preniez voz delictz
Sans nul danger) en voz chambres, & lictz.

Ou compterois de luy maint grand orage De grand fortune, & fon plus grand courage, Qui fous le faix n'a esté veu ployer. Voila le poinct où voudrois m'employer,
Sans m'amuser à rimer voz Adieux.
Et faites moy mines de groins, & d'yeux,
Tant que voudrez : onques ne prins visee
Pour vous lascher un seul traict de risée,
Et m'en croyez : mais les langues qui sonnent,
Comme un cliquet, tousjours le bruit me donnent
De tous escrits, tant soient lourdement faits :
Ainsi soustien des Asnes tout le faix.

Or estes vous dedans Paris six semmes, Qui un escrit tout farsy de dissames M'avez transmis: & quand aucun se boute A l'escouter, luy semble qu'il escoute, En plein marché six ordes harengeres Jetter le seu de leurs langues legeres Contre quelcun: Va vilain Farcereau, Maraut, Belistre, Yvrongne, Maquereau, Comme une Pie en cage injurieuse.

En vostre Epistre aussi tant surieuse M'avez reprins, que je veux faire bragues Dessus l'Amour, sans Chaines & sans Bagues, Ha (dy je lors) il faut que chacun croye, Qu'à tout Oyseau il souvient de sa proye. Voz grans Faucons, qui surent Fauconneaux, Vollent tousjours pour Chaines, & Anneaux.

Puis vous touchez, & les morts & les vifs : Respondez moy, pourquoy en voz devis Blasmez vous tant seu mon Pere honnoré, Qui vostre sexe ha tant bien decoré Au Livre, des Dames l'advocate? J'estimerois la recompense ingrate, Si pour vous six eust travaillé sa teste : Mais il parla de toute semme honneste :

Non que sur vous je treuve que redire, Ainçois chacun vous doibt nommer, & dire Avant la mort les six Canonisées : Ou (pour le moins) les six Chanonisées, Quant au Résveur, qui pour telz vieux Registres Print tant de peine à faire des Epistres Encontre moy, pour tous les menus droits De son labeur, seulement je voudrois, Qu'il eust couvert de vous six la plus saine : Il auroit beau se laver d'eau de Seine Apres le coup. Ha, le vil Blasonneur, C'est luy qui feit sur les Dames d'honneur Tous les Adieux : & vous six l'en priastes : Puis dessus moy le gland Haro criastes, Sçachans, de vray, que pour vous feulement On n'est crié dessus moy nullement.

Et de bon heur prinstes un Secretaire Propre pour vous : onques ne se seut taire De composer en injure : & meschance : Je le congnoy. Or prenons autre chance.

Je fuis d'advis que veniez appointant, Quant au courroux, en moy n'en ha point tant, Que pour le bien de vous six je ne vueille : Et qu'ainsi soit, en Amy vous conseille, Que desormais vostre bec teniez coy : Car vostre honneur ressemble un ne say quoy, Lequel tant plus on le va remuant, Moins il sent bon, & tant plus est puant.

Et quand orrez ces miens presens alarmes, Ayez bon cueur, & contenez voz larmes, Que vous avez pour les Adieux rendues Las mieux vaudroit les avoir espandues Dessus les piedz de Christ les essuyans De voz cheveux, & voz pechez fuyans Par repentance aveques Magdaleine.

Qu'attendez-vous? Quand on est hors d'alaine,
La force saut. Quand vous serez hors d'aage,
Et que voz ners sembleront un cordage,
Plus de voz yeux larmoyer ne pourrez,
Car sans humeur seiches vous demourrez:
Et quand vos yeux pourroient plourer encores,
Où prendrez vous les cheveux, qu'avez ores,
Pour essuyer les piedz du Roy des Cieux?
Croyez qu'à tel mystere precieux
Ne serez lors du bon Ange appellées,
Pource que trop serez vieilles pellées:
Desja vous prend icelle maladie.

Vous voulez faire, & ne voulez, qu'on die Cessez, cessez toutes occasions, Si prendront fin toutes derifions: C'est le droit poinct pour clorre les passages Aux mal disans. Et vous autres bien sages, Qui des Adieux ne fustes point touchées, Et vous aussi, que l'on y a couchées. Et qui pourtant compte n'en faictes mie, Nulle de vous ne me foit ennemie, Je vous supply, pour telles bourgeoisettes, Qui vont cherchant des noises pour noisettes. On voit affez, que vous estes entieres De n'avoir prins à cueur telles matieres. Aussi n'est-il blason, tant soit infame, Qui sceust changer le bruit d'honneste femme : Et n'est blason, tant soit plein de louange, Qui le renom de folle femme change. On a beau dire, une Colombe est noire, Un Corbeau blanc : pour l'avoir dit, faut croire Que la Colombe en rien ne noircira, Et le Corbeau de rien ne blanchira.

Certainement les vertus, qui s'espandent Desfus voz cueurs, si fort vostre me rendent, Oue pour l'amour de vous n'eusse jamais Contre elles fait ceste presente: mais Tant m'ont pressé d'escrire, & me contraignent, Qu'il femble au vray que plaisir elles praignent En mes propos: & ont bien ce credit, Oue si je n'ay assez à leur gré dit, Je leur feray un livre de leurs gestes Intitulé, Les six vieilles Digestes: Et si n'auray de matiere defaut. J'en ay encor plus qu'il ne leur en faut : Mais pour ceste heure elles prendront en gri, Car au propos où elles m'ont ancré, Veux mettre sin, & avant que l'y mettre, Vostre Clement vous prie en ceste Lettre, Dames d'honneur, que ces femmes notées Soient deformais d'autour de vous oflées Ne plus ne moins qu'on ofte mauvaise herbe D'avec l'espy, dont on fait bonne Gerbe : Vous advisant que trop plus sont nuisantes A voz honneurs, que les Rimes cuifantes De fots Adieux: & toutesfois, afin Oue mon escrit ne les fache à la fin, Je leur vois dire un Adieu fans rancune.

Adieu les fix, qui n'en vallez pas une : Adieu les fix, qui en vallez bien cent : Qui ne vous void, de bien loing on vous fent.

#### A LA ROYNE ELEONOR

A SON ARRIVÉE D'ESPAGNE AVEC MESSIEURS LES ENFANS

Puis que les Champs, les Monts, & les Vallées, Les Fleuves doux, & les ondes falées Te font honneur à la venuë tienne. Princesse illustre, & Royne treschrestienne: Puis que Clerons, & Bombardes tonnantes, Chantres, Oyfeaux de leurs voix refonnantes Tous à l'envy maintenant te faluent, Feray-je mal, fi de ma Plume fluent Vers mesurez, pour saluer aussi Ta grand' hauteur, qui rompt nostre foucy: Certes le fon de ma Lettre n'ha garde D'estre si dur comme d'une Bombarde Et si n'est point mortel en Terre, comme, Voix de Clérons, ou d'Oysselet, ou d'Homme : Parquoy je croy que de toy fera pris Autant à gré. Donques, Perle de pris, Par qui nous est tant de joye advenuë, Tu fois la bien (& mieux que bien) venuë Pourquoy as fait si longue demourée? Certainement ta venuë honorée De tarder tant tous languir nous faisoit: Mais bien favons que trop t'en desplaisoit.

N'est-ce pas toy, qui du Roy sus esprise Sans l'avoir veu? mesmes apres sa prinse: Ou tellement aux armes laboura, Que le corps pris, l'honneur luy demoura. N'est-ce pas toy, qui sentis plus sort croistre L'amour en toy, quand tu vins à congnoistre Et voir son port, sorme, sens, & beauté
Qui ne sent rien que toute Royauté?
N'est-ce pas toy, qui songeois nuict & jour
A le remettre en son privé sejour?
Et qui depuis en prison si amere
A ses Ensans seis office de mere,
Jusqu'à donner à ton cher Frere Auguste
Doubte de toy? voire doubte tresjuste:
Car je croy bien, si eusses eu l'usage
Des arts subtils de Medée la sage,
Qu'en blancs vieillards tu eusses transformez
Ces jeunes corps tant beaux, & bien formez,
Pour les mener secretement en France,
Et puis rendu leur eusses leur ensance.

Or (Dieu mercy) amenez les as tu Sans Nigrommance, ou Magique vertu, Ains par le vueil de Dieu, qui tout prevoit, Et qui desja destinée t'avoit Femme du Roy, duquel & jours, & nuicts Tu as porté la moytié des ennuis Dont raison veult, & le droit d'Amytié Que maintenant reçoives la moytié De sa grand joye, & du regne puissant, Et de l'amour du peuple obeissant.

O Royne donc, de tes subjets loyaux
Vien recevoir les hauts honneurs Royaux:
Voir te convient ton Royaume plus loing,
Tu n'en as veu encor qu'un petit coing:
Tu n'as rien veu que la Doue, & Gironde:
Bientost verras la Cherante profonde
Loire au long cours, Seine au port fructueux:
Saone qui dort, le Rosne impetueux:
Aussi la Somme, & force autres Rivieres:

Qui ont les borts de force Villes fieres, Dont la plus grande est Paris sans pareille.

Là, & ailleurs desja on t'appareille Mysteres, jeux, beaux paremens de Rues, Sur le pavé sleurs espesses & drues, Par les quantons Theatres, Colifées, Brief, s'on pouvoit faire champs Elifées, On les feroit pour mieux te recevoir.

Mais que veult-on encor te faire voir? Pourroit-on bien augmenter tes plaisirs? N'as tu pas veu le grand de tes desirs, Ton cher espoux, nostre souverain Roy? Si as tresbien: mais encores je croy, Qu'en gré prendras, & verras voulontiers Les appareils du peuple en maints quartiers. Et, qui plus est, en cela regardant Tu congnoistras le zelle tresardant, Qu'en toy on a : ce que je te supplie Congnoistre en moy, Royne tresaccomplie : Car Apollo, ne Clio, ne Mercure Ne m'ont donné fecours, ne foing, ne cure En cest escrit. Le zelle, que je dy, L'a du tout fait, & m'a rendu hardy A te l'offrir, tel que tu le vois estre. Puis ton Espoux est mon Roy, & mon maistre: Donques tu es ma Royne & ma maistresse: Voila pourquoy mes escrits je t'addresse.



# A MONSEIGNEUR DE LORRAINE,

LUY PRESENTANT LE PREMIER LIVRE TRANSLATÉ

DE LA NETAMORPHOSE

C'IL y ha rien, Prince de haut pouvoir, O Qui par deça face mal fon devoir De recevoir ta hautesse honorée, Ce ne fera que ma Plume efforée, Qui entreprend de te donner Salut, Et pour ce faire onc assez ne valut : Ains trop est lourde, & de style trop mince, Pour s'addresser à tant excellent Prince : Ce neantmoins fachant, que tu as pris Par maintesfois plaisir en mes escrits, J'avme trop mieux t'escrire lourdement, Que de me taire à ton advenement, Car j'ay espoir que la voulonté tienne Congnoistra bien en cest escrit la mienne : Qui est, & fut, & sera, de savoir Faire aucun cas, ou tu puisses avoir Quelque plaisir. Premier donc je saluë Treshumblement ta hautesse & valuë: Puis à celuy, qui est Prince des Anges, Rends de bon cueur immortelles louanges, De l'heureux point de ta noble venuë, Qui est le temps de la Paix advenuë : Par qui tu vois les deux enfans de France Hors des liens de captive fouffrance.

Graces aussi luy saut rendre des pertes : Vray est, que trop sont lourdes, & apertes A un chacun : mesme ta Majesté Participante aux malheurs ha esté, En y perdant sous la fleur de jeunesse Deux Freres pleins d'honneur, sens, & prouësse, Qui est celuy (si bien le congnoissoit) Qu'en y pensant, plein de douleur ne soit? Si convient il en douleur, & ennuv Nostre vouloir conformer à celuy Du Tout puissant : autrement on resiste A sa bonté. Ce propos dur, & triste En cest endroit rompray pour le present, Et te supply prendre en gré le present, Que je te fay de ce translaté Livre, Lequel (pour vray) hardiment je te livre, Pource que point le fens n'en est yssu De mon cerveau : ains ha esté tissu Subtilement par la Muse d'Ovide : Que pleust à Dieu l'avoir tout mis au vuvde Pour t'en faire offre. Or si ce peu t'agrée, Heureux feray que ton cueur, s'y recrée Ce temps pendant qu'en France tu sejournes, Et attendant qu'en ta Duché retournes, Duché puissante, & Duché souveraine, Duché de biens, & de Paix toute pleine, Duché, de qui par tout le nom s'estend, Là où ton Peuple à ceste heure s'attend Aussi faché de ta loingtaine absence, Que toy joyeux de la noble presence De nostre Roy, de ses Enfans aymez. Et des treshauts Princes tant renommez: Entre lesquelz de tes Freres la Reste Tu vois fleurir en honneur manifeste, Cheris du Roy, & du peuple honorez.

Or à ces deux, que Mort ha devorez, Dieu doint repos : & aux trois qui demeurent, Que de cent ans (bien comptez) ilz ne meurent.

# A MONSEIGNEUR LE GRAND MAISTRE DE MONTMORENCY

LUY ENVOYANT UN PETIT RECUEIL DE SES ŒUVRES

AVEC RECOMMANDATION DU PORTEUR

En attendant le moyen, & pouvoir,
Qu'honnestement je me puisse mouvoir
De ce païs, il m'est pris le courage,
De mettre à part reposer un Ouvrage,
Qui pour le Roy sera tost mis à sin:
Puis ay choisi un autre Plume, asin
De vous escrire en Rime la presente:
De par laquelle orendroit vous presente
Salut treshumble: & un livre petit,
Ou j'ay espoir que prendrez appetit:
Car long temps ha, qu'il vous a pleu me dire,
Et commander, que le vous feisse escrire.

C'est un amas de choses espandues, Qui (quant à moy) estoient si bien perdues, Que mon esprit n'eut onc à les ouvrer Si grand labeur, comme à les recouvrer, Mais comme ardant à faire vostre vueil, J'ay tant cherché: qu'en ay fait un recueil, Et un Jardin garny de sleurs diverses De couleur Jaune, & de Rouges, & Perses. Vray est, qu'il est sans arbre ne grand fruit : Ce neantmoins je ne vous l'ay construit Des pires sleurs, qui de moy sont sorties.

Il est bien vray, qu'il y a des Orties: Mais ce ne sont que celles, qui piquerent Les Musequins, qui de moy se moquerent.

Vostre esprit noble en ce petit Verger
Aucunessois se pourra soulager,
Quand travaillé aura au bien publique,
Auquel tousjours soingneusement s'applique.
Donc (Monseigneur) plusque treshumblement
Je vous supply de cordiallement
Le recevoir, & du Porteur de luy
Avoir pitié. C'est encores celuy
Petit Tailleur entre tous les Tailleurs,
Dont à Bourdeaux, à Coignac, & ailleurs,
Je vous parlay par escrit, & de bouche.
Enrichy n'est: il se leve, & se couche
Soir, & matin aussi mal fortuné
Que quand pour luy sustes importuné.
Jadis servit la haute Seigneurie

Jadis fervit la haute Seigneurie
De la feu Royne en fa noble escuyrie:
Mais son estat dessous la dure lame
Fut enterré avec la bonne Dame.
Or ne peult plus revivre sa maistresse:
Quand à l'estat maugré la mort traistresse
Vous le pouvez refaire aussi vivant,
Et aussi beau qu'il estoit par avant.
Las (Monseigneur) saites ce beau miracle:
Il est aisé. Et si par quelque obstacle
Ne peult ravoir son estat de Tailleur,
Il ne le faut que tromper d'un meilleur.
Si vous haussez son estat, & son bien,

Il le prendra: car je le congnois bien. Au pis aller, pour conclurre l'affaire, Je vous fupply comme aux autres luy faire: Et s'il n'en ha (autant comme eux) beloing, Je fuis content qu'on n'en prenne le foing.

Priant celuy, lequel vous a fait naistre, Que cent bons ans vous maintienne grand maistre, Ou qu'il vous monte en plus digne degré, Afin que plus luy en fachez de gré.

#### POUR PIERRE VUIART

#### A MADAME DE LORRAINE

Je ne l'ay plus liberalle Princesse,
Je ne l'ay plus, par mort il a prins cesse
Le bon Cheval, que j'euz de vostre grace.
N'en fauroit on recouvrer de la race?
Certainement tandis que je l'avoye,
Je ne trouvois rien nuisant en la voye.
En le menant par Bois, & par Taillis
Mes yeux n'estoient de branches assaillis.
En luy faisant gravir Roc, ou Montagne
Autant m'estoit que trotter en Campagne.
Autant m'estoit Torrents, & grandes eaux
Passer sur luy, comme petits Ruisseaux,
Car il sembloit que les pierres s'ostassent
De tous les lieux ou ses piedz se boutassent.

Que diray plus? onc voyage ne feit Avecques moy, dont il ne vint prouffit : Mais maintenant toutes choses me grevent, Branches au Bois les yeux quasi me crevent, Car le Cheval que je pourmaine, & maine, Est malheureux, & bronche en pleine plaine: Petits Ruisseaux, grans Rivieres luy semblent, Pierres, Cailloux en son chemin s'assemblent. Et ne me donne en voyages bonheur.

O Dame illustre, ô parangon d'honneur, Dont proceda le grand bonheur secret Du Cheval mort, ou j'ay tant de regret? Il ne vint point de Cheval, ne de selle: J'ay ceste Foy qu'il proceda de celle Par qui je l'euz. Or en suis desmonté, La Mort l'ha pris, la Mort l'ha furmonté: Mais c'est tout un, vostre bonté naïve Morte n'est pas: ainçoys est si tresvive, Qu'elle pourroit non le resusciter, Mais d'un pareil bien me faire heriter.

S'il advient donc que par la bonté vostre Monseigneur face un de ses Chevaux nostre, Treshumblement le supply, qu'il luy plaise Ne me monter doucement, & à l'aise. Je ne veux point de ces doucets Chevaux, Tant que pourray endurer les travaux : Je ne veux point de Mule, ne Mulet, Tant que je sois vieillard blanc, comme laict : Je ne veux point de blanche Haquenée, Tant que je sois Damoyselle attournée.

Que veus je donc? un courtaut furieux, Un Courtaut brave, un Courtaut glorieux, Qui ait en l'air ruade furieuse, Glorieux trot, la bride glorieuse. Si je l'ay tel, fort furieusement Le piqueray, & glorieusement. Conclusion, si vous me voulez croire, D'homme, & Cheval ce ne sera que gloire.

# EPISTRE QU'IL PERDIT A LA CONDEMNADE

CONTRE LES COULEURS D'UNE DAMOYSELLE

E l'ay perdue : il faut que je m'aquitte. J En la payant, au fort me voila quitte, Prenez la donc l'Epistre, que savez Et si dedans peu d'eloquence avez, Si elle est sotte, ou aspre, ou à reprendre, Au composeur ne vous en vueillez prendre, Prenez vous en aux facheuses, qui prindrent Vostre party, & qui lors entreprindrent De hautement leurs caquets redoubler Durant le jeu, afin de me troubler, Prenez vous en à ceux, qui me trompoient, Et qui mon jeu à tous coups me rompoient : Prenez vous en à quatre pour le moins, Qui contre moy furent tous faux tesmoings : Prenez vous en à vous mesmes aussi, Qui bien vouliez qu'ilz feissent tous ainsi.

Si on ne m'eust troublé de tant de bave, Vous eustiez eu une Epistre fort brave, Qui eust parlé des Dieux, & des Déesses, Et de neus Cieux, où sont toutes liesses. Sur ces neus Cieux, je vous eusse eslevée, Et eusse fait une grande levée De Rhetorique, & non pas de Bouclier:

Puis eusse dit, comment on oyt crier Au fons d'Enfer plein de peines, & pleurs Ceux qui au jeu furent jadis trompeurs : Donnez vous garde. Or brief (fans m'eschauffer) J'eusse descrit tout le logis d'Enfer, Là où iront (si brief ne se reduisent) Les vrays Trompeurs, qui ce Monde seduisent. Puis qu'on m'a donc l'esprit mis en mal aise, Excusez moy, si l'Epistre est mauvaise : Vous affeurant, si l'eussiez bien gagnée, Qu'elle eust esté (pour vray) bien besongnée : Mais tout ainsi que vous avez gagné, Par mon serment ainsi j'ay besongné: Non qu'à regret ainsi faite je l'aye, Ne qu'à regret aussi je vous la paye : Tous mes regrets, toutes mes grans douleurs Viennent (fans plus) de ce que les couleurs N'ay fceu gaigner d'une tant belle Dame, A qui Dieu doint repos de Corps, & d'Ame.

# A UNE JEUNE DAME

LAQUELLE UN VIEILLARD MARIE VOULOIT ESPOUSER ET DECEVOIR

Non pour vouloir de rien vous requerir, Non pour plus fort vostre grace acquerir, Non pour distraire aucune vostre emprinse J'ay le papier, l'encre, & la plume prinse, Et devers vous ce mien escrit transmis: Mais pour autant qu'il affiert aux Amis, Et Serviteurs, jamais ne celer rien
A leurs aymez, foit de mal, ou de bien,
J'ay bien voulu vous escrire (ma Dame)
Chose, qui n'est en congnoissance d'ame,
Fors que de moy: & de vous n'est point sceuë:
Parquoy pourriez en sin estre deceuë
Et je ne veux vous laisser decevoir,
Tant que mon œil pourra l'appercevoir.

Or est ainsi, que me trouvant au lieu,
Ou j'esperois vous pouvoir dire Adieu,
Triste devins, fachant vostre hautesse
Desja partie. Et adonques l'Hostesse
Me va monstrer Lettres de vostre main,
Là ou teniez propos doux, & humain,
A un vieillard, à qui vous les transmistes.
Lors à mon cueur soudainement vous mistes
Deux pensemens, voyant vostre jeune aage
Favoriser un si vieil personnage.

Mon pensement premier au cueur me dit, Que par Amour il n'ha vers vous credit: Car je say bien que Venus jeune, & cointe, Du vieil Saturne en nul temps ne s'accointe.

Mon pensement second me seit comprendre, Que pour Espoux le pourriez vouloir prendre: Et ne veux pas de ce vous divertir, Mais je veux bien au vray vous advertir, Que (long temps a) il su mis sous le jou De Mariage au bas païs d'Anjou, Et est encor. Si voulez (toutessois) Il s'y mettra pour la seconde sois: Combien pourtant que bien soible me semble Pour labourer à deux terres ensemble.

Donc si voulez vostre blonde jeunesse

Joindre, & lier à fa grife vieillesse,
Il sera bon vous enquerir avant,
Si j'ay parlé du cas, comme favant,
En ceste Epistre assez mal composée:
Vous suppliant l'avoir pour excusée,
Si elle n'est en termes elegans,
Et recevoir vueillez aussi les Gants,
Que de bon cueur vous transmets pour l'estraine
De l'An present. La chose est bien certaine,
Que voz deux mains tant blanches de nature
Meritent bien plus digne couverture:
Mais s'ilz ne sont à voz mains comparez,
Du bon du cueur (pour le moins) les aurez.

Ainsi rendray mon propos accomply
En cest endroit. Et avant vous supply,
Si rencontrez rien dur en ceste Epistre,
De l'oublier, & n'en tenir registre:
Car bien à tard voudroit l'homme desplaire,
(S'il n'est trop saint) qui met peine à complaire.

# A CELUY QUI L'INJURIA PAR ESCRIT ET NE S'OSA NOMMER

Qui ton orde, & puante bave

Qui ton orde, & puante bave

Contre moy as esté crachant,

Su es sot, craintis, & meschant.

Ta sottise on void bien parfaite

En l'Epistre, que tu as faite

Sans art, & sans aucun savoir:

Toutessois tu cuides avoir

I.

Chanté en Rossignol ramage: Mais un Corbeau de noir plumage, Ou un grand Afne d'Arcadie Feroit plus douce melodie.

Et pour venir au demourant,
Tu crains fort, ô povre ignorant,
Tu crains, qu'envers toy je m'allume,
Tu crains la fureur de ma Plume.
Pourquoy crains tu? Il faut bien dire.
Qu'en toy y ha fort à redire:
Car il est certain, si tu sussess
Homme de bien, & que tu n'eusses
Quelque marque, ou mauvais renom
Tu ne craindrois dire ton nom.

Quant est de ta meschanceté, Elle vient de grand' l'ascheté D'injurier celuy, qui onques Ne te seit offences quelconques: Et quand je t'aurois sait offense, Et tu de si peu de dessence, Si couard, & si babouin, De n'oser parler que de loing?

L'epistre venuë de moy
Pour semme qui vaut mieux que toy,
N'est autre cas, qu'une risée,
Ou personne n'est desprisée,
Mais toy lourdaut mal entendu,
En ta response m'as rendu
Pour une risée une injure.
Si je te congnoissois (j'en jure)
Tu sentirois, si mes Lardons
Ressemblent Roses, ou Chardons.

#### POUR UN GENTILHOMME DE LA COURT

#### ESCRIVANT AUX DAMES DE CHASTEAUDUN

'un cueur entier, dames de grand' valuë, Par cest escrit vostre Amy vous saluë, Bien loing de vous, & grandement se deult, Que de plus près saluer ne vous peult. Car le record de voz grandes beautez, Le fouvenir des douces privautez, Qui font en vous fous honneste recueil, Cent fois le jour font souhaiter mon œil A vous revoir : mais la grand' fervitude, De ceste Court, ou est nostre habitude, M'oste souvent par force le plaisir, Dessus lequel s'assied tout mon desir : Et m'esbahy, que veu vostre amytié N'avez fouvent de nous plus grand' pitié. En nous voyant pour noz Princes, & Maistres Aller, venir parmy ces Bois champaistres : Puis s'arrester en Villages, & Bourgs, Dont le meilleur ne vaut pas voz Fauxbourgs. Et là Dieu sçait si en maisons Bourgeoises Sommes logez : ces groffes Villageoifes Là nous trouvons : Les unes font Vacheres En gros estat, & les autres Porcheres : Qui nous diront (s'il nous ennuye, ou fasche) Quelque propos de leur païs de Vache.

Lors ces propos, qui mes maux point n'appaisent Me font penser aux vostres, qui me plaisent : Disant en moy, Douce Vierge honorée, Ferons nous cy la longue demourée? Prendrons nous point bien tost le droit sentier De Chasteaudun? Là gist mon cueur entier: Non pour le lieu, mais pour meilleure chose, Qui au dedans de voz murs est enclose.

Ainsi me plains : & si tost qu'on depart, Il m'est advis qu'on tire celle part, Dont suis deceu : car (peult estre) ce jour Prendrons d'affaut quelque rural sejour, Ou les plus grans logeront en Greniers De toutes pars percez comme Paniers. Encor posé, que fussions arrestez Dedans Paris, & tousiours bien traitez, Si qu'à fouhait eussions plusieurs delices, Comme en Chevaux courir en pleines lices, Chasser au bois, vouler au grans prairies, Ouyr des Chiens les abois, & brairies : Et autre maint beau passetemps honneste, Si me vient il toufiours en cueur, ou teste Un grand regret de vous perdre de veuë, Et un desir de prochaine reveuë: Car le plaisir, que je pren à vous voir, Passe tous ceux que je pourroye avoir : Et si n'estoit espoir de brief retour, Ennuy pourroit me faire un mauvais tour, Se transmuant en pire maladie.

Vous advisant (puis qu'il faut, que le die) Que me devez d'amour grand' recompense : Car il n'est jour qu'en vous autres ne pense : Et ne se passe une nuiét, qu'un beau songe De vous ne face. Encore (sans mensonge) L'autre nuiétée en dormant sus ravy, Et me sembla que toutes je vous vey Dessus un Pré saire cent beaux esbas En cotte simple, & les robbes à bas.

Les unes vey, qui dansoyent sous les sons Du Tabourin: les autres aux Chansons:
L'autre en apres, qui estoit la plus sorte,
Prend sa compagne, & par terre la porte:
Puis de sa main de l'herbe verde fauche,
Pour l'en sesses la cuisse gauche.
L'autre, qui veit sa compagne outrager,
Laissa la Danse, & la vint revenger.
De l'autre part, celles qui se lasserent,
En leur seant sur le Pré, s'amasserent,
Et dirent là une grand' Letanie
De plaisants mots, & jeu sans villanie.

Que diray plus? L'autre un banquet de creme Faisoit porter pour la chaleur extreme, Au moins pour ceux, qui devoient banqueter. Lors me sembla que ne seu m'arrester, Que devers vous ne courusse en cest estre : Mais sur ce poinct voicy une senestre De mon Logis, qui tombant seit tel bruit, Que m'esveillant mon plaisir ha destruit.

Ha (dy je lors) fenestre malheureuse Trop m'ha esté ta cheute rigoureuse: J'alois baiser leur bouche douce, & tendre, L'une aprés l'autre: & tu n'as seu attendre.

Si m'esveillay tout fasché, & m'en vins Faire exposer mon beau songe aux Devins: Entre lesquelz un grand Frere Mineur Je rencontray excellent Devineur, Qui m'asseura que de trois choses l'une Me diroit vray. A minuict à la Lune, Va faire en terre un grand cerne tout rond. Guigne le Ciel, sa corde couppe & rompt,

Fait neuf grans tours, entre les dents barbotte Tout à part luy, d'Agios une botte. Puis me va dire, Amy trescher, je tien Vray à peu pres l'effect du fonge tien : Si tu vas voir la Ville défirée, Garde n'auras de trouver empirée : La compagnie des Dames, & la chere. Va doncques voir ceste Ville tant chere Mieux que par fonge. Alors le Devin fage Va alleguer là dessus maint passage De Zoroast, d'Hermes, de la Sibylle, De Raziel & de maint autre habile Nigromanceur. Puis je luy dy, Beaupere Vous dites vray. Ainfi Dames j'espere, Qu'aprés avoir bien couru, & veillé Par la Campagne, & beaucoup travaillé, Nostre retour pour Chasteaudun sera : Là où mon œil se recompensera De son plaisir perdu si longuement.

Mais en tandy je vous prie humblement, Prendre la Plume, & faire en Profe, ou Metre Quelque responce à ma grossiere Lettre.

## A GUILLAUME DU TERTRE

SECRÉTAIRE DE MONSIEUR DE CHASTEAUBRIANT

Quand ton vouloir (lequel trop plus j'estime Que tes Escrits, ta Raison, ne ta Rime) Seroit tout autre: & quand le Secretaire
De Montejan n'eust rien fait que se taire,
Sans me donner de t'escrire appetit,
Ja pour ces poincts (Monsieur de Montpetit)
N'eusse failly la responce transmettre:
Car la maison, où Dieu t'ha voulu mettre,
Digne te rend, & plus que digne au Monde,
Non que Marot, mais Maro, te responde.

Que pleust à Dieu que tant il me feist d'heur, Qu'ores je peusse escrire au Serviteur Propos qui fust si fort plaisant au Maistre, Que mal plaisant ne peust à la Dame estre. Certes alors me tiendrois asseuré, Que cest Escrit (tant soit mal mesuré)

Pourroit combattre aveques ton Envoy:
Mais sans cela rien en luy je ne voy Pour le sauver, qu'il ne se trouvast moindre Aupres du tien, quand viendroit à les joindre.

Or tel qu'il est, en gré le vueilles prendre : Plus j'escrirois, plus me serois reprendre.

## POUR UN VIEIL GENTILHOMME

RESPONDANT A LA LETTRE D'UN SIEN AMY

V Enus venuste, & celeste Déesse.

Ne sentit onc au cueur si grand' liesse,
En recevant par Pâris Juge esleu
La Pomme d'Or, comme moy, quand j'ay leu
Ta Lettre douce, & d'amour toute pleine:
Tant coule doux, tant naïve ha la veine:

Tant touche bien noz junesses muées, Qu'elle ha (pour vray) les cendres remuées De mon vieil aage: & de fait en icelles Il s'est encore trouvé des estincelles Du seu passé, toutessois non ardantes: Car quant à moy, les raisons sont patentes, Qu'ardantement plus ne suis amoureux: Par consequent moins triste, et doloureux.

Mais quoy, que peu à present je m'en mesle, Quant de la Done à la poingnant', mammelle Je vins à lire, autant fus resjouy, Que de propos qu'en mon vivant ouy, Si fuz je bien de celle de Grenoble.

O qu'elle est belle, & qu'elle ha le cueur noble : Il n'est amant qui se sceust exempter
De son service à elle presenter :
Et ne croy pas (ou tu es impassible)
Qu'à ta junesse il ait été possible,
En regardant si parfaite beauté,
De non sentir sa douce cruauté.
Bien croy, qu'au fait onc ne t'esvertuas,
Car celle amour, qu'en ton parti tu as,
Ta soy loyalle, & tes saçons pudiques
Vaincroyent d'un coup cent dardes Cupidiques.

Ta lettre m'ha maint plaisir fait sentir, Mais le plus grand (il n'en faut point mentir) C'est le rapport de la bonne vinée De pardela: car par chacune année Me conviendra luy livrer les assauts, Puis qu'en amours j'ay jetté mes grans fauts.

A dire vray, je devien vieille lame, Et ne puis bien croire, qu'aucune Dame (Tant que tu dis) s'enquiere, & fe foucie De mon estat : neantmoins te mercie, Si quelque fois de moy tiennent ensemble Aucun propos : car par cela me semble Que Cupido, sans de rien me priser : En vieil soudart me yeult savoriser.

Or si tu m'as, ainsi comme je pense, Mis en leur grace, aucune recompense Fors que d'amour à toy n'en sera faite: Mais dy leur bien qu'à toutes je souhaite, Que les souhaits, qui d'elles seront faits, Deviennent tous accomplis, & parsaits.

Te fuppliant donner falut pour moy A celles là desquelles fans esmoy Nous devisions, passant melancolie, Sur le chemin des Alpes d'Italie.

Et pour l'Adieu de ma lettre, t'afferme Que nonobstant, que nostre amitié serme Tousjours slurisse en sa verdeur frequente, Certes encor ton Epistre eloquente, Pres du Ruisseau Caballin composée, Luy ha servy d'une douce rousée, Qui reverdir l'ha fait, & essever Comme la Rose au plaisant temps de Ver.

## AU CHANCELLIER DU PRAT

NOUVELLEMENT CARDINAL

S i officiers en l'estat seurement Sont tous couchez fors le povre Clement, Qui comme un arbre est debout demeuré, Qu'en dites-vous Prelat treshonoré? Doit fon malheur estre estimé offense?

Je croy que non. Et dy pour ma dessense,
Si un Pasteur qui ha fermé son parc,
Trouve de nuict loing cinq, ou six traits d'arc
Une Brebis des siennes esgarée,
Tant qu'il soit jour, & la nuict separée;
En quelque lieu la doit loger, & paistre:
Ainsi ha fait nostre bon Roy, & maistre,
Me voyant loing de l'estat ja fermé,
Jusques au jour, qu'il sera dessermé
Ce temps pendant, à pasturer m'ordonne?
Et pour trouver plus d'herbe franche, & bonne,
M'ha addressé au Pré mieux sleurissant
De son Royaume ample, large & puissant.

Là, fans Argent, je rimaille, & compose: Et quand suis las, sur ce Pré me repose, Là où le Trefle en sa verdeur se tient, Et où le Lys en vigueur se maintient : Là je m'attends, là mon espoir je fiche, Car si séellez mon Aquit, je suis riche. Raison me dit, puis que le Roy l'entend, Que le ferez. Mon espoir, qui attend, Me dit apres, pour replique finalle, Que de la grand' dignité Cardinalle Me fentiray. Car ainsi que les Roys, De nouveau mis en leurs nobles arroys, Mettent dehors en pleine delivrance Les Prisonniers vivans en esperance: Ainsi j'espere, & croy certainement, Qu'à ce beau rouge, & digne advenement, Vous me mettrez (fans difference aucune) Hors des Prisons de faute de pecune.

Puis qu'en ce donc tous autres precellez,

Je vous fuppli (tresnoble Pre) seellez Le mien Acquit: pourquoy n'est-il seellé? Le Parchemin ha long, & assez lé: Dites (fans plus) il faut, que le seellons, Seellé sera sans faire procés longs.

S'on ne le veult d'adventure feeller, Je puis bien dire (en effect) que c'est l'Air, L'Eau, Terre, & Feu, qui tout bonheur me celent, Confideré que tant d'autres se seellent : Mais si je touche Argent par la seelleure, Je beniray des fois plus de fept l'heure, Le Chancellier, le Seau, & le Seelleur, Qui de ce bien m'auront, pourchassé l'heur C'est pour Marot, vous le congnoissez ly, Plus leger est, que Volucres Cœli, Et ha fuivy long temps Chancellerie Sans prouffiter rien touchant seellerie. Brief, Monfigneur, je pense, que c'est là, Qu'il faut feeller, si jamais on feella : Car vous sçavez que tout Acquit sans seel Sert beaucoup moins qu'un potage fans sel, Qu'un arc fans corde, ou qu'un Cheval fans felle.

Si prie à Dieu, & fa tresdouce ancelle, Que dans cent ans en fanté excellent Vous puisse voir de mes deux yeux seellant.

## AU DIT SEIGNEUR

POUR SE PLAINDRE DU TRESORIER PREUDHOMME

Puissant Prelat, je me plains grandement Du Tresorier qui ne veult croire en cire, En bon Acquit, en expres mandement, En Robertet, n'en Françoys nostre Sire: Si ne sçay plus que luy faire, ne dire, Fors plaindre Dieu en mon Acquit susdit: Adonc s'il est si preudhomme qu'on dit, Il y croira: car en Dieu faut-il croire. Encor ay peur, que Dieu ne soit desdit, Si ne mettez l'homme en bonne memoire.

#### AU ROY

#### POUR LE DELIVRER DE PRISON.

R or des Françoys, plein de toutes bontez, Quinze jours ha (je les ay bien contez) Et dés demain feront justement seize, Que je sus fait confrere au Diocese De saint Marry, en l'Eglise saint Pris: Si vous diray, comment je sus surpris, Et me desplaist, qu'il saut que je le die.

Trois grans pendars vindrent à l'estourdie En ce Palais, me dire en desaroy,
Nous vous faisons prisonnier par le Roy.
Incontinent, qui fut bien estonné
Ce fut Marot, plus que s'il eust tonné.
Puis m'ont monstré un parchemin escrit,
Où n'y avoit seul mot de Jesu Christ:
Il ne parloit tout que de plaiderie,
De Conseillers, & d'emprisonnerie.
Vous souvient-il (ce me dirent ilz lors)

Que vous estiez l'autre jour là dehors,

Qu'on recourut un certain prisonnier Entre noz mains : Et moy de le nier : Car foyez feur, si j'eusse dit ouy, Que le plus fourd d'entre eux m'eust bien ouy : Et d'autre part j'eusse publiquement Esté menteur. Car pourquoy, & comment Eusse-je peu un autre recourir, Quand je n'ay sceu moy-mesmes secourir? Pour faire court, je ne sceu tant prescher, Que ces paillars me vousissent lascher. Sur mes deux bras ilz ont leur main posée : Et m'ont mené ainsi qu'une Espousée : Non pas ainsi, mais plus roide un petit : Et toutesfois j'ay plus grand appetit De pardonner à leur folle fureur, Qu'à celle là de mon beau Procureur : Que male mort les deux jambes luy casse : Il a bien prins de moy une Beccasse, Une Perdris, & un Levraut aussi : Et toutesfois je suis encor icy. Encor je crov, si j'en envoyois plus, Qu'il le prendroit : car ilz ont tant de glus Dedans leurs mains, ces faifeurs de pippée : Que toute chose, où touchent est grippée.

Mais pour venir au poinct de ma sortie:
Tant doucement, j'ay chanté ma partie
Que nous avons bien accordé ensemble:
Si que n'ay plus affaire, ce me semble,
Si non à vous. La partie est bien sorte:
Mais le droit poinct, où je me reconsorte,
Vous n'entendez proces, non plus que moy,
Ne plaidons point, ce n'est que tout esmoy.
Je vous en croy, si je vous ay messait.

Encor posé le cas, que j'eusse fait, Au pis aller n'y cherroit qu'une amende : Prenez le cas que je la vous demande : Je prens le cas que vous me la donnez : Et si plaideurs furent onc estonnez : Mieux que ceux cy, je veux qu'on me delivre, Et que soudain en ma place on les livre.

Si vous fupply (Sire) mander par lettre: Qu'en liberté voz gens me vueillent mettre: Et si j'en sors, j'espere qu'à grand' peine M'y reverront, si on ne m'y rameine.

Treshumblement requerant vostre grace,
De pardonner à ma trop grand' audace,
D'avoir enprins ce sot escrit vous faire:
Et m'excusez, si pour le mien affaire
Je ne suis point vers vous allé parler:
Je n'ay pas eu le loisir d'y aller.

# AU REVERENDISSIME CARDINAL DE LORRAINE

'HOMME qui est en plusieurs sortes bas,
Bas de stature, & de joye, & d'esbas,
Bas de sçavoir, en bas degré nourry,
Et bas de biens, dont il est bien marry,
Prince tresnoble, à vostre advis, comment
Vous pourroit-il saluër hautement?
Fort luy seroit, car petite clochette
A beau branler, avant qu'un haut son jette:
Puis qu'il n'ha donc qu'humble & basse valuë:
Par un bas style humblement vous saluë.

Mais qui est-il ce gentil salueur, Qui ose ainsi approcher sa lueur Du cler Soleil, qui la peult essacer? C'est un Marot, lequel vient pourchasser Un trait verbal de vostre bouche exquise, Pour bien tirer droit au blanc où il vise.

Ce qu'il attend en ceste court, gist là : Et cependant pour tous tresors il ha Non revenu, banque, ne grand' pratique, Mais seulement sa plume Poëtique : Un don Royal, où ne peult advenir : Et un espoir (en vous) d'y parvenir. Touchant la plume, elle vient de la Muse,

Oui à rimer aucunes fois m'amuse : Le don Royal vient (certes) d'un outroy, Plus liberal que de nul autre Roy: Quant à l'espoir, que j'ay en vous bouté, D'ailleurs ne vient que de vostre bonté, En qui me fie : & brief telle fiance Mettra ma peine au gouffre d'oubliance, J'enten porveu que Monsieur le grand Maistre Vueillez prier vouloir fouvenant estre De mon affaire à ces nouveaux estats, Car on y void un si grand nombre, & tas De poursuyvans, que grand peur au cueur ay-je De demourer aussi blanc comme neige. Et puis Fortune en l'oreille me fouffle, Qu'on ne prend point en court telz chats sans mouffle, En me difant qu'à cause du rebout, Souvent se faut tenir ferme debout. Et qu'aux estats des Roys on ne se couche Facilement, comme en lict, on en couche. Sous ces propos Fortune l'infensée

Languir me fait fans l'avoir offensée:
Mais Bon espoir, qui veult estre vainqueur,
Jusques chez moy vient visiter mon cueur.
En m'assurant qu'une seule parolle
De vous me peult faire coucher au rolle.

Plaise vous donc, noble fleuron Royal,
Plaise vous donc à ce Baron loyal,
En dire un mot, pour ma protection,
Accompagné d'un peu d'affection:
Si vous pourray donner ce los (si j'ose)
De m'avoir fait de neant quelque chose.

Mais d'où provient, que ma Plume se messe D'escrire à vous? ignore, ou presume elle? Non pour certain, motif en est Mercure: Qui long temps ha, de me dire print cure, Que vous estiez dés bien aymez amans, Des dits dorez, & des rimez Romans: Soit de science, ou divine, ou humaine.

C'est le motif, qui mon Epistre meine
Devant voz yeux, esperant que bien prinse
Sera de vous, sans en faire reprinse:
Non que dedans rien bon y puisse avoir,
Fors un desir de mieux faire sçavoir:
Et nonobstant, si petit que j'en sçay,
Quand me voudrez pour vous mettre à l'essay,
Et que mon sens je congnoisse trop mince
Pour satissaire à tant excellent Prince.
Je m'en iray par Bois, Prez & Fontaines
Pour prier là les neus Muses hautaines,
De vouloir estre à mon escrit propices,
Afin de mieux accomplir voz services.

#### AU ROY

#### POUR AVOIR ESTÉ DEROBÉ

O'n dit bien vray, la mauvaise fortune
Ne vient jamais, qu'elle n'en apporte une,
Ou deux, ou trois avecques elle (Sire)
Vostre cueur noble en sçauroit bien que dire:
Et moy chetif, qui ne suis Roy, ne rien,
L'ay esprouvé: Et vous compteray bien,
Si vous voulez, comment vint la besongne.

J'avois un jour un Valet de Gascongne, Gourmant, Yvrongne, et assuré Menteur, Pipeur, Larron, Jureur, Blasphemateur, Sentant le Hart de cent pas à la ronde : Au demeurant, le meilleur filz du Monde : Prisé, loué, fort estimé des Filles Par les Bordeaux, & beau joueur de Quilles.

Ce venerable Hillot fut adverty
De quelque Argent, que m'aviez departy.
Et que ma bourse avoit grosse apostume:
Si se leva plustost que de coustume,
Et me va prendre en tapinois icelle:
Puis la vous met tresbien sous son esselle,
Argent & tout (cela se doit entendre)
Et ne croy point que ce sut pour la rendre:
Car onques puis n'en ay ouy parler.

Brief, le villain ne s'en voulut aller Pour si petit : mais encor il me happe Saye, & bonnet, chausses, pourpoint, & cappe : De mes habits (en effect) il pilla Tous les plus beaux : & puis s'en habilla, Si justement, qu'à le voir ainsi estre, Vous l'eussiez prins (en plein jour) pour son maistre.

Finalement de ma chambre il s'en va Droit à l'estable, où deux Chevaux trouva, Laisse le pire, & sur le meilleur monte, Pique, & s'en va. Pour abreger le conte Soyez certain qu'au partir dudit lieu N'oublia rien, fors à me dire Adieu.

Ainsi s'en va chatouilleux de la gorge
Ledit Valet, monté comme un faint George:
Et vous laissa Monsieur dormir son faoul:
Qui au resveil n'eust seu finer d'un soul:
Ce Monsieur là (Sire) c'estoit moy-mesme:
Qui fans mentir sus au matin bien blesme:
Quand je me vey sans honneste vesture,
Et fort fasché de perdre ma monture:
Mais de l'Argent, que vous m'aviez donné,
Je ne sus point de le perdre estonné,
Car vostre Argent (tres debonnaire Prince
Sans point de faute est subjet à la Pince.

Bien tost apres ceste fortune là,
Une autre pires encore se messa
De m'assaillir, & chacun jour m'assaut.
Me menassant de me donner le faut,
Et de ce saut m'envoyer à l'envers,
Rimer sous terre, & y saire des vers.

C'est une lourde, & longue maladie
De trois bons mois, qui m'ha tout' estourdie
La povre teste, & ne veult terminer,
Ains me contraint d'apprendre à cheminer,
Tant affoibly m'ha d'estrange maniere,
Et si m'ha sait la cuysse heronniere,
L'estomac sec, le ventre plat, & vague:

Quand tout est dit, aussi mauvaise bague (Ou peu s'en faut) que semme de Paris, Saulvé l'honneur d'elles, & leurs maris.

Que diray plus? au miserable corps (Dont je vous parle) il n'est demouré fors Le povre esprit, qui lamente, & souspire, Et en pleurant tasche à vous faire rire.

Et pour autant (Sire) que suis à vous, De trois jours l'un viennent taster mon poux Messieurs Braillon, le Coq, Akaquia, Pour me garder d'aller jusqu'à quia.

Tout confulté ont remis au Printemps Ma guerison: mais à ce que j'entens, Si je ne puis au Printemps arriver, Je suis taillé de mourir en Yver: Et en danger, si en Yver je meurs, De ne voir pas les premiers raisins meurs.

Voila, comment depuis neuf moys en ça
Je fuis traicté. Or ce que me laissa
Mon Larronneau, long temps ha, l'ay vendu,
Et en Sirops, & Juleps despendu:
Ce neantmoins ce, que je vous en mande,
N'est pour vous faire, ou requeste, ou demande:
Je ne veux point tant de gens ressembler,
Qui n'ont soucy autre, que d'assembler.
Tant qu'ilz vivront, ilz demanderont eux,
Mais je commence à devenir honteux,
Et ne veux plus à voz dons m'arrester.
Je ne dy pas, si voulez rien prester,
Que ne le prenne: Il n'est point de presteur
(S'il veut prester) qui ne fasse un debteur.
Et savez-vous (Sire) comment je paye?

Nul ne le fait, si premier ne l'essaye.

Vous me devrez (si je puis) de retour : Et vous seray encores un bon tour, A celle sin, qu'il n'y ait saute nulle. Je vous seray une belle Cedule, A vous payer (sans usure il s'entend) Quand on verra tout le Monde content : Ou, si voulez, à payer ce sera, Quand vostre loz, & renom cessera.

Et si sentez, que sois soible de reins
Pour vous payer, les deux Princes Lorrains
Me plegeront: Je les pense si fermes,
Qu'ilz ne faudront pour moy à l'un des termes,
Je say assez que vous n'avez pas peur,
Que je m'ensuye, ou que je sois trompeur:
Mais il fait bon assurer ce qu'on preste.
Brief, vostre paye, ainsi que je l'arreste,
Est aussi seure, advénent mon trespas,
Comme advenant que je ne meure pas.

Advisez donc, si vous avez desir De rien prester, vous me serez plaisir: Car puis un peu, j'ay basty à Clement, Là où j'ay sait un grand desboursement: Et à Marot, qui est un peu plus loing: Tout tombera, qui n'en aura le soing.

Voila le poinct principal de ma Lettre. Vous favez tout, il n'y faut plus rien mettre : Rien mettre, las? Certes & si feray, Et ce faisant, mon style j'ensteray, Disant, ô Roy amoureux des neus Muses, Roy, en qui sont leurs sciences insuses, Roy, plus que Mars d'honneur environné, Roy, le plus Roy, qui sut onc couronné, Dieu tout puissant te doint, pour t'estrener, Les quatre Coings du Monde gouverner : Tant pour le bien de la ronde machine, Que pour autant que fur tous en est digne.

## A UN SIEN AMY, SUR CE PROPOS

Puis que le Roy a desir de me faire A ce besoing quelque gracieux prest, J'en suis content: car j'en ay bien affaire, Et de signer ne sus onques si prest. Parquoy vous pry savoir de combien c'est Qu'il veult Cedule, afin qu'il se contente: Je la feray tant seure (si Dieu plaist) Qu'il n'y perdra que l'argent & l'attente.

## A UN QUI CALUMNIA L'EPISTRE PRECEDENTE

Le Rimeur, qui affailly m'ha, En mentant contre moy rima: Car je ne blafme point Gascongne. De toutes tailles bons Levriers, Et de tous arts mauvais ouvriers: Son epistre affez le tesmoingne.

Il faut dire, puis qu'ainsi hoingne : Que je luy ay gratté sa roingne En quelque mot, qu'il trova laid. Pourquoy d'ailleurs voudroit il guerre? Je voudrois voulontiers m'enquerre, S'il est parent de mon valet.

Si je congnoissois le follet,
Je produirois en mon rollet
De sa vie assez de tesmoings.
Quel qu'il soit, il n'est point Poëte,
Mais silz aisné d'une Chouvette,
Ou aussi larron, pour le moins.

Pinseur pinsant, entre autres poincts Je t'ay pinsé de ce mot, pinse : Les bons n'y sont pinsez, ny poincts Mais les meschans, dont tu es prince.

#### AU LIEUTENANT GONTIER

S'i maladie au visage blesiny N'eust perturbé le sens à ton amy, Long temps y ha (Gontier) que ta semonce Eust eu de moy la presente response, Qui ne devroit responce se nommer.

Quant à tes faits, qui feront renommer Ton nom par tout, & apres la mort vivre, Si en cest art veux ta poincte poursuivre: Tes poincts sont grans, tes Metres mesurez, Tes dits tous d'Or, tes termes Azurez, Voire si hauts, & ardus à tout prendre, Que mon esprit travaille à les comprendre.

Quand tout est dit, les louanges données De toy à moy, doyvent estre ordonnées (Sans de nully vouloir blesser l'honneur) A Jean le Maire, ou au mesme donneur. Il te falloit un esprit Poëtique, Non pas ma plume essorée, & rustique, Pour te respondre. Or ay je mis estude A n'estre point noté d'ingratitude.

Tu m'as escrit, je te respons aussi:
Et si tu n'as beaucoup de vers icy,
Supporte moy: les Muses me contraignent
Penser ailleurs: & faut que mes vers plaingnent
La dure mort de la mere du Roy
Mon Mecenas. Et si quelque desroy
On trouve icy, ou resverie aucune,
Tu n'as Gontier, pour moy excuse qu'une,
C'est, que celuy pour resueur on prendra,
Qui un resvant, en sievre reprendra.

### A VIGNALS THOULOUSAN

Que le vouloir, & l'entiere fanté,
Que le vouloir, ta response alongée
Seroit du tiers, & beaucoup mieux songée,
Ce neantmoins, Vignals, je pense bien,
Que tu congnois, que le souverain bien
De l'amitié, ne gist en longues lettres,
En mots exquis, en grand nombre de Metres,
En riche rime, ou belle invention,
Ains en bon cueur, & vraye intention.

Donc je m'attends, qu'excusé je seray De ton bon sens. Or à tant cesseray, Ma Muse soible à peine peult chanter: Mais pour le moins tu te peux bien vanter, Que de Marot tu as à ta commande Petite epistre, & amitié bien grande.

#### A MONSEIGNEUR DE GUISE

PASSANT PAR PARIS

VA tost epistre, il est venu, il passe, Et part demain des Princes l'outre passe : Il le te fault faluër humblement, Et dire ainsi : Vostre humble serf Clement (Prince de pris) luy mesme fust venu, Mais maladie au lict l'ha retenu Si longuement, qu'onques ne fut si mince. Palle et desfait. Vray est, illustre Prince, Qu'en ce corps maigre est l'esprit demouré. Qui autresfois ha pour vous labouré, Non bien fachant combien il y doibt estre : Parquoy tandis qu'il vit en ce bas estre, Servez vous en. Ainfi diras, epiftre, A cil qui est digne de Roval tiltre, Puis te tairas : car tant debile fuis, Que d'un feul vers alonger ne te puis.

#### AU ROY

POUR SUCCEDER EN L'ESTAT DE SON PERE

Non que par moy foit arrogance prinfe, Non que ce foit par curieuse emprinse D'escrire au Roy: pour tout cela ma plume D'ardant desir de voller ne s'allume. Mon juste dueil, seulement l'ha contrainte, De faire à vous, & non de vous, complainte. Il vous ha pleu, Sire, de pleine grace, Bien commander qu'on me mist en la place Du pere mien, vostre sers humble mort: Mais la Fortune ou luy plaist, rid & mord. Mors elle m'ha, & ne m'ha voulu rire. Ne mon nom saire en voz papiers escrire: L'estat est fait, les personnes rengées, Le parc est clos, & les brebis logées Toutes, fors moy, le moindre du trouppeau. Qui n'ha toyson, ne laine sur la peau.

Si ne peult pas grand loz Fortune acquerre. Quand elle meine aux plus foibles la guerre. Las pourquoy donc à mon bon heur s'oppose? Certes mon cas pendoit à peu de chose, Et ne falloit, Sire, tant seulement, Qu'effacer Jean, & escrire Clement. Or en est Jean par son trespas hors mis, Et puis Clement par son malheur obmis : C'est bien malheur, ou trop grand' oubliance Car quant à moy, j'ay ferme consiance, Que vostre dire est un divin Oracle, Ou nul vivant n'oseroit mettre obstacle. Telle tousiours a esté la parolle, Des Roys, de qui le bruit aux Astres volle.

Je quier fans plus Roy de loz eternel, Estre heritier du seul bien paternel: Seul bien je dy, d'autre n'en eut mon pere. Ains s'en tenoit si content, & prospere, Qu'autre oraison ne faisoit iceluy, Fors que peussiez vivre par dessus luy: Car vous vivant, tousiours se sentoit riche. Et vous mourant, sa terre estoit en friche.
Si est il mort ainsi qu'il demandoit:
Et me souvient, quand sa mort attendoit,
Qu'il me disoit, en me tenant la dextre,
Filz, puis que Dieu t'a fait la grace d'estre
Vray heritier de mon peu de savoir,
Quiers en le bien qu'on m'en ha fait avoir:
Tu congnois, comme user en est decent:
C'est un savoir tant pur, & innocent,
Qu'on n'en sauroit à creature nuire.

Par Preschemens le peuple on peult seduire :
Par Marchander, tromper on le peult bien :
Par Plaiderie on peult manger son bien :
Par Medecine on peult l'homme tuer :
Mais ton bel art ne peult telz coups ruer :
Ains en sauras meilleur Ouvrage tistre.
Tu en pourras ditter Lay, ou Epistre,
Et puis la faire à tes Amis tenir,
Pour en l'amour d'iceux t'entretenir,
Tu en pourras traduire les volumes
Jadis escrits par les divines plumes
Des vieux Latins, dont tant est mention.

Apres tu peux de ton invention
Faire quelque Oeuvre à jetter en lumiere:
Dedans lequel en la fueille premiere
Dois invoquer le nom du tout puissant.
Puis descriras le bruit resplendissant
De quelque Roy, ou Prince, dont le nom
Rendra ton Oeuvre immortel de renom:
Qui te sera, peult estre, si bon heur,
Que le proussit fera joint à l'honneur.

Donc pour ce faire, il faudroit que tu prinfes Le droit chemin du fervice de Princes: Mesmes du Roy, qui cherit, & pratique Par son haut sens ce noble art Poëtique. Va donc à luy, car ma sin est presente, Et de ton fait quelque Oeuvre luy presente : Le suppliant que par sa grand' douceur, De mon Estat te sace successeur. Que pleures-tu, puis que l'aage me presse? Cesse ton pleur, & va où je t'addresse.

Ainsi disoit le bon Vieillard mourant: Et aussi tost que vers vous sus courant, Plus sut en vous liberalité grande, Qu'en moy desir d'impetrer ma demande, Je l'impetray, mais des fruits je n'herite: Vray est aussi, que pas ne les merite, Mais bien est vray, que j'ay d'iceux besoing.

Or si le cueur, que j'ay de prendre soing A vous servir, si ceste Charte escrite,
Ou du defunct quelque faveur petite
Ne vous esmeut (ô Sire) à me pourvoir,
A tout le moins vous y vueille esmouvoir
Royal' promesse, en qui tout asseurance
Doit consister. La gist mon esperance,
Laquelle plus au defunct ne peult estre,
Combien qu'il eust double bien, comme un Prestre:
C'est assavoir Spiritualité,
Semblablement la Temporalité.
Son Art estoit son bien Spirituel:
Et voz bienssaits estoyent son Temporel.
Or m'ha loissé son Spiritual bien :

Or m'ha laissé son Spirituel bien: Du temporel jamais n'en auray rien, S'il ne vous plaist le commander en sorte, Qu'obeissance, à mon proussit, en sorte.

# POUR LA PETITE PRINCESSE DE NAVARRE

A MADAME MARGUERITE

Vorant que la Royne ma Mere Trouve à present la Rime amere, Ma Dame, m'est prins fantasse De vous monstrer qu'en Poesse Sa Fille suis. Arriere Prose, Puis que rimer maintenant j'ose.

Pour commencer donc à rimer, Vous pouvez, ma Dame, estimer, Quell' jove à la Fille advenoit, Sachant que la Mere venoit : Et quelle joye est advenuë A toutes deux à sa venuë.

Si vous n'en favez rien, j'espere, Qu'au retour du Roy vostre Pere Semblable joye sentirez, Puis des nouvelles m'en direz.

Or, felon que j'avois envie, Par eau jufqu'icy l'ay fuivie, Avecques mon bon Perroquet Vestu de vert, comme un bouquet De marjolaine. Et au dit lieu M'ha suyvie mon Escurieu, Lequel tout le long de l'année Ne porte que robbe Tannée,

J'ay aussi pour faire le tiers Amené Bure en ces quartiers, Qui monstre bien à son visage Que des trois n'est pas la plus sage. Ce font là des nouvelles nostres:
Mandez nous, s'il vous plaist, des vostres,
Et d'autres nouvelles aussi:
Car nous en avons faute icy.
Si de la Court aucun revient,
Mandez nous (s'il vous en souvient)
En quel estat il la laiss'a.

Des nouvelles de pardeça : Loire est belle & bonne Riviere, Qui de nous revoir est si fiere, Qu'elle en est enslée, & grossie, Et en bruyant nous remercie,

Si vous l'eussiez donc Abordée:
Je croy qu'elle fust desbordée:
Car plus siere seroit de vous,
Qu'elle n'ha pas esté de nous:
Mais Dieu ce bien ne m'ha donné,
Que vostre chemin adonné
Ce soit icy: & faut, que sente
Parmy ceste joye presente
La tristesse de ne vous voir.

Joye entiere on ne peult avoir, Tandis que l'on est en ce Monde: Mais, afin que je ne me fonde Trop en Raison, icy je mande A vous, & à toute la Bande, Qu'Estienne, ce plaisant Mignon, De la danse du compaignon, Que pour vous il ha compassée, M'ha ja fait maistresse passée. De fine force, par mon ame, De me dire, Tournez ma dame. Si tost qu'ensemble nous serons,

Si Dieu plaist, nous la danserons.

Ce temps pendant soit loing, soit pres, Croyez que je suis faite expres
Pour vous porter obeissance,
Qui prendra tousiours accroissance,
A mesure que je croistray:
Et sur cela sin je mettray
A l'escrit de peu de value,
Par qui humblement vous salue
Celle qui est vostre sans cesse.
Jane de Navarre Princesse.

#### AU GENERAL PRÉVOST

Je l'ay receu ton gracieux envoy:
Trescher Seigneur, te promettant en soy
D'homme non faint, que leu, & regardé
L'ay plusieurs sois, & si sera gardé,
Tout mon vivant, parmy toutes les choses.
Que j'ay au cueur par souvenir encloses,
Que je crains perdre, & dont j'ay cure, & soing.

Ce tien escrit, certes, sera tesmoing A tousioursmais de l'amitié ouverte, Laquelle m'as de si bon cueur offerte, Que la reçoy : & par ceste presente De mesme cueur la mienne te presente. Bien est il vray, que la tienne amitié Passe en povoir la mienne de moytié : Mais de retour, je t'offre le service, Qui ne saudra de saire son office, En & par tout ou voudras l'employer. Et fur ce poinét vois ma lettre ployer, Pour me remettre aux choses ordonnées, Que pour t'escrire avois abandonnées.

### A ALEXIS JURE

DE QUIERS EN PIEDMONT

MY Jure Je te iure. Que desir. Non loifir, J'ay d'escrire. Or de dire, Oue tes Vers Me font verds. Durs ou aigres Ou trop maigres, Qui l'ha dit, A mefdit: Toutesfois Je m'en vois Dire en fens, Que j'en fens. Ton vouloir Fait valoir Tes escrits, Que j'ay pris En gré, comme Si docte homme

Chastelain. Ou Alain Les euft faits. De leurs faits. Sans reproches Tu n'approches: Mais il faut Ton deffaut Raboter. Pour ofter Les gros neudz, Lourds, & neufz Du langage Tout ramage: Et que limes, Quand tu rimes, Tes metures, Et cefures. Alors maittre Pourras eftre : Car ta veine N'est point vaine : Mais d'icelle Le bon zelle D'amitié La moytié Plus j'estime Que ta rime : Qui un jour A sejour-Sera faite Plus parfaite. Cependant,
Attendant
Que te voye,
Je t'envoye
Jufqu'en France
Affeurance,
Que je quiers
Congnoissance
D'un de Quiers.

### A UNE DAMOYSELLE MALADE

Ma mignonne,
Je yous donne
Le bon jour,
Le fejour
C'est prison:
Guerison
Recouvrez:
Puis ouvrez
Vostre porte,
Et qu'on sorte
Vistement:
Car Clement
Le vous mande.
Va friande

De ta bouche,
Qui fe couche
En danger
Pour manger
Confitures:
Si tu dures
Trop malade,
Couleur fade
Tu prendras,
Et perdras
L'embonpoint.
Dieu te doint
Santé bonne,
Ma mignonne.



#### A DEUX DAMOYSELLES

#### SUSCRIPTION

Sus lettre, il faut que tu desloges : Par toy faluer je pretens La nouvelle Espouse Bazoges : Aussi Trezay, qui perd son temps.

M Es Damoyfelles,
Bonnes, & belles,
Je vous envoye
Mon feu de joye:
Si j'avois mieux,
Devant vos yeux
Il feroit mis:
A fes Amis
Bien, tant foit cher,
Ne faut cacher.
Or est besoing,
Quand on est loing,
De s'entr'escrire.

Et chasse esmoy. Escrivez moy

Cela fait rire,

Donc je vous prie: Car l'enfant crie. Quand on luy fault. S'il ne le vaut Il le vaudra: Et ne faudra D'estre à jamais Tout vostre: mais Dieu sait combien Il voudroit bien Vous fupplier Ne l'oublier. Ailleurs, ne là Rien que cela II ne demande? Me recommande.



# A CEUX, QUI APRÈS L'EPIGRAMME DU BEAU TETIN EN FEIRENT D'AUTRES

Nouveaux Phebus furpassans les antiques, Graces vous rends, dont avez imité Non un Tetin beau par extremité, Mais un Blason, que je sey de bon zelle Sur le Tetin d'une humble Damoyselle.

En me suyvant vous avez blasonné:
Dont hautement je me sens guerdonné.
L'un de sa part, la Chevelure blonde:
L'autre le Cueur: l'autre la Cuisse ronde:
L'autre la Main descrite proprement:
L'autre un bel Oeil deschiffre doctement:
L'autre un Esprit, cherchant les Cieux ouvers:
L'autre la Bouche, ou sont plusieurs beaux vers:
L'autre une Larme, & l'autre a fait l'Oreille,
L'autre un Sourcil de beauté non pareille.

C'est tout cela, qu'en ay peu recouvrer:
Et si bien tous y avez seu ouvrer,
Qu'il n'y ha cil, qui pour vray ne deserve
Un pris à part de la main de Minerve:
Mais du Sourcil la beauté bien chantée
A tellement nostre Court contentée,
Qu'à son autheur nostre Princesse donne
Pour ceste fois de Laurier la couronne:
Et m'y consens, qui point ne le congnois,
Fors qu'on m'ha dit, que c'est un Lyonnois.

Oh faint Gelais, creature gentile, Dont le favoir, dont l'esprit, dont le style, Et dont le tout rend la France honorée, A quoy tient il que ta plume dorée N'ha fait le sien? ce mauvais vent qui court : T'auroit il bien poulsé hors de la Court? Oh Roy François, tant qu'il te plaira pers le, Mais si le pers, tu perdras une Perle, Sans les susdits Blasonneurs blasonner, Que l'Orient ne te sauroit donner.

Or chers Amis, par maniere de rire Il m'est venu voulonté de descrire A contrepoil un Tetin, que j'envoye Vers vous, afin que fuiviez ceste voye. Je l'eusse paint plus laid cinquante fois, Si j'euse peu : tel qu'il est toutesfois, Protester veux, afin d'eviter noise, Que ce n'est point un Tetin de Françoise, Et que voulu n'ay la bride lascher A mes propos, pour les Dames fascher : Mais voulontiers, qui l'esprit exercite, Ores le blanc, ores le noir recite : Et est le paintre indigne de louange, Qui ne sait paindre aussi bien Diable qu'Ange, Apres la course, il faut tirer la barre : Après bemol, faut chanter en beccarre.

Là donc Amis, celles qu'avez louées, Mieux qu'on n'ha dit, font de beauté douées : Parquoy n'entens, que vous vous desdiez Des beaux blasons à elle dediez : Ains que chacun le rebours chanter vueille, Pour leur donner encores plus grand'fueille : Car vous savez qu'à gorge blanche, & grasse Le cordon noir n'ha point mauvaise grace.

Là donc, là donc, poulsez, faites merveilles : A beaux Cheveux, & à belles Oreilles : Faites les moy les plus laids que l'on puisse :
Pochez cet Oeil fessez moy ceste Cuisse :
Descrivez moy en style espoventable
Un Sourcil gris, une Main detestable :
Sus, à ce Cueur, qu'il me soit pelaudé,
Mieux, que ne sut le premier collaudé :
A ceste Larme : & pour bien estre escrite,
Deschissrez moy celle d'un Hypocrite :
Quant à l'esprit paingnez moy une souche :
Et d'un Taureau le musle, pour la Bouche.
Brief, faites les si horribles à voir,
Que le grand Diable en puisse horreur avoir.

Mais je vous pry, que chacun Blasonneur Vueille garder en ses escrits honneur:
Arriere mots, qui sonnent salement,
Parlons aussi des membres seulement
Que lon peult voir sans honte descouvers,
Et des honteux ne souillons point noz Vers:
Car quel besoing est il mettre en lumiere
Ce qu'est Nature à cacher coustumiere?

Ainsi ferez pour à tous agréer,
Et pour le Roy mesmement recréer
Au soing qu'il a de guerre ja tyssue:
Dont Dieu luy doint victorieuse yssue.
Et pour le pris, qui mieux faire saura,
De verd Lierre une couronne aura:
Et un dizain de Muse Marotine,
Qui chantera sa louange condigne.



# DU COQ'A L'ASNE

### A LYON JAMET

Pus que respondre ne me veux, Je ne te prendray aux cheveux, Lyon, mais sans plus te semondre, Moy mesme je me veux respondre: Et seray le Prestre Martin.

Ce Grec, cest Hebreu, ce Latin, Ont descouvert le pot aux roses. Mon Dieu, que nous verons de choses, Si nous vivons l'aage d'un veau.

Et puis que dit on de nouveau?

Quand part le Roy? aurons nous guerre?

O la belle piece de terre!

Il la faut joindre avec la mienne:

Mais pourtant la Bohemienne

Porte tousjours un chapperon.

Ne donnez jamais l'esperon A Cheval qui voulontiers trotte. D'où vient cela, que je me frotte Aux coursiers, & suis tousjours Rat? Ilz escument comme un Verrat En pleine chaire ces Cagots, Et ne preschent que des sagots Contre ces povres Heretiques.

Non pas, que j'oste les pratiques Des vieilles qui ont si bon cueur : Car comme dit le grand moqueur, Elles tiennent bien leur partie. C'est une dure departie D'une teste, & d'un eschafaut : Et grand' pitis, quand beauté faut A cueur de bonne voulonté.

Puis vous scavez, Pater sancte, Que vostre grand pouvoir s'efface. Mais que voulez-vous que j'y fasse? Mes financiers font tous peris. Il n'est bourreau que de Paris, Ny long proces, que dudit lieu.

Si ne fey-je jamais l'Adieu, Qui parle de la Pauthonniere. Vray est qu'elle fut buyssonniere L'escole de ceux de Pavie. Fy de l'honneur, vive la vie, Vive l'amour, vivent les Dames.

Toutesfoys, Lyon, fi les ames Ne s'en vont plus en Purgatoire, On ne me sauroit faire à croire, Que le Pape y gaigne beaucoup. A la Campagne, acoup, acoup, Hau, Capitaine Pinsemaille, Le Roi n'entend point que merdaille Tiennent le reng des vieux routiers.

Et puis dites, que les monstiers Ne fervent point aux Amoureux, Bonne maquerelle pour eux Est ombre de devotion.

C'est une bonne caution, Que Monsieur de la Moriniere : En ce temps là vint la maniere De se paindre aveques des fars.

Sire, ce disent ces Caphars,

Si vous ne bruslez ces mastins, Vous serez un de ces matins Sans tribut, taille, ne truage. Qui Diable seit le Cocuage Des Parisiens l'autre esté? Pour le moins, si j'y eusse esté, On eust dit, que c'eust esté mov.

Touche là : je fuis en esmoy Des froids amis que j'ay en France: Mais je trouve que c'est outrance, Que l'un ha trop, & l'autre rien.

Est-il vray, que ce vieil marrien
Marche encore dessus espines,
Et que les jeunes tant poupines
Vendent leur chair, cher comme cresme?
S'il est vray, adieu le Caresme,
Au Concile, qui se fera:
Mais Romme tandis boussera
Des chevreaux à la chardonnette.

Attachez moy une fonnette
Sur le front d'un Moyne crotté,
Une Oreille à chacun costé
Du capuchon de sa caboche,
Voila un sot de la Bazoche
Aussi bien paint qu'il est possible:
De sorte qu'on feroit un Crible
De tous les trous qui s'abandonnent
A ceux qui les richesses donnent.

J'ay flux, contre flux, carte amont: Dieu pardoint au povre Vermont, Il chantoit bien la basse contre: Et les maris la malencontre, Quand les femmes sont le dessus. A fçavoir mon si les bossus Seront tous droits en l'autre monde? Je le dy, pource qu'on se fonde Trop sus Venus, & sus les vins. Parquoy je ne veux qu'aux Devins Personne sa fiance mette.

Or ça, le livre de Flammette, Formosum pastor, Celestine, Tout cela est bonne doctrine, Et n'y ha rien de dessendu.

Icy gerra, s'il n'est pendu, Ou si en la Mer il ne tombe, Monsieur qui ha dressé sa tombe, Avant que d'estre trespassé.

Faut-il pour un verre cassé
Perdre pour vingt ans de service?
Non, Monsieur, non, ce n'est pas vice,
Que simple fornication:
J'en seray la probation.
Par une cotte violette
Que donna la teste follete,
Autrement le Dieu des proces,
Au moyen de quoy trop d'exces
Sont engendrez de tant de service.

En effect, c'estoient de grans bestes, Que les Regens du temps jadis: Jamais je n'entre en Paradis, S'ilz ne m'ont perdu ma jeunesse.

Mais comment se porte l'Asnesse, Que tu sçais, de Jerusalem? S'elle veut mordre, garde l'en: Elle parle comme de cire: Vous dites vray de cela, Sire: Une Estrille, une Faux, un Veau, C'est à dire estrille Fauveau. En bon rebus de Picardie.

Lyon, veux-tu, que je te die?
Je me trouve dispost des levres:
Et d'autres bestes que les chevres,
Portent barbe grise au menton.
Je ne dis pas que Melanchthon
Ne declare au Roy son advis:
Mais de disputer vis à vis,
Noz maistres n'y veulent entendre.
Combien que la jeunesse tendre
Soit par tout assez mal apprinse.

Tu ne fçais pas, Thunis est prinse: Triboulet ha frères, & sœurs: Les Anglois s'en vont bons danseurs: Les Allemans tiennent mesure.

On ne preste plus à usure : Mais tant qu'on veult, à interest.

A propos de Perceforest,
Lit-on plus Artus, & Gauvain?
Il ha prins l'Evangile en vain
Le punais, & s'en est fait riche:
Et puis s'efforce mettre en friche
La vigne, & ses petis bourgeons.

Tout beau: je vous pry, ne bougeons, Vous dites que ce fut jeudy:
Non fay, non, voicy que je dy:
Je dy qu'il n'est point question
De dire, j'allion, ne j'estion,
Ny se renda, ny je frappy:
Tesmoing le Comte de Carpy,
Qui se feit Moyne apres sa mort.

Laisse moy là, qui rid, & mord, Et demande au petit Roger: Si ceux que l'on feit desloger Hors des Villes, crioyent campos.

Vrayment, puis qu'il vient à propos, Je vous en veux faire le compte : Elles n'ofent dire Viconte, Vigueur, Vicourt, ne Vilevé : Leur petit bec feroit grevé, En danger d'estre trop fenduës.

On dit que les Nonnains renduës Donnent gentilment la verole. D'estre bruslé pour la Parole, Je te pry ne fois point couart : Mais pour la foy de Billouart Laisse mourir ces Sorbonistes. Raison : la glose des Legistes Lourdement gaste ce beau texte.

Pour ceste cause je proteste, Que l'Antechrist succumbera : Au moins, que brief tombera Sur Babylone quelque orage.

Marguerite de franc courage N'ha plus fes beaux yeux esblouis. Dieu gard la fille au Roy Loys, Qui me réçoit quand on me chaffe.

Voulez-vous preferer la chasse Au vol du Mlian suspendu? Si Dieu ne l'avoit dessendu, Et je susse en mon advertin, Je donrois quinze à l'Aretin, Et si gaignerois la partie,

D'un tas de gros Afnes, ou yvres. Qui font imprimer leurs fots Livres, Pour acquerir bruit d'estre Veaux. A Fleury font les bons naveaux: Les richesses en ces Prelats.

Et puis c'est tout : je suis tant las, Que quatorze Archers de la garde Me battroient à la halebarde.

Quant au Palais, tousjours il grippe : Adieu vous dy, comme une trippe.

### LYON JAMET A MAROT

#### SUBSCRIPTION

Va lettre, va, va t'en à l'adventure Droit à Clement, & s'il en fait lecture. Recorde toy de luy faire semonse Joyeusement, de te donner response.

Mais voirement, amy Clement,
Tout clerement, dy moy comment
Tant, & pourquoy tu te tiens quoy,
D'escrire à moy, qui suis à toy?
T'ay-je laissé par le passé?
T'ay-je offensé, ou courroussé?
Ay-je à ton dit, & intendit,
En fait ou dit, rien contredit?
Ay-je à ton nom donné renom,
Autre que bon? tu sçais que non:
Ny ne voudrois, & ne sçaurois,

Tant font tes droits justes, & droits. Devant les yeux de tous les Dieux, Et demy Dieux, jeunes & vieux, J'atteste, & jure, & en rejure, Qu'aucune injure, ou mal augure, Nul laps de temps, ne lieux distans, Escrits latens, ne vieux Satans, N'ont peu avoir force & pouvoir, De concevoir, c'est à savoir, Un seul congé, qu'ave songé, En son plongé, d'avoir changé, Ne rien osté, de mon costé En lovauté, & feauté De nostre amour, pas un seul tour Depuis le jour de ton retour.! Mais tant s'en faut, qu'un tel défaut, En froid, ou chaud, ait fait le faut En mon pourpris, que n'ays repris, Qui ne t'ha pris, pour un grand pris.

Or donc amy, de ton amy,
Qui ennemy, n'as un demy,
Que veux-tu dire? Est-ce pour rire,
Que de proscrire, & interdire,
Une amour vieille? O grand' merveille!
Quand je sommeille, elle m'esveille,
Et dy ainsi: Dieu qu'est cecy?
Cest homme icy, est-il transy,
Ses bons esprits, ses beaux escrits,
De si haut pris, sont-ilz prescrits?
Son cueur humain, tant pur & plein
De bon levain, changé de main
Auroit-il bien, pour quelque bien
Qu'il se void sien? Je n'en croy rien?

Car les esfets, de ses beaux faits N'ont esté faits, si contrefaits. Et quant & quant, il m'ayme tant, Que luy estant bien malcontent, Il ne sçauroit, quand il voudroit, Or qu'il eust droit, en mon endroit, S'en ressentir, ne consentir, Sans en mentir, à moy martyr : Car fçait-il pas, que tous noz pas, Et tous noz cas, sont par compas Comptez, nombrez & denombrez, Puis obumbrez, & adombrez? Si fait, si fait : bien il le sçait : Le tout parfait, bien luv ha fait Voir & comprendre, & tant apprendre Qu'il en peult vendre, & en espandre. Et d'avantage, il est de l'aage, Et du pellage, ou l'homme est sage, Ou jamais non. Et puis fon nom, D'estre tout bon, ha le renom.

Or donc Clement, tout clerement, Bien feurement, & promptement, Escri pourquoy, tu te tiens coy, De tenir loy, au second toy, Qui est icy, sans grand soucy, La Dieu mercy, & toy aussi.

C'est à Ferrare, au huictiesme An De la sienne proscription Mais à la tienne intention, Que ce soit le dernier. Amen.



# AU ROY

DU TEMPS DE SON EXIL A FERRARE

J E pense bien que ta magnificence, Souverain Roy, croira que mon absence Vient par sentir la coulpe, qui me point D'aucun messait: mais ce n'est pas le poinét.

Je ne me fens du nombre des coupables : Mais je sçay tant de Juges corrompables Dedans Paris, que par pecune prinse, Ou par amis, ou par leur entreprinse, Ou en faveur, & charité piteuse De quelque belle humble foliciteuse, Ilz fauveront la vie orde, & immunde Du plus meschant, & criminel du monde. Et au rebours, par faute de pecune, Ou de support, ou par quelque rancune Aux innocens ilz font tant inhumains, Que content suis ne tomber en leurs mains. Non pas que tous je les mette en un compte Mais la grand' part la meilleure furmonte. Et tel merite y être authorifé, Dont le confeil n'est ouy, ne prisé.

Suyvant propos, trop me font ennemys
Pour leur Enfer, que par escrit j'ay mis,
Ou quelque peu de leurs tours je descœuvre,
Là me veult on grand mal pour petit œuvre.
Mais je leur suis encor plus odieux,
Dont je l'ofay lire devant les yeux
Tant cler voyans de ta majesté haute,

Qui ha pouvoir de reformer leur faute.

Brief, par effect, voire par fois diverses
Ont declaré leur voulontez perverses
Encontre moy: mesmes un jour ils vindrent
A moy malade, & prisonnier me tindrent
Faisans arrest sus un homme arresté
Au lict de mort: & m'eussent pis traité,
Si ce ne fust ta grand' bonté, qui à ce
Donna bon ordre avant que t'en priasse,
Leur commandant de laisser choses telles:
Dont je te rends graces tressmmortelles.

Autant comme eux, sans cause qui soit bonne Me veult de mal l'ignorante Sorbonne :
Bien ignorante elle est d'estre ennemie
De la trilingue, & noble Academie,
Qu'as erigée. Il est tout manifeste,
Que là dedans contre ton vueil celeste
Est dessendu qu'on ne voise allegant
Hebrieu, ny Grec, ny Latin elegant :
Disant, que c'est langage d'Heretiques.
O povres gens de sçavoir tous ethiques!
Bien faites vray ce proverbe courant,
Science n'ha hayneux que l'ignorant.

Certes, ô Roy, si le profond des cueurs
On veult sonder de ces Sorboniqueurs,
Trouvé sera que de toy ils se deulent?
Comment douloir? Mais que grand mal te veulent,
Dont tu as fait les lettres, & les arts
Plus réluisans, que du temps des Cesars:
Car leurs abus void on en façon telle.
C'est toy, qui as allumé la chandelle,
Par qui maint œil void mainte verité,
Qui sous épesse, & noire obscurité

A fait tant d'ans icy bas demeurance.
Et qu'est-il rien plus obscur qu'ignorance?
Eux, & leur court en absence, & en face
Par plusieurs fois m'ont usé de menace:
Dont la plus douce estoit en criminel
M'executer. Que pleust à l'Eternel,
Pour le grand bien du peuple desolé,
Que leur desir de mon sang sust saoulé,
Et tant d'abus, dont ilz se sont munis,
Fusient à cler descouvers, & punis.
O quatre sois, & cinq sois bienheureuse
La mort, tant soit cruelle, & rigoureuse,
Qui feroit seule un million de vies,
Sous telz abus n'estre plus asservies.

Or à ce coup il est bien évident, Que dessus moy ont une vieille dent, Quand ne pouvans crime fur moy prouver, Ont tresbien quis, & tresbien sceu trouver Pour me fascher, briefve expedition, En te donnant mauvaise impression De moy ton ferf, pour apres à leur aife Mieux mettre à fin leur voulonté mauvaife : Et pour ce faire ilz n'ont certes eu honte Faire courir de moy vers toy maint compte, Aveques bruit plein de propos menteurs, Desquelz ils sont les premiers inventeurs. De Lutheriste ilz m'ont donné le nom : Qu'à droit ce soit, je leur responds que non. Luther pour moy des cieux n'est descendu: Luther en Croix n'ha point esté pendu Pour mes pechez: & tout bien advisé, Au non de luy ne suis point baptizé: Baptize suis au nom qui tant bien sonne,

Qu'au fon de luy le Pere éternel donne Ce que l'on quiert: le feul nom fous les cieux En, & par qui ce monde vicieux Peut estre faus. Le nom tant fort puissant, Qu'il ha fendu tout genouil flechissant, Soit infernal, soit celeste, ou humain: Le nom, par qui du Seigneur Dieu la main M'ha preservé de ces grands loups rabis, Qui m'espioient dessous peaux de Brebis.

O Seigneur Dieu, permettez moy de croire Que refervé m'avez à vostre gloire. Serpens tortus, & Monstres contrefaits Certes font bien à vostre gloire faits. Puis que n'avez voulu donc condescendre, Que ma chair vile ayt esté mise en cendre, Faites au moins: tant que feray vivant, Qu'à vostre honneur soit ma plume escrivant : Et si ce corps avez predestiné A estre un jour par flamme termine, Que ce ne soit au moins pour cause folle : Ainçois pour vous, & pour vostre Parolle: Et vous supply, Pere, que le tourment Ne luy foit pas donné fi vehement, Que l'ame vienne à mettre en oubliance Vous, en qui feul gist toute sa fiance : Si que je puisse avant que d'assoupir, Vous invoquer jusque au dernier souspir Que dy-je? où fuis-je? O noble Roi François,

Pardonne moy, car ailleurs je penfois.

Pour revenir donques à mon propos,
Rhadamanthus aveques ses supposts

Dedans Paris, combien que fusse à Blois, Encontre moy fait ses premiers exploits,

En faisissant de ses mains violentes Toutes mes grandes richesses excellentes, Et beaux trefors, d'avarice delivres : C'est à savoir mes papiers, & mes livres, Et mes labeurs. O Juge facrilege, Qui t'ha donné, ne loy, ne privilege D'aller toucher, & faire tes massacres Au cabinet des faintes Mufes facres? Bien est-il vray que livres de deffense On y trouva: mais cela n'est offense A un Poëte, à qui on doibt lascher La bride longue, & rien ne lui cacher, Soit d'art Magie, Necromance, ou Caballe. Et n'est doctrine escrite, ne verbale, Ou'un vray Poëte au chef ne deust avoir, Pour faire bien d'escrire son devoir.

Savoir le mal est fouvent proussitable, Mais en user est toujours evitable. Et d'autre part, que me nuist de tout lire? Le grand donneur m'ha donné sens d'essire En ces livrets tout cela qui accorde Aux faints escrits de grace, & de concorde. Et de jetter tout cela qui dissere Du sacré sens quand pres on le confere. Car l'escriture est la touche, où l'on treuve Le plus haut Or. Et qui veult faire espreuve D'Or quel qu'il soit, il le convient toucher A ceste pierre, & bien pres l'approcher De l'Or exquis, qui tant se fait paroistre, Que bas ou haut tout autre fait congnoistre.

Le Juge donc affecté se monstra En mon endroit, quand les premiers outra Moy, qui estois absent, & loing des villes, Où certains fols feirent choses trop viles, Et de scandale: helas, au grand ennuy, Au detriment, & à la mort d'autruy. Ce que sçachant, pour me justifier, En ta bonté je m'osay tant fier, Que hors de Blois party, pour à toy Sire, Me presenter: mais quelcun me vint dire, Si tu y vas amy, tu n'es pas sage: Car tu pourrois avoir mauvais visage De ton Seigneur. Lors comme le Nocher, Qui pour suir le peril d'un Rocher En pleine Mer se destourne tout court, Ainsi pour vray m'escartay de la Court: Craignant trouver le peril de durté: Où je n'euz onc fors douceur, & seurté.

Puis je sçavois, sans que de fait l'apprinse, Qu'à un subject l'œil obscur de son Prince Est bien la chose en la terre habitable La plus à craindre, & la moins souhaitable.

Si m'en allay, evitant ce danger, Non en païs, non à Prince estranger, Non point usant de fugitif destour, Mais pour servir l'autre Roy à mon tour, Mon second Maistre, & ta sœur son espouse, A qui je sus des ans a quatre et douze, De ta main noble heureusement donné.

Puis tost apres, Royal chef couronné, Sçachant plusieurs de vie trop meilleure, Que je ne suis, estre bruslez à l'heure, Si durement, que mainte nation En est tombée en admiration, J'abandonnay, sans avoir commis crime, L'ingrate France, ingrate, ingratissime A fon Poëte: & en la delaissant, Fort grand regret ne vint mon cueur blessant: Tu ments Marot, grand regret tu sentis, Quand tu pensas à tes Ensans petits.

Enfin passay les grandes froides montagnes, Et vins entrer aux Lombardes campagnes: Puis en l'Italie, où Dieu qui me guidoit, Dressa mes pas au lieu où residoit De ton clair sang une Princesse humaine, Ta belle sœur, & cousine germaine, Fille du Roy tant craint, & renommé, Pere du peuple aux Chroniques nommé.

En sa Duché de Ferrare venu,
M'ha retiré de grace, & retenu:
Pource que bien luy plaist mon escriture,
Et pourautant que suis ta norriture.
Par quoy, ô Sire, estant aveques elle,
Conclurre puis d'un franc cœur, & vray zelle,
Qu'à moy ton serf ne peult estre donné
Reproche aucun, que t'aye abandonné,
En protestant, si je perds ton service,
Qu'il vient plustost de malheur, que de vice.

### A MONSEIGNEUR LE DAUPHIN

DU TEMPS DE SONDIT EXIL.

E'n mon vivant, n'apres ma mort avec, Prince Royal, je ne tournay le bec Pour vous prier: or devinez qui est ce, Qui maintenant en prend la hardiesse?

Marot banny, Marot mis en requoy, C'est luy sans autre, & savez vous pourquoy Ce qu'il demande il ha voulu escrire? C'est pourautant qu'il ne l'ose aller dire, Voila le poinct, il ne faut pas mentir, Oue l'air de France il n'ose aller sentir : Mais s'il avoit sa demande impetrée : Jambes ne teste il n'ha si empestrée, Qu'il n'y vollast, en vous parlant ainsi, Plusieurs diront que je m'ennuye icy, Et pensera quelque caffart pelé, Que je demande à estre r'appellé, Mais (Monfeigneur) ce que demander j'ofe De quatre parts n'est pas si grande chose : Ce que je quier, & que de vous espere, C'est qu'il vous plaise au Roy vostre cher pere Parler pour moy, si bien qu'il soit induit A me donner le petit faufconduit, De demy an que la bride me lache, Ou de fix moys, si demy an luy fache: Non pour aller visiter mes Chasteaux, Mais bien pour voir mes petis Maroteaux, Et donner ordre à un faix qui me poise. Aussi afin que dire Adieu je voise A mes amis & mes compagnons vieux: Car vous favez, si fais je encores mieux, Que la poursuite & fureur de l'affaire Ne me donna jamais temps de ce faire : Aussi afin qu'encor un coup j'accole La Court du Roy, ma Maistresse d'escole. Si je vois là, mille bonnets oftez, Mille bons jours viendront de tous costez, Tant de Dieu gards, tant qui m'embrasseront :

Tant de faluts qui d'Or point ne seront. Puis ce dira quelque langue friande, Et puis Marot, est ce une grand' viande Ou'estre de France estrangé & banny? Par Dieu Monsieur, ce diray-je, nenny. Lors que de cheres & grandes accolées, Prendray les bons, laisseray les volées : Adieu messieurs, Adieu donc mon mignon: Et cela fait, verrez le compagnon Toft defloger, car mon terme failly Je ne craindrois, finon d'estre assailly, Et empaumé, Mais si le Roy vouloit Me retirer, ainsi comme il souloit, Je ne dy pas qu'en gré je ne le prinse :-Car un vassal est subject à son Prince. Il le feroit s'il favoit bien comment Depuis un peu je parle sobrement : Car ces Lombards avec qui je chemine, M'ont fort apris à faire bonne mine : A un mot seul de Dieu ne deviser, A parler peu, & à poltronniser. Dessus un mot une heure je marreste : S'on parle à moy, je respons de la teste. Mais je vous prv mon faufconduit ayons, Et de cela plus ne nous esmayons, Affez avons espace d'en parler, Si une fois vers vous je puis aller.

Conclusion, Royale geniture,
Ce que je quier n'est rien qu'une escriture,
Que chacun jour on baille aux ennemis,
On la peult bien octroyer aux amis.
Et ne faut ja qu'on ferme la Champagne
Plustost à moy qu'à quelque Jean d'Espagne:

Car quoy que né de Paris je ne fois,
Point je ne laisse à estre bon François:
Et si de moy, comme espere, lon pense,
J'ay entreprins pour faire recompense
Un œuvre exquis, si ma Muse s'enslamme,
Qui maugré temps, maugré fer, maugré slamme,
Et maugré mort fera vivre sans sin,
Le Roy François, & son noble Dauphin.

#### ADIEU AUX DAMES DE COURT

Adieu les filles, & les femmes :
Adieu vous dy pour quelque temps,
Adieu voz plaifans passetemps,
Adieu le bal, adieu la dance :
Adieu mesure, adieu cadence,
Tabourins, Haultsbois, Violons,
Puis qu'à la guerre nous allons.
Adieu donc les belles, adieu.

Adieu donc les belles, adieu,
Adieu Cupido vostre Dieu,
Adieu ses fleches & flambeaux,
Adieu voz ferviteurs tant beaux,
Tant polis, & tant dameretz:
O comment vous les tracterez,
Ceux qui vous servent à ceste heure!

Or adieu quiconque demeure : Adieu laquais, & le valet : Adieu la torche, & le mulet : Adieu monfieur qui fe retire Navré de l'amoureux martyre, Qui la nuict fans dormir fera, Mais en fes amours penfera.

Adieu le bon jour du Matin, Et le blanc, & le dur Tetin De la belle qui n'est pas preste : Adieu un autre, qui s'enqueste S'il est jour ou non, là dedens : Adieu les fignes evidens, Que l'un est trop mieux retenu, Que l'autre n'est le bien venu : Adieu, qui n'est avmé de nulle, Et ne sert qu'à tenir la mule : Adieu festes, adieu Banquets, Adieu devises, & caquets, Ou plus y ha de beau langage, Que de ferviettes d'ouvrage : Et moins de vrave affection, Que de dissimulation.

Adieu les regards gracieux
Messages des cueurs soucieux:
Adieu les prosondes pensées
Satisfaites, ou offensées:
Adieu les harmonieux sons
De rondeaux, dizains, & chansons:
Adieu piteux departement,
Adieu regrets, adieu tourment:
Adieu la lettre, adieu le page,
Adieu la Court, & l'equipage:

Adieu l'amytié si loyalle Qu'ou la pourroit dire Royalle Estant gardée en ferme foy, Par ferme cueur digne de Roy : Mais adieu peu d'amour semblable,

Et beaucoup plus de variable : Adieu celle, qui se contente, De qui l'honnesteté presente, Et les vertus, dont elle herite, Recompensent bien fon merite: Adieu les deux proches parentes, Pleines de graces apparentes. Dont l'une ha ce qu'elle pretend, Et l'autre non ce qu'elle attend : Adieu les cueurs unis ensemble, A qui lon fait tort, ce me femble, Ou'on ne donne fin amiable A leur fermeté fi louable. Adieu celle qui tend au poinct A voir un, qui n'y pense point : Et qui refus ne feroit mie D'estre sa femme en lieu d'amve. Adieu à qui gueres ne chaut, D'armer son taint contre le chaut : Car elle fçait tresbien l'ufage De changer fouvent fon vifage. Adieu amiable autant qu'elle, Celle que maistresse j'appelle, Adieu l'esperance ennuyeuse, Où vit la belle, & gracieuse, Qui par ses fecrettes douleurs En ha prins les palles couleurs : Adieu l'autre nouvelle palle, De qui la fanté gist au masle : Adieu la triste, que la mort Cent fois le jour poinct, & remort.

Adieu m'amye la derniere, En vertus & beauté premiere: le vous pry me rendre à present Le cueur, dont je vous sey present, Pour en la guerre, ou il saut estre, En faire service à mon maistre.

Or quand de vous fe fouviendra, L'aiguillon d'honneur l'espoindra Aux armes, & vertueux fait. Et s'il en fortoit quelque essect Digne d'une louenge entiere, Vous en seriez seule heritiere. De vostre cueur, donc vous souvienne : Car si Dieu veult que je revienne, Je le rendray en ce beau lieu, Or je say sin à mon Adieu.

#### A

# MADAME LA DUCHESSE DE FERRARE

Entraversant ton pais plantureux
Fertile en biens, en Dame bien heureux,
Et bien semé de peuple obeissant,
Le tien Marot (fille de Roy puissant)
S'est enhardy, voire & ha protesté
De saluer ta noble majesté,
Ains que passer tout outre les limites:
Ettant certain que si bien tu limites
De ton Sauveur la vraye intention,
Tu n'y auras brin de presumption:
Car estimant que par un bruit qui sonne
Tu sais mon nom, sans savoir ma personne:

Et que jadis fut serviteur mon pere
De ta mere Anne, en son regne prospere:
Croyant aussi, que tu sais que d'ensance
Nourry je suis en la maison de France,
De qui tu es Royalle geniture:
Cela pensant ne craint mon escriture,
Que ta grandeur la vueille resuser.
Mais quel besoing est il de m'escuser?

Les Oyfeletz des champs en leurs langages
Vont faluant les buissons, & bocages
Par ou ilz vont: quand le Navire arrive
Aupres du havre, il faluë la rive
Avec le fon d'un canon racourcy:
Ma Muse donc passant ceste Court-cy,
Fait elle mal saluant toy Princesse?
Toy à qui rid ce beau pass sans cesse:
Toy, qui de race aymes toute vertu,
Et qui en as le cueur tant bien vestu:
Toy dessous qui fleurissent ces grans plaines,
De biens & gens si couvertes, & pleines:
Toy qui leurs cueurs as sceu gaigner tres bien:
Toy qui de Dieu recongnois tout ce bien.

Salut à toy donques treshumblement,
Humble falut, par ton humble Clement,
Par ton Marot le Poëte Gallique,
Qui s'en vient voir le païs Italique
Pour quelque temps: si entre cy & là
Te peult fervir ma plume, & si elle ha
Savoir qui plaise à ta majesté haute,
Croy que plustost l'eau du Pau fera faute
A contre val ses undes escouler,
Que ceste plume à s'estendre & voller,
Là où le vent de tes commandemens

La poulsera, mesmes les Elemens
Lairront plustost leur nature ordonnée:
Car l'Eternel me l'ha (certes) donnée,
Pour en louer premierement son nom:
Puis pour servir les Princes de renom,
Et exalter les Princesses d'honneur,
Qui au plus haut de Fortune, & Bonheur
S'humilier de cueur sont coustumieres,
Auquel beau reng tu marches des premieres.

## A MONSEIGNEUR LE CARDINAL DE TOURNON

MAROT RETOURNANT DE FERRARE A LYON

Puis que du Roy la bonté merveilleuse :
Puis que je suis de retourner mandé,
Puis qu'il luy plaist, puis qu'il l'a commandé,
Et que ce bien procedé de sa grace,
Ne t'esbahis si j'ay suivy la trace,
Noble Seigneur, pour en France tirer,
Ou long temps ha je ne say qu'aspirer.

Le Marinier qui prend terre, & s'arreste Pour la fureur de l'orage & tempeste, Desancre alors que les Cieux sont amis. Le chevaucheur qui à couvert s'est mis, Laissant passer ou la gresse, ou la pluye, Des que de loing void qu'Aquilon essuye Le Ciel mouillé, il entre en grand plaisir, Desloge & tire au lieu de son desir. Certes ainsi, Monseigneur redouté,
Si tost que j'eu mon retour escouté,
Et que je vey la grand' nue essuyer,
Qui en venant me povoit ennuyer:
Mon premier poinct ce fut de louer Dieu,
Et le second de desloger du lieu
Là ou j'estois, pour au païs venir,
D'ou je n'ay sceu perdre le souvenir.

Nature ha prins fur nous ceste puissance, De nous tirer au lieu de sa naissance, Mesmes long temps les bestes ne sejournent Hors de leurs creux, mais tousiours y retournent.

Brief, du desir qu'au departir j'avoye,
Je n'ay trouvé rien de dur en la voye:
Ains m'ont semblé ces grans roches hautaines
Preaux herbus, & les torrens fontaines:
Bise, verglaz, la neige, & la froidure,
Ne m'ont semblé que printemps & verdure,
Si qu'à Dieu rends graces un million,
Dont j'ay attaint le gracieux Lyon,
Ou j'esperoys à l'arriver transmettre
Au Roy François humble salut en metre:
Conclud estoit. Mais puis qu'il en est hors,
A qui le puis je, & doy je addresser, fors
A toy qui tiens par prudence loyale,
Icy le lieu de sa hauteur Royale?

S'il est ainsi que la puissance qu'as
Toute s'estend en grans & petis cas:
Là raison veult donques que maintenant,
De ce salut tu sois son lieutenant.
Et puis je suis à cela confermé,
Pource qu'amy tu es & bien aymé
De l'assemblée aux Muses tressacrées:

Et qu'à Phebus en escrivant agrées.
Humblement donc, sur ce je te saluë,
Heur de Tournon, plein de haute valuë.
Dieu gard aussi d'infecte adversité,
L'air amoureux de la noble Cité.
Dieu gard la Saone au port bien sumptueux,
Et son mary le Rosne impetueux,
Qui puis un peu se demonstra si sier,
Que l'ennemy ne s'y ofa sier:
Et dont n'ha guere en diligence prompte,
S'est retiré Cesar aveques honte.

Si vous fupply, ô fleuves immortelz, Et toy Prelat, dont il est peu de telz, Et toy Cité fameuse de haut pris, Ne me vouloir contemner par mespris, Ains recevoir tout amiablement, L'humble Dieu gard, de vostre humble Clement.

## ADIEUX A LA VILLE DE LYON

A bieu Lyon qui ne mords point,
Lyon plus doux que cent pucelles,
Si non quand l'ennemy te point:
Alors ta fureur point ne celes.
Adieu aussi à toutes celles,
Qui embellissent ton sejour:
Adieu faces cleres & belles,
Adieu vous dy comme le jour.
Adieu Cité de grand valeur,
Et citoyens que j'ayme bien:
Dieu vous doint la fortune & l'heur

Meilleur que n'ha esté le mien: J'ay receu de vous tant de bien, Tant d'honneur & tant de bonté, Que voulontiers dirois combien, Mais il ne peult estre compté.

Adieu les Vieillards bien heureux, Plus ne faifans la court aux Dames, Toutesfois tousjours amoureux De vertu, qui repaist voz ames: Pour fuir reproches & blasmes, De composer ay entreprins Des Epitaphes sur voz lames, Si je ne suis le premier prins.

Adieu Enfans pleins de favoir, Dont mort l'homme ne desherite: Si bien fouvent me vinstes voir, Cela ne vient de mon merite: Grand mercy, ma Muse petite, C'est par vous, & n'en suis marry: Pour belle semme lon visite A tous les coups un laid mary.

Adieu la Saone, & fon mignon
Le Rofne qui court de vistesse,
Tu t'en vas droit en Avignon,
Vers Paris je pren mon addresse.
Je dirois adieu ma maistresse,
Mais le cas viendroit mieux à poinct,
Si je disois adieu jeunesse,
Car la barbe grise me poinct.
Va, Lyon, que Dieu te gouverne,
Assez long temps s'est esbatu
Le petit chien en ta caverne,
Que devant toy on ha battu.

Finalement pour fa vertu, Adieu des fois un million A Tournon de rouge vestu, -Gouverneur de ce grand Lyon.

## LE DIEU GARD A LA COURT

V IENNE la mort quand bon luy femblera, Moins que jamais mon cueur en tremblera, Puis que de Dieu je reçoy ceste grace De voir encor de Monseigneur la face.

Ha! mal parlans, ennemis de vertu,

Totalement me disiez devestu

De ce grand bien: vostre cueur endurcy,

Ne congneut onc ne pitié, ne mercy.

Pourtant avez semblable à vous pensé

Le plus doux Roy, qui fut onc offensé.

C'est luy, c'est luy, France Royne sacrée,

C'est luy, qui veult que mon œil se recrée,

Comme souloit, en vostre doux regard.

Or, je vous voy, France, que Dieu vous gard Depuis le temps que je ne vous ay veuë, Vous me semblez bien amendée & creuë, Que Dieu vous croisse encores plus prospere.

Dieu gard Françoys, vostre cher filz et pere, Le plus puissant en armes & science, Dont ayez eu encore experience.

Dieu gard la Royne Eleonor d'Austriche, D'honneur, de sens, & de vertus tant riche. Dieu gard du dard mortifere, & hydeux Les filz du Roy: Dieu nous les gard tous deux. O que mon cueur est plein de dueil, & d'ire, De ce que plus les trois je ne puis dire!

Dieu gard leur fœur, la Marguerite pleine De don exquis. Ha Royne Magdaleine, Vous nous lairrez, bien vous puis (ce me temble) Dire dieu gard, & adieu tout ensemble.

Pour abreger: Dieu gard le noble reste Du Royal fang, origine celeste.

Dieu gard tous ceux, qui pour la France veillent, Et pour son bien combatent, & conseillent.

Dieu gard la Court des Dames, ou abonde Toute la fleur, & l'eslite du monde. Dieu gard enfin toute la fleur de Lis, Lime, & rabot des hommes mal polis.

Or fus, avant, mon cueur, & vous mes yeux Tous d'un accord dressez vous vers les cieux. Pour gloire rendre au pasteur debonnaire, D'avoir tenu en son parc ordinaire Ceste brebis esloignée en souffrance. Remerciez ce noble Roy de France, Roy plus esmeu vers moy de pitié juste, Que ne fut pas envers Ovide, Auguste : Car d'adoucir fon exil le pria, Ce qu'accordé Auguste ne luy ha. Non que je vueille (Ovide) me vanter D'avoir mieux sceu que ta muse chanter : . Trop plus que moy tu as de vehemence Pour esmouvoir à mercy, & clemence : Mais affez bon perfuadeur me tien Ayant un Prince humain plus que le tien. Si tu me vaincz en l'art tant agreable, Je te furmonte en fortune amiable : Car quand banny aux Getes tu estois,

Ruisseaux de pleurs fur ton papier jettois En escrivant sans espoir de retour : Et je me vev mieux que jamais autour De ce grand Roy. Cependant qu'as esté Pres de Cefar à Rome en liberté, D'amour chantois, parlant de ta Corynne: Quant est de moy je ne veux chanter hymne, Que de mon Roy : ses gestes reluisans Me fourniront d'argumens suffisans. Oui veult d'amour deviser, si devise : Là est mon but. Mais quand je me r'avise Dov je finir l'Elegie presente Sans qu'un Dieu gard encore je presente? Non: mais à qui (puis que François pardonne Tant, & si bien, qu'à tous exemple il donne) Je dy Dieu gard à tous mes ennemis, D'aussi bon cueur qu'à mes plus chers amis.

### FRIPELIPES VALET DE MAROT

#### A SAGON

Par mon Ame il est grand' soison, Grand' année, & grande saison:
De bestes, qu'on deust mener paistre, Qui regibent contre mon maistre.
Je ne voy point qu'un faint Gelais, Un Heroet, un Rabelais, Un Brodeau, un Seve, un Chappuy, Voisent escrivant contre luy.
Ne papillon pas ne le point,

Ne Thenot ne le tenne point:
Mais bien un tas de jeunes veaux,
Un tas de rimasseurs nouveaux,
Qui cuident eslever leur nom,
Blasmant les hommes de renom:
Et leur semble, qu'en ce faisant
Par la ville on ira disant,
Puis qu'à Marot ceux-cy s'attachent,
Il n'est possible, qu'ilz n'en sçachent.

Et veu les fautes infinies,
Dont leurs Epitres font tournies,
Il convient de deux choses l'une,
Ou qu'ilz font troublez de la Lune,
Ou qu'ilz cuident qu'en jugement
Le monde (comme eux) est jument.
De là vient que les povres bestes,
Apres s'estre rompu les testes,
Pour le bon bruit d'autruy briser,
Eux mesmes se sont despriser:
Si que mon maistre sans mesdire
Aveques David peult bien dire:

Or font tombez les malheureux
En la fosse faite par eux:
Leur pied mesmes sest venu prendre
Au filé qu'ilz ont voulu tendre.
Car il ne faut pas leur respondre
D'autres escrits à les consondre,
Que ceux là mesmes qu'ilz ont faits,
Tant sont grossers, & imparfaits
Imparfaits en sens, & mesures,
En vocables, & en cesures,
Au jugement des plus fameux,
Non pas des ignorans, comme eux.

L'un est un vieux resveur Normand Si goulu, friant, & gourmand De la peau du povre Latin, Qu'il l'escorche comme un mastin. L'autre un Huet de sotte grace, Lequel voulut voler la place De l'absent: mais le demandeur Eut affaire à un entendeur. O le Huet en bel arroy Pour entrer en chambre de Roy! Ce Huet, & Sagon se jouent,

Ce Huet, & Sagon se jouent,
Par escrit l'un l'autre se louent :
Et semble (tant ilz s'entreslattent)
Deux vieux Asnes qui s'entregrattent.

Or des bestes, que j'ay sus dites, Sagon, tu n'es des plus petites : Combien que Sagon soit un mot, Et le nom d'un petit marmot.

Et fçaches, qu'entre tant de choses Sottement en tes dits encloses, Ce villain mot de, concluer, M'ha fait d'ahan le front suer.

Au reste de tes escritures, Il ne faut vingt, ne cent ratures Pour les corriger : combien donc? Seulement une tout du long.

Aussi Monsieur en tient tel compte, Que de sonner il auroit honte Contre ta rude cornemuse Sa douce lire: & puis sa Muse Parmy les Princes alaitée, Ne veult point estre valetée.

Hercules seit il puls essorts Si non encontre les plus forts? Pensez, qu'à Ambres bien serroit, Ou à Canis, qui les verroit Combattre en ordre, & equipage, L'un un Valet, & l'autre un Page.

J'ay pour toy trop de resistance: Encor ay je peur qu'il me tance, Dont je t'escry, car il sait bien Que trop pour toy je say de bien: Vray est, qu'il avoit un valet, Qui s'appelloit Nihil valet, A qui comparer on t'eust peu: Toutessois il estoit un peu Plus plaisant à voir que tu n'es: Mais non pas du tout si punais.

Il avoit bien tes yeux de Rane,
Et si estoit fils d'un Marrane,
Comme tu es: Au demeurant,
Ainsi vedel, & ignorant:
Si non qu'il favoit mieux limer
Les Vers qu'il faisoit imprimer.
Tu penses que c'est cestuy là,
Qui au lict de Monsieur alla
Et feit de sa bourse mitaine.
Et va, va: ta sievre quartaine.
Comparer ne t'y veux, ne doy:
Il valoit mieux cent sois que toy.
Mais vien ça, qui t'ha meu à dire
Mal de mon maistre en si grand' ire:

Vrayment il me vient fouvenir, Qu'un jour vers luy te vey venir Pour un chant Royal luy monstrer, Et le prias de l'accoustrer, Car il ne valloit pas un œuf.
Quand il l'eut refait tout de neuf,
A Rouen en gaignas (povre homme)
D'argent quelque petite somme,
Qui bien à propos te survint,
Pour la verolle qui te vint.

Mais pour un fueur, quand j'y pense,
Tu en rends froide recompense.
Il semble, pourtant, en ton Livre,
Qu'en le faisant tu fusses yvre:
Car tu ne sceus tant marmonner,
Qu'un nom tu luy sceusses donner:
Si n'ha il Couplet, Vers, n'Epistre,
Qui vaille seulement le Titre.
Donc ne sois glorieux, ne rogue:
Car tu le grippas au Prologue
De l'Adolescence à mon maistre:
Et qu'on lise à dextre ou senestre,
On trouvera (bien je le say)
Ce petit mot de coup d'essay,
Ou coups d'essay, que je ne mente.

O la fotife vehemente!
A peine fera jamais craint
Le combattant, qui est contraint
D'emprunter, quand vient aux alarmes,
De fon adversaire les armes.

Ha rustre, tu ne pensois pas,
Que jamais il deust faire un pas
Dedans la France: tu pensois
Sans pitié ce bon Roy François:
Et le paingnois en ton cerveau
Aussi Tigre que tu es Veau.

C'est pourquoy les cornes dressas,

Et quand tes escrits adressas Au Roy, tant excellent Poëte: Il me souvint d'une Chouette Devant le Rossignol chantant: Ou d'un Oyson se presentant Devant le Cygne pour chanter.

Je ne veux flatter, ne vanter:
Mais certes monsieur auroit honte
De t'allouer dedans le compte
De ses plus jeunes apprentifs:

Venez fes disciples gentils,
Combattre cesse lourderie:
Venez fon mignon Borderie,
Grand espoir des Muses hautaines:
Rocher, faites saillir Fontaines:
Lavez tous deux aux Veaux les tesses:
Lyon: qui n'es pas Roy des bestes:
(Car Sagon l'est) sus, haut la pate,
Que du premier coup on l'abbate.

Sus Gallopin, qu'on le gallope, Redressons cest Afne qui choppe, Qu'il sente de tous la poincture : Et nous aurons Bonadventure, A mon advis, assez savant Pour le faire tirer avant.

Vien Bordeau le puisné son fils, Qui si tresbien le contresis Au huictain des Freres Mineurs Que plus de cent beaux devineurs Dirent, que c'estoit Marot mesme: Tesmoing le Grisson d'Angoulesme, Qui respondit argent en poupe, En lieu d'yvre comme une souppe.

Venez donc fes nobles Enfans Dignes de chappeaux triomphans De vert Laurier, faites merveilles Contre Sagon digne d'oreilles A chapperon. Non, ne bougez Pour le vaincre rien ne forgez, Laissez cest honneur, & estime A la Dame Anne Philetime, De qui Sagon pourroit apprendré, Si la peine elle daignoit prendre De l'enfeigner. Trembles-tu point Coquin, quand tu oys en ce poinct Hucher tant d'esprits, dont le moindre Sait mieux que toy louer, & poindre?

Je laisse un tas d'yvrongneries, Oui sont en tes rimasseries. Comme de tes quatre raifons Aussi fortes que quatre Oysons: De ces deux sœurs Savoisiennes, Que tu cuidois Parisiennes: Et de mainte autre grand' folie Dont il n'ha'grand' melancolie.

Mais certes il se deult gramment De t'ouyr irreveramment Parler d'une telle Princesse, Que de Ferrare la Duchesse, Γant bonne, tant fage, & benigne.

O quantesfois en sa cuisine Ton dos ha esté souhaitté Pour y estre bien fouetté! Dont (peult estre) elle eust fait deffense : Tant bien pardonne à qui l'offence.

Mais moy je ne me puis garder

De t'en battre, & te nazarder : Ta mefchanceté m'y convie, Et m'en faut passer mon envie.

Zon dessus l'œil, zon sur le groin : Zon sur le dos du Sagovin, Zon sur l'Asne de Balaan.

Ha vilain, vous petez d'ahan. Le feu faint Antoine vous arde. Ca ce nez, que je le nazarde, Pour t'apprendre aveques deux doigts A porter honneur où tu doibs.

Enflez vilain, que je me jouë : Sus apres, tournez l'autre jouë : Vous criez : je vous feray taire Par Dieu, Montieur le secretaire De beurre frais. Hou le mattin. Pleust à Dieu que quelque matin Te vinsses à te revenger : L'abbé feroit en grand danger. De voir par maniere de rire Monsieur mon Maistre luv escrire, Et d'estre de luv mieux traicté, Que de moy tu ne l'as esté : Car il fait tout : & fait comment Te feit expres commandement De t'en aller mettre en besongne Pour composer ton coup d'yvrongue: Ce que luy accordas, pourveu Qu'en apres tu ferois pourveu De la cure de Soligny. Quant à celle de Sotigny Long temps ha par election Tu en prins la possession.

Que je donne au Diable la beste : Il me fait rompre icy la teste A ses merites collauder, Et les bras à le pelauder : Et si ne vaut pas le tabut.

Mieux vaut donc icy mettre but, T'aduifant, Sot, t'aduifant, Veau, T'aduifant, valeur d'un naveau, Que tu ne veis recevoir Onques tant d'honneur, que d'avoir Receu une Epistre à outrance D'un valet du Maro de France.

Et crains, d'une part, qu'on t'en prise: Puis d'avoir tant de peine prise, J'ay peur, qu'il me soit reproché, Qu'un Asne mort j'ay escorché.

FIN DU TOME PREMIER

# TABLE DES MATIÈRES

## DU TOME PREMIER

## OPUSCULES DE L'ADOLESCENCE

Bland at a contract the contract to the contra	20
	) =
Eglogue au Roy, sous les noms de Pan, & Robin.	35
	13
ELEGIES	
Elegie premiere	9
Élegie II	)4
	57
Elegie IV	0
	73
	7-1
	75
	76
	78
	79
	80
	82
Elegie XIII	83
Elegie XIV	86

Elegie XV	80
Elegie XVI	02,
Elegie XVII	95
Elegie XVIII	98
Elegie XIX	100
Elegie XX	103
Elegie XXI. De la mort d'Anne l'Hulier	107
Elegie XXII. Du riche infortuné Jaques de	
Beaune, Seigneur de Semblançay	108
Elegie XXIII. De Jan Chauvin menestrier	110
Elegie XXIV	112
Elegie XXV. Pour Monsieur de Barroys : à ma	3.5
Damoyfelle de Huban	•113
Elegie XXVI. A une, qui refusa un present	114
Elegie XXVII. A une malcontente, d'avoir esté	28
sobrement louée; et se plaignant non sobre-	
ment	116
	1
EPISTRES DE L'ADOLESCENCE	
Y No. 1 December 1	
Maguelonne à ton amy Pierre de Provence.	110
Le Despourveu, à ma Dame la Duchesse d'Alen-	
çon, & de Berri, fœur unique du Roy	133
Du camp d'Attigny, à madite Dame d'Alençon. A ladite Dame touchant l'Armée du Roy en	132
	138
Haynaut	150
amis	140
Des Jartieres blanches	142
Au Roy	143
Pour le Capitaine Bourgeon, à Monsieur de la	
Roque	144
Pour le Capitaine Raisin, audit Seigneur de la	.44
Roque	145
A Monsieur Bouchart, Docteur en Theologie.	147


A fon amy Lyon	149
Du Coq à l'Afne, à Lyon Jamet : Je t'envoye un	_
grand million	151
Excuses d'avoir fait aucuns Adieux	155
Aux Dames de Paris, qui ne vouloient prendre	- 5
les precedentes excuses en payement	157
A la Royne Eleonor, à fon arrivée d'Espagne	
avec Messieurs les enfans	165
A Monseigneur de Lorraine, luy presentant le	
premier Livre translaté de la Metamorphose.	168
A Monseigneur le grand Maistre de Montmo-	100
rency, luy envoyant un petit Recueil de ses	
Oeuvres, avec recommandation du porteur.	170
Pour Pierre Vuiart, à Madame de Lorraine.	•
	172
Epistre, qu'il perdit à la Condemnade contre	
les couleurs d'une Damoyfelle	174
A une jeune Dame, laquelle un vieillard marié	_
vouloit espouser, & decevoir	175
A celuy qui l'injuria par escrit, & ne s'osa	
nommer	177
Pour un Gentilhomme de la Court, escrivant	
aux Dames de Chasteaudun	179
A Guillaume du Tertre, Secretaire de Monsieur	
de Chasteaubriant	182
Pour un vieil Gentilhomme, respondant à la	
lettre d'un sien amy	183
Au Chancellier du Prat, nouvellement Cardi-	
nal :	185
Audict Seigneur. Pour se plaindre du Tresorier	
Preudhomme	187
Au Roy, pour le delivrer de prison	188
Au Reverendissime Cardinal de Lorraine	190
Au Roy, pour avoir esté desrobé	193
A un sien amy, sur ce propos	197
A un qui calumnia l'epistre precedente	197
Au Lieutenant Gontier	198

A Vignals Thouloufan	199
A Monseigneur de Guise passant par Paris	200
Au Roy, pour succeder en l'estat de son Pere.	200
Pour la petite Princesse de Navarre. A Ma-	
dame Marguerite	204
Au General Prevost	206
A Alexis Juré, de Quiers en Piedmont	207
A une Damoyfelle malade	208
A deux Damoyfelles	200
	200
A ceux, qui apres l'Epigramme du beau Tetin,	
en feirent d'autres	210
Du Coq à l'Afne, à Lyon Jamet	213
Lyon Jamet à Marot	210
Au Roy, du temps de son exil à Ferrare	222
A Monseigneur le Dauphin, du tems de sondict	
exil	228
Adieu aux Dames de Court	231
A Madame la Duchesse de Ferrare	234
A Monseigneur le Cardinal de Tournon, Marot	
	020
retournant de Ferrare à Lyon	236
Adieux à la ville de Lyon	238
Le Dieu gard à la Court	240
Fripelipes, valet de Marot, à Sagon	242

FIN DE LA TABLE DES MATIÈRES


382

Sceaux. - Imp. Charaire et fils.









othèque

The Library 1'Ottawa University of Ottawa ace Date due



CE PQ 1635

•A1 1884 V1

COO MAROT, CLEME CEUVRES DE ACC# 1387299

